

ప్రకటన పుస్తకము జర్గు జంక తిలిసి దేముడు బారిక్ జలో యోహానుక డీసయ్లినీ

మొదొల్ కోడు

¹ యేసుక్రీస్తు, జోచ సేవ కెర్తనక దెకవుక మెన బే బేగి జర్గు జంక తిలిసి దేముడు అబ్బొసి జోక దిలన్. బే బేగి జర్గు జంక తిలిసి జా ఎత్తి, జోచో సేవ కెర్తొసా యోహానుక జోచో దూతచి అత్తి డీసవ దిలయ్.

² జలె, దేముడుచి ఈంజ కబుర్చి రిసా, యేసుక్రీస్తు దెకయ్లీ ఈంజ సాచిచి రిసా, జా ఎత్తి దెకిలిన్చి రిసా యోహాను ఇన్నె సాచి రెగిడ్తసి.

³ జర్గు జంక తిలిన్చి ఈంజ కబుర్ అన్నె కో నదు కెరుల గే, ఇన్నెక కో నూన ఇన్నె సంగిల్ రితి కెరుల గే, జోక చెంగిలి. కిచ్చొక మెలె, ఈంజ జర్గు జంక దెర్తి సమయుమ్ పాసి జా జెతయ్.

⁴ ఆసియా ప్రదేసిమ్చ ^{*}సత్తు [†]సంగుమ్లచక ఆవ్ యోహాను కిచ్చొ కబుర్ రెగిడ్తసి మెలె, కెయ్తె తెయ్తె తిలొసా, తతొసా, జెంక తిలొసా తెంతొ, పడ్తొ జోచి సింగాసనుమ్చి పురెతొ తతా [‡]సత్తు ఆత్మల్ తెంతొ, ⁵ పడ్తొ నంపజతి సాచి నిదానుమ్తె ఇండ, మొర అన్నె జీవ్ జతసక తొల్పుర్ జతొ, ఒండి లోకుమ్చ రానల్క ఏలువ కెర్తొ యేసుక్రీస్తు తెంతొ దయ, సేంతుమ్, తుమ్చి ఉప్పిరి తవున్.

***** **1:4** 1:4 యాదుల్ తెన్, 'సత్తు' మెలి నంబర్క కిచ్చొ అర్దుమ్ మెలె, పూర్తి తిలిసి ఇన్నె దొన్నిచి తిన్ని నంబర్లు అద్యయల్తె ఏక్ సత్తు సంగుమ్లుచ నవ్వు దెర జోవయింక ఎక్కె కబుర్లు సంగెదె, గని ఏక్ వేల ఈంజ 'సత్తు' నంబర్ ఒండి లోకుమ్చ నంపజలనచ సంగుమ్లు మొత్తుమ్క కి ఏక్ టాలి జయెదె. **† 1:4** 1:4 'సంగుమ్' మెలె, ఏక్తెచ నంపజలన మొత్తుమ్క 'సంగుమ్' మెనుక జతయ్. **‡ 1:4** 1:4 సత్తు ఆత్మల్ మెలె, ఎత్తి, అదికారుమ్ తిలొ దేముడుచి సుద్ది తిలి ఆత్మక సంగితయ్. ఇన్నె సత్తు మెలె, పూర్తి తిలిన్చి అర్దుమ్ కి, పూర్తి సత్తిమ్ తిలిన్చి అర్దుమ్ కి తయెదె. పూర్తి సెక్తి తిలిన్చి అర్దుమ్ కి ఉచరుక జయెదె. పడ్తొ ఒండి లోకుమ్తె తిలిసి ప్రబుచి ఆత్మ దెకిలిన్చి అర్దుమ్ కి ఉచరుక జయెదె; జెకర్యా 4:10.

యేసుక్రీస్తు అమ్మక ప్రేమ కెర, జోచి మొర్నిచి అర్పితుమ్ జలి సొంత లోయి సువడ కెర, అమ్మచ పాపల్చి సిచ్చ తెంతో అమ్మక విడ్డల్ కెర్లన్. ⁶ జో అమ్మక జోచో దేముడు జలో జోచో అబ్బొన్చి రాజిమ్, పూజర్లు జతి రితి, సేవ కెరుక మెన జో జర్గు కెర అస్సి. జా ఎత్కిచి రిసా జో యేసుక్రీస్తుక కెయఁక తెయఁక గవురుమ్ అదికారుమ్ తవున్! ⁷ ఆమేన్! ఈందె, మబ్బుల్ తెన్ జో పరలోకుమ్ తెంతో అన్నె ఉత్త జెయెదె, చి ఎత్కి అంకివో జోక దెకుల. జోక మార్గన ఎత్కిజిన్ కి. అన్నె జోక అగ్గ మార తిలన్ జలె ‘బలే తప్పు కెర్లమ్’ మెన ఒండి లోకుమ్చ సెకుమ్లుచ మాన్సుల్ ఏడుకుడు జవుల. దస్సి జర్గు జవున్! *ఆమేన్!

⁸ కెయఁక తెయఁక తిలోసా, తతోసా, జెంక తిలోసా, ఎత్కి అదికారుమ్ తిలో ప్రబు జలో దేముడు, జొయ్యి మొదోల్ జొయ్యి ఆకర్ మెన అర్దుమ్ జలి, “ఆవ్ అల్ఫా, ఆవ్ ఓమెగ” మెన సంగితయ్.

పత్మాన్ డిబ్బతె యోహాను తిలి పొది యేసుప్రబు డీసిలిసి

⁹ ఆవ్ తుమ్చో బావో జలో యోహాను, జలె, యేసుచి తెడి తుమ్చి తెన్ ఈంజ కాలుమ్చ బాదల్ సేడ తుమ్చి తెన్ ఓర్పుప జతసుమ్. తుమ్చి తెన్ యేసుచి తెడి జోచి రాజిమ్తె, బెద ఏలుప కెర్తసుమ్. జలె, ఆవ్ యోహాను, దేముడు దిలి సుబుమ్ కబుర్, యేసుచి రిసాచి సాచి, సూనయ్తె తిలి రిసా జేలి జా పత్మాన్ డిబ్బతె తిలయ్.

¹⁰ ఒత్త తిలె, ప్రబుచి బక్తి కెర్తి సెలవ్ కడల్లి దీసి, దేముడుచి జో యేసుప్రబుచి ఆత్మతె అంచి ఆత్మ తెన్ ఆవ్ బెరవ తిలి పొది, అంచి పడ్డె, సప్పిర్మూరిచి అవాడ్ కిసి గట్టిజ జయెదె గే, దస్సి ఏక్ ఒగ్గర్ అవాడ్ సూన్లయ్. ¹¹ “తుయి అప్పె కిచ్చొ దెకితె గే, ఏక్ †పుస్తకుమ్తె రెగ్గ, సంపజలనచ ఆవ్ సంగిత సత్తు సంగుమ్లుతె తెద్రవు. ఎపెను,

§ **1:6** 1:6 ఎబ్రి బాన తెన్ ఇన్నె ‘ఆమేన్’ మెనుల. జా కోడుచి అర్దుమ్ కిచ్చొ మెలె, ‘తెద్దిలి!’. ‘జర్గు జవున్!’ * **1:7** 1:7 ఎబ్రి బాన తెన్ ‘ఆమేన్!’ మెనుల. కుపియ బాన తెన్ తెదిలి మెన సవుల † **1:11** 1:11 నెంజెలె ‘వెల్లి పుస్తకుమ్’. జేవ్ పొదులె ఏక్ వెల్లి పుస్తకుమ్తె రెగ్గ, సదు కెర తియ తతి పొది, సుట్టుప కెర తియ తవుల.

స్మార్టు, పెర్లము, తుయత్తెర, సార్దీన్, పిలదెల్పియ, అన్నె లవోదికయ పట్టుమ్తెచి సత్తు సంగుమ్లుతె తెద్రవు” మెన జా అవాడ్ అంక సంగిలన్.

డిసన్ సేడ్డిసి

12 తెదొడి అంక జా కోడు సంగిలి అవాడ్ తిలొసాక దెకుక మెన, ఆవ్ పసిల్లె, సత్తు దివ్వొ తిల బజర్క తెయార్ కెర్ల తంబల్ దెకిలయ్.

13 జేవ్ తంబల్చి నెడ్మె ఎక్కిలో టీవోజ తిలొ. జో కీసా తిలొ మెలె, మాన్సు జా జెర్మిలో రితో డీస, చట్టె పావెతి దిగిల్ లాల్చి గలన తా, గుండె బజర్చి పట్టు §బందన తిలొ. 14 జోచి *బోడిచి సెండి, పూర్తి చొక్కి ఊలుచి ఎదిలి, మంచుచి ఎదిలి చొకు తయెదె. జోచ అంకివో, ఆగివో లగిలి రితి తిల. 15 జోచ చట్టొ, ఆగితె డడ్డ దగదగాల్న మెర్నువ జతి కంచుచి రితి తిల. జోచి అవాడ్, వెల్లి బూరుమ్చి పాని సూయి జతి అవాడ్చి రితి బడబడాల్న జయెదె. 16 జోచొ ఉజిల్ అత్తి సత్తు సుక్కల దెర తిలన్, చి జోచి చోండి తెంతొ దొన్ని పక్కలె వాండి తిలి కండా బార్ జతె తిలి, చి జోచి మొకొమ్, పొద్దు పూర్తి సత్తు తెన్ ఉజిడి లగితె పొది కీసి తయెదె గే, దస్సి జలె.

17 జోక దెకిల్ బేగి, మొర్లొ రితొ జా జోచి చట్టె సేడ గెలయ్. గని జోచొ ఉజిల్ ఆతు తెన్ అంక చడ, అంక కిచ్చొ మెలన్ మెలె, “తుయ్ బి నాయ్. ఆవ్ తొలితొచొ కి ఆకర్చొ కి. 18 ఆవ్ జివ్ తిలొసా జివ్ దెతొసా. ఆవ్ మొర్లయ్, గని అన్నె జివ్ జా కెయడ తెయడ జివ్వి తయిందె, అన్నె మొర్నుక చి మొర్లన్క రకితి టాన్కచి †తాలుమ్ అంచి అత్తి అస్సె. 19 జాకయ్ తుయి కిచ్చొ అప్పె దెకితన్ గే, రెగుడు. అప్పెచి కి పడ్డొక జర్గు జంక తిలిసి కి. 20 పడ్డొ అంచొ ఉజిల్ అత్తి తిల సత్తు

‡ 1:13 1:13 దానియేలు 7:13, 14. § 1:13 1:13 యూదుల్చి అలవాట్ తెన్ దసా దిగిల్ పాలుమ్ చి బజార్ రగుమ్ పట్టు ఎత్తి అదికారుమ్ తిలొ దేముడుక ఎత్తిక వెల్లొ పూజరి జలొ కేన్ జవున్ మాన్సు గలన బందన తయెదె. ఇన్నె, యేసుక ‘జో ముక్కిమ్ జలొ పూజరి’ మెన ఈంజ టాలి రుజ్జు దెకయ్తయ్. * 1:14 1:14 దానియేలు 7:9.

† 1:18 1:18 మెలె, మాన్సు ఒత్త తంక, నెంజిలె విడ్డల్ జా పరలోకుమ్తె నెంజిలె ఆగి గొయితె గెచ్చుక నెలవ్ దెతి సెక్తి కచి మెలె, యేసుచి.

సుక్కల్, చి బజర్క తెయార్ కెర్ల సత్తు దీవుకంబల్చి అర్దుమ్, సత్తు సుక్కల్ సత్తు సంగుమ్లుచ దూతల్ జవుల, చి సత్తు దీవుకంబల్, జేవ్ సత్తు సంగుమ్లుచి జవుల” మెలన్.

2

ఎపెసు పట్టుమ్తెచ సంగుమ్చక చి ఉత్తుమ్

1 “ఎపెసు పట్టుమ్చ సంగుమ్చొ దూతక ఇసి మెన రెగుడు. *సత్తు సుక్కల్ జోచి ఉజిల్ అత్తి దెరితో, దివ్వొ తిత సత్తు బజర్చ తంబల్చి నెడిమి బులితోసా తుమ్క సంగిలిన్ కిచ్చొ మెలె, 2 †తుచి కమొ కీసచ గే, తుయి అంచి కామ్ కెర కెర ఒర్నుప జా నిదానుమ్ తతిసి ఆవ్ జాని. మెలె, పాపుమ్తె ఇండిత మాన్సుల్క తుయి సంగుమ్తె నే బెదవంతె, ‘క్రీస్తుచ బారికుల్ ఆమ్’ మెన అబద్దుమ్క సంగిత గార్ మాన్సుల్క పరిచ్చ కెర, ‘క్రీస్తుచ నెంజితి’ మెన తుమ్ రుజ్జు కెర్లిసి కి ఆవ్ జాని. 3 అంచి నావ్చి రిసా తుమ్ ఒగ్గర్ నిదానుమ్ తెన్ ఒర్నుప జా అన్మానుమ్ నే జలిసి ఆవ్ జాని.

4 “గని తుచి ఏక్ తప్పుచి రిసా అంక కిచ్చొ బాద అస్సె మెలె, కిచ్చొ తీర్పు సంగుక అస్సె మెలె, అంచి రిసాచి తుచితె తిలి తొలితోచి ప్రేమ పచ్చ ముల దిలదు. 5 జాకయ్, అగ్గె కీసి అంక ఒగ్గర్ ప్రేమ కెర్తె తిలదు, అప్పె కీసి అస్సున్ గే ఉచర. అప్పెచి తప్పు ఒప్పున పెట్టి దుకుమ్ జా, తుమ్ తొలితో నంపజలి పొది ఇండిలి ప్రేమ కమొ అప్పె తెంతొ అన్నె

* 2:1 2:1 1:20 దెక. † 2:2 2:2 దొన్నిచి తిన్ని నంబర్లు అద్యయల్తె ‘సత్తు సంగుమ్లుచ దూతల్క’ మెన ఎక్కిక్ కబుర్లు జోవయింక రెడ్ల అస్సె. ఎత్తి సంగుమ్చొ దూతక ఏక్ కబుర్. గ్రికు బాస తెన్ ఈంజ ‘డిసయ్లిసి’ మెలి పుస్తకుమ్తె ఈంజివ్ సత్తు కబుర్లు రెగిడ్లిన్తె ఎత్తి కబుర్తె ‘తుయి’, ‘తుచి’, ‘తుక’ మెల కొడొ రెడ్ల అస్సె. గని ఎత్తి సంగుమ్చొ దూత జోవయించి సంగుమ్చ మాన్సుల్ మొత్తుమ్క టాలి రితి జయెదె మెన, తుక తుమ్, తుచిక తుమ్చి, తుకక ‘తుమ్క’ మెన రెడ్ల అస్సుమ్. దస్సి 2:2 కోడుతె తుచ కమొక ‘తుమ్చ కమొ’ మెన, 2:3 నంబర్ కోడుతె తుయి ఒగ్గర్ తెన్ నిదానుమ్ ఒర్నుప జా అన్మానుమ్ నే జలిన్క తుమ్ ఒగ్గర్ తెన్ నిదానుమ్ ఒర్నుప జా అన్మానుమ్ నే జలిన్ మెన రెడ్ల అస్సుమ్. దొన్నిచి తిన్ని నంబర్లు అద్యయల్ మొత్తుమ్తె ఈంజ సొస్టుమ్ కెర అస్సుమ్.

ఇండ. నెంజిలె, జా తప్పు ఒప్పున చెంగిల్ జతి రితి తుమ్ మార్పుప నే జలె, తుమ్తె ఆవ్ జా కెర, తుమ్చి దీవుకంబుమ్ ఉర్ల వెంట గెలిందె. ⁶ జలె తుమ్తె చెంగిల్ కామ్ ఏక్ అప్పెక అస్సె. కిచ్చొ మెలె, జేవ్ ‡‘నీకొలాయితులు’ మెలసచ కమె దూర్ కెర్తసు. ఆవ్ కి ఎద్దరె నెసిత కమె తుమ్ కి నెసితసు.

⁷ “జలె, సంగుమ్లక కీదేముడుచి సుద్ది తిలి ఆత్మ ఇన్నెతెన్ కిచ్చొ సంగితయ్ గే, కంగ్గొ తిలొసా సూన్తు. కో అంచి పరిచ్చతె జీనుల గే, దేముడుచి పరలోకుమ్చి తోటతె తిలి జీవ్ దెతి రూక్చ పండ్లు కంక దెయిందె.

స్మర్తు పట్టుమ్చ సంగుమ్చక చి ఉత్తమ్

⁸ “పడ్డె స్మర్తు పట్టుమ్చ సంగుమ్చొ దూతక ఇసి మెన రెగుడు.

“తొలితొ తిలొ, ఆకర్క తిలొ మొర అన్నె జీవ్ జలొసా తుమ్క సంగిలిన్ కిచ్చొ మెలె, ⁹ తుమ్ సేడ్త అల్లర్, తుమ్ బీద తిలిసి ఆవ్ జాని. బీద జలె కి, ఆత్మక సొమ్మారుమ్ జా అస్సున్. పడ్డె ‘యూదుల్ ఆమ్’ మెనన సత్తిమ్చ యూదుల్ నెంజిలస; సయ్తాన్చి సంగుమ్తె బెదితస జేవ్; జలె, తుమ్క దూసుప కెర్తిసి ఆవ్ జాని. ¹⁰ తుమ్ అప్పె సేడుక తిల అల్లర్చి రిసా తుమ్ బియ్ నాయ్. ఈందె, తుమ్తె సంగుమ్జిన్ పరిచ్చ జతి రితి, సయ్తాన్ జోక జేల్తె గలెదె, చి దెస్సు పొదుల్క అల్లర్ తెన్ తస్సె. మొరుక జలెకి తుమ్ నిదానుమ్ తా, చి తుమ్ జీన పరలోకుమ్తె తుమ్ కెయ్క తెయ్క జింక మెన బవుమానుమ్ దెయిందె.

¹¹ “సంగుమ్లక అమ్చి దేముడుచి సుద్ది తిలి ఆత్మ ఇన్నెతెన్ కిచ్చొ సంగితయ్ గే, కంగ్గొ తిలొసా సూన్తు. ఈంజ లోకుమ్తెచ అల్లర్తె కో అంచి ఆత్మనెక్కిక జీనుల గే, జా అన్నెక్ మొర్పు, సయ్తాన్తె సిచ్చ జతి మొర్పు, జోవయింక తయె నాయ్.

పెర్లము పట్టుమ్చ సంగుమ్చక చి ఉత్తమ్

‡ 2:6 2:6 ఏక్ వేల బిలామ్ సికడ్లిసి; మెలె, బొమ్మల్క దిలిసి కతిసిచి లంజె కమెతె బెదితిసి; జేవ్ నీకొలాయితులు సికడ్ల. 2:14, 15 దెక. § 2:7 2:7 మెలె, దేముడు అబ్బొన్చి యేసుచి ఆత్మ.

12 “పడ్డో పెర్గము పట్టుమ్తెచ సంగుమ్చో దూతక ఇని మెన రెగుడు.

“దొన్ని పక్కలె వాండి కెర్లి కండా దెర్లొసా తుమ్క సంగిలిన్ కిచ్చొ మెలె, 13 తుమ్ జితిసి కేనె గే జాని. కేనె మెలె, సయ్తాన్చి సింగాసనుమ్ తిలిన్తెయి. అంచి నావ్ డిట్టుమ్ దెరన్తను, పడ్డో అంక నిదానుమ్ నముకుమ్ తిలొ అంచి సాచి సంగితె తిలొ అంతిపయను బుల్తె తిలి పొది కి, తుమ్చి నెడిమి సయ్తాన్ జితిన్తె జో అంతిపయను జేవ్ మార్లె కి, అంచి రిసాచి తుమ్చి నముకుమ్ ఒప్పునుక ములున్ నాయ్. 14 గని, తుమ్ కెర్త సగుమ్ తప్పుల్చి రిసా అంక బాద, తీర్పు సంగుక అస్సె. కిచ్చొ మెలె, తుమ్చి తెన్ బెదిలస సగుమ్జిన్ బిలామ్ సికడ్డిసి సిక ‘చెంగిలి’ మెంతతి. అమ్చ ఇస్రాయేలులు దేముడుక సత్తిమ్ ఇండితిసి పిట్టయ్తి రితి, బొమ్మల్క దిలిసి కంక చి లంజె కమెతె బెదుక బాలాకుక *బిలామ్ సికడ్లన్. 15 దస్సి, ‘సీకొలాయితులు’ మెలస సికడ్డిసి నంప కెర్తస సగుమ్జిన్ తుమ్తె అస్తి. 16 జాకయ్, తుమ్ తప్పు జలిసి ఒప్పున, పెట్టి దుకుమ్ జా, జా తప్పుల్ ముల. నెంజిలె, బే బేగి తుమ్తె జా కెర, అంచి చొండి తెంతొ బార్ జలి †కండా తెన్ జేవ్ మాన్సుల్చి ఉప్పిరి యుద్దుమ్ కెరిందె.

17 “సంగుమ్ల్క దేముడుచి సుద్ది తిలి ఆత్మ ఇన్నెతెన్ కిచ్చొ సంగితయ్ గే, కంగ్గొ తిలొసా సూన్తు. ఈంజ లోకుమ్ సికడ్డిన్చి ఉప్పిరి కో జినుల గే, లుంకిల్ రితి తిలి పరలోకుమ్ తెంతొ ఆవ్ నువితి ‘మన్నా’ మెలి అన్నిమ్ జోక దెయిందె, చి అన్నె కిచ్చొ దెయిందె మెలె, జోక ఎక్కెక్క చొక్కిల పత్రల్ దెయిందె. జోతె ఎత్తి మాన్సుక జోచి పత్రె, జోక నొవి నావ్ రెగ్గ దెయిందె. కేన్ నావ్ కక్క దెయిందె గే, ఎక్కి జోకయ్ సొంత ఎర్కె జయెదె, గని అన్నె కక్కయ్ నాయ్.

తుయత్తెర పట్టుమ్తెచ సంగుమ్చక చి ఉత్తుమ్

* 2:14 2:14 సన్యాకాండుము 22:1-35, 25:1-2, 31:16. † 2:16 2:16 ‘యేసుచి చొండి దెర్లి కడ్డుమ్’ మెలె, జో తీర్పు కెర్లి కోడు. ఎబ్రియల్ 4:12.

18 “పడ్డో తుయత్తెర పట్టుమ్చ సంగుమ్చో దూతక ఇసి మెన రెగుడు.

“ఆగి లగిత రిత అంకివో తిలో, దగదగాల్న మెర్నప జతి కంచు డిస్త రిత చట్టో తిలో, దేముడుచొ పుత్తుసి తుమ్క సంగ తెద్రయ్త కొడో ఈంజేవ్.

19 “తుమ్ కెర్త కమొ, తుమ్చి ప్రేమ, తుమ్చి నిదానుమ్చి నముకుమ్, తుమ్చి సేవ, బాదల్ ఓర్నప జతి తుమ్చి నిదానుమ్, పడ్డో తుమ్ తొలితొ నంపజలి కంట, తుమ్ అప్పె అన్నె ఒగ్గర్ చెంగిల కమొతె ఇండితిసి ఆవ్ జాని. 20 గని తుమ్చి రిసా అంక కిచ్చో బాద, కిచ్చో తీర్పు సంగుక అన్నె మెలె, ‘దేముడుచ కబుర్లు సంగితిసి ఆవ్’ మెన ఆరి సంగుమ్తె తేర్బోద యెజెబెలు అంచ సేవ కెర్తసక పాపుమ్ సికడ్లకి, తుమ్ తీర్పు నే సంగితె తుక్లె తత్తను. అమ్చ సేవ కెర్తస లంజెతె గెతి రితి, బొమ్మల్క దిలిసి కతి రితి, జా సికడ్లయ్. 21 జాక ‘తప్పు ఒప్పున పెట్టి దుకుమ్ జా, జా పాపుమ్ ముల్గు’ మెన అగ్గెయ్ తెంతో జాక అవ్కానుమ్ దా అస్సి, గని జాచి లంజెచి రిసా విసారుమ్ కి జయె నాయ్. 22 ఈందె, జాక జబ్బు తెద్రయిందె, చి జాచి తెన్ లంజె జతన ఎత్తిజిన్క గొప్ప అల్లర్ సేడయిందె. జాచ కమొ, జా కెర్లిన్చి రిసా, జాచి దుకుమ్ జా నే ములిలెగిన, 23 పడ్డో, జాచ బోదల్ జల జాచ కోడు సూన్లసక మొర్ను లయడిందె. దస్సి సిచ్చ కెర్లె, ఎత్తి సంగుమ్చ కిచ్చో చినుల మెలె, ఎత్తి మాన్సుచి బుద్ది, ఎత్తి మాన్సుచి పెట్టి తిలిసి ఆవ్ దెకితిసి సికుల, చి తుమ్తె ఎత్తి మాన్సుచ కమొ ఎద తుమ్క తీర్పు జర్గు కెరిందె మెన చినుల.

24 “గని, తుమ్ తుయత్తెరచి నంపజలనతె కో జా వెర్రి సికితిన్తె బెదుస్ నాయ్, అన్నె ‘సయ్తాన్చి గుట్టు’ మెన జేవ్ సగుమ్జిన్ సికయ్తిసి కో సికున్ నాయ్. తుమ్కయ్ కిచ్చో మెంతసి మెలె, తుమ్క కిచ్చో వేర జాడు వయడుక నెసి. 25 గని ఆవ్ అన్నె జెతె ఎదక తుమ్క తిలి ప్రేమ నిదానుమ్, ఆవ్ తుమ్క దిలి కిచ్చో ఆస్తి జలెకి డిట్టుమ్ దెరన. 26 కో జిన ఆకర్ ఎద అంచ కమొ నిదానుమ్ ఇండుల గే, అంక నేన్ల మాన్సుల్చి ఉప్పిరి జోవయింక అదికారుమ్ దెయిందె.

27 జో నిదానుమ్ తిలన గొప్పడుచి ఇనుముడండో దెరన్లి రితి గేడివొ పుట్టయ్ల రితి కెర, అంక నేన్లనచి సెక్తి పాడ్ కెర్లి రితి కెర, జోవయింక ఏలువ కెరుల. దేముడు అబ్బొ కీసి అంకయ్ అదికారుమ్ దా అస్సె గే, దస్సి జో నిదానుమ్ తిలనకయ్ ఆవ్ అదికారుమ్ దెయిందె, 28 చి ముక్కిమ్ జలి పెందలెచి ఒగ్గర్ ఉజిడి దిలి ‡నుక్కొ జోక దెయిందె.

29 “సంగుమ్లక అమ్చి దేముడుచి నుద్ది తిలి ఆత్మ కిచ్చొ సంగితయ్ గే, కంగ్గొ తిలొసా సూన్తు.

3

సార్దీన్ పట్టుమ్చ సంగుమ్చక చి ఉత్తమ్

1 “సార్దీన్ పట్టుమ్చ సంగుమ్చొ దూతక ఇసి మెన రెగుడు.

“దేముడుచ *సత్తు ఆత్మల్ తిలొ †సత్తు సుక్కల్ దెల్లొసా తుమ్క సంగిలిన్ కిచ్చొ మెలె, తుమ్చ కమె ఆవ్ జాని. తుమ్క ‘జివ్వి అస్తి’ మెన మాన్సుల్ ఉచర్తతి, గని తుమ్ మొరయ్ అస్సున్. 2 తుమ్ చెద్దొయ్ జా, చి మొర్లి రితి నే మొర ఇదిలిదిల్ సేనిలితె డిట్టుమ్ కెరన. కిచ్చొక మెలె, తుమ్చ కమె ‘అంక దేముడుచి మొక్కె పూర్తి చెంగిల్చ నెంజిలి’ మెన దెక అస్సి.

3 “జాకయ్, తుమ్క అగ్గె దిలిసి, తుమ్ సూన నంపజిలిసి, గుర్తు కెరన, పొసన, తుమ్చి తప్పు ఒప్పున పెట్టి దుకుమ్ జా తప్పు ముల. తుమ్ ఇసి చెద్దొయ్ నే తిలె, జలె, అవ్ చోర్ రితి జా జెయిందె, చి కేన్ గడియక తుమ్తె జెయిందె గే, తుమ్ నేన్సు.

4 “జలె, ఒత్త సార్దీన్తె తుమ్తె, జోవయించ పాలల్ ముర్కి నే కెరన్లన సంగుమ్జిన్ అప్పెక కి అస్తి. జేవ్, జలె, అంచి పరలోకుమ్చి ఉజిడతె బెదుక జేవ్ ఏలువ మెలి రితి ఆవ్ దెకితసి, చి చొక్కిల పాలల్ గలన అంచి తెన్ ఇండుల. 5 కో దస్సి జినుల గే, దస్సి జోక చొక్కిల పాలల్ దెయిందె, చి గలనుల, చి పరలోకుమ్తె బెదితనచ

‡ 2:28 2:28 డీసయ్లిసి 22:16 దెక. * 3:1 3:1 1:4 చి ఎట్టొచి కోడు దెక. † 3:1 3:1 1:20 చి ఎట్టొచి కోడు దెక.

నవ్వొ ఆవ్ రెగిడ్లి పుస్తకుమ్తె జోచి నావ్ ఆవ్ పుంచి నాయ్. అంచొ అబ్బొ జలో దేముడుచి మొక్కె కి జోచ దూతల్చి మొక్కె కి ‘జోచి నావ్ అస్సె’ మెన ఒప్పన్దె.

6 “సంగుమ్లక దేముడుచి సుద్ది తిలి ఆత్మ ఇన్నెతెన్ కిచ్చొ సంగితయ్ గే, కంగ్గొ తిలొసొ సూన్తు.

పిలదెల్వొయ పట్టుమ్చ సంగుమ్చక చి ఉత్తుమ్

7 “పిలదెల్వొయ పట్టుమ్చ సంగుమ్చొ దూతక ఇని మెన రెగుడు. పరలోకుమ్చి సుద్ది తిలొ, సత్తిమ్ తిలొ, దావీదు రానొచి తాలల్ దెరితొ, జో ఉగిడ్లె కో డంకుక నెత్తిర్తి, జో డంకిలె కో ఉగుడుక నెత్తిర్తి, జో తుమ్క సంగిలిన్ కిచ్చొ మెలె, 8 తుమ్చ కమొ ఆవ్ జాని. ఈందె, తుమ్క ‘పెసుత్’ మెన ఉగ్గి జలి కెడ్లి తుమ్చి మొక్కె ఉగ్గ దా అస్సి. కో జాక డంకుక నెత్తిర్తి. తుమ్క సెక్తి ఒగ్గర్ నాయ్ మెన ఆవ్ జాని. జలెకి, అంచి కోడు నిదానుమ్తె ఇండ అస్సన్, చి అంచి నావ్చి మరియాద్ కడ్లి రితి కెర్పు నాయ్. 9 ఈందె, ‘యూదుల్ అమ్’ మెన అబద్దుమ్క సంగిత, నిజుమ్చ యూదుల్ నెంజిల, సయ్తాన్చి సంగుమ్తె బెదితసక కిచ్చొ కెరిందె మెలె, తుమ్చి చట్టె జేవ్ సెర్పు సేడ్లి రితి జర్గు కెరిందె, చి తుమ్క ఆవ్ ప్రేమ అస్సి మెన జేవ్ జాన్లి రితి కెరిందె.

10 “ఆవ్ సంగిలి రితి తుమ్ నిదానుమ్క ఎత్తి ఒర్పుప జా అస్సన్చి రిసొ, బూలోకుమ్తె జిత మాన్సుల్ ఎత్తిజిన్క పరిచ్చ కెర్తి కాలుమ్చి బాద తుమ్క పిట్టయిందె. 11 ఆవ్ బే బేగి అన్నె జెయిందె. తుమ్క తిలిన్ నిదానుమ్ తెన్, డిట్టుమ్ దెరన; తుమ్చి బవుమానుమ్ కో కి నే ఉర్లితి రితి తా. 12 కో జినుల గే, అంచొ దేముడుచి పరలోకుమ్చి గుడితెచ టీవొ కెల స్తంబుమ్ జేవ్ జతి రితి కెరిందె. జోచి జా దేముడుచి గుడిక జేవ్ కెయ్ ములితి నాయ్. అంచొ దేముడుచి నావ్, పడ్డొ జో అంచొ దేముడుచి పట్టుమ్చి నావ్; మెలె, అంచొ దేముడు తెంతొ పరలోకుమ్ తెంతొ ఉత్త జెతికయ్ నొవి

యెరూసలేమ్ పట్నుమ్చి నావ్; పడ్తో అంచి సొంత నొవి నావ్, జేవ్ జిన్తనచి ఉప్పిర్ రెగిడిందె.

13 “సంగుమ్లక అమ్చి దేముడుచి నుద్ది తిలి ఆత్మ కిచ్చొ సంగితయ్ గే, కంగ్లో తిలొసా సూన్తు.

లవొదికయ పట్నుమ్చ సంగుమ్చక చి ఉత్తమ్

14 “లవొదికయ పట్నుమ్చొ సంగుమ్చొ దూతక ఇసి మెన రెగుడు.

‡ “‘ఆమేన్’ మెలొ, నిదానుమ్ తిలొ, సత్తిమ్ సాచి జలొసా, దేముడు జెర్మయ్లిసి ఎత్కిక ఆదారుమ్ తిలొసా తుమ్క సంగిలిన్ కిచ్చొమెల, 15 “తుమ్చకమొ ఆవ్ జాని. తుమ్ ఉసుమ్ రితి నాయ్, సీడొ రితి నాయ్! తుమ్ ఉసుమ్ తంక అంచి ఆస. నాయ్ మెలె, సీడొ జలె, సీడొ మెనుక జతి. 16 జలె, తుమ్క ఉసుమ్ మెనుక నెంజె, సీడొ మెనుక నెంజె, గని దొన్నిచి నెడిమి తా, ‘చెంగిల్ అస్సుమ్’ మెన దస్సే తత్తసుచి రిసా తుమ్క అంచి చొండి తెంతొ తుంక్త గెలిందె. 17 కిచ్చొక మెలె, ‘సొమ్నారుమ్ జా అస్సుమ్, చెంగిల్ జా అస్సుమ్, చి అమ్క కిచ్చొ కొత్క నాయ్’ మెన తుమ్ ఉచరన్లెకి, ఆత్మక దెకిలె, తుమ్ బాద తెన్, నిస్కారుమ్ జా, బీద జా, గుడ్డి జా, డుమ్డయ్ జా అస్సున్ మెన నేన్సు.

18 “జాకయ్, తుమ్క ఆవ్ కిచ్చొ బుద్ది సంగితసి మెలె, తుమ్ సొమ్నారుమ్ జతి రితి, అంచి ఆగితె డయ్ పూర్తి చెంగిల్ కెల్లి బజరి గెనన. తుమ్ డుమ్డయ్ తతిసి నే డీస్తి రితి గలనుక మెన ఆవ్ దెత చొక్కిల పాలల్ గెనన, చి తుమ్చ అంకివొ చెంగిల్ జా డీస్తి రితి, కాటిక అంచితె గెనన. 19 ఆవ్ కక్క ప్రేమ అస్సి గే, జోచి తప్పుల్చి రుజ్జు దెకవ, ‘సమయుమ్ తెన్ని బుద్ది జతు’ మెనయ్ సిచ్చ దెతసి. జాకయ్, చెంగిల్ జంక ఆస జా, తుమ్చ తప్పుల్ ఒప్పున, పెట్టి దుకుమ్ జా, జా తప్పుల్ ముల. 20 ఈందె, తుమ్చి కెప్పి ఇత్తల్తో ఆవ్ టీవొజ పెట్టసి. తుమ్తె కో అంచి అవాడ్ సూన కెప్పి ఉగుడుల గే, జోచి తెడి జా పెన జెయిందె, చి జో తెన్ అన్నిమ్ కయిందె, చి జో అంచి తెన్

‡ 3:14 3:14 మెలె, సత్తిమ్ కెల్లి, నిజుమ్ తిలొ, ఎత్కి జగ్గు కెల్లిసా.

అన్నిమ్ కయెదె. ²¹కో జీనుల గే, ఆవ్ కీసి జీన కెర అంచో అబ్బొ జలో దేముడుచి సింగాసనుమ్తె జో తెన్ బెద వెస అస్సి గే, దస్సి, జేవ్ అంచి తెన్ అంచి సింగాసనుమ్తె వెసుక మెన, వరుమ్ దెయిందె.

²² “సంగుమ్లక అమ్చి దేముడుచి సుద్ది తిలి ఆత్మ కిచ్చొ సంగితయ్ గే, కంగ్గొ తిలొసా సూన్తు.”

4

పరలోకుమ్తె సిజాసనుమ్

¹ ఇన్నెచి పడ్డె ఆవ్ దెకిలయ్, పరలోకుమ్తె పెసితి కెచ్చి ఉగ్గి జా అస్సె! అన్నె, అగ్గె తొలితో ఆవ్ సూన్ల * అవాడ్ నప్పిర్మూరిచి అవాడ్చి రితి ఎక్కిలోచి అవాడ్, అంక, “ఇత్తల్ వెగ జే, చి ఇన్నెచి పడ్డొక కిచ్చొ జర్గు జంక అస్సె గే, తుక దెకయిందె” మెన సంగిలన్.

² సంగిల్ బేగి, దేముడుచి యేసుచి ఆత్మసెక్కిక ఒత్త పరలోకుమ్తె తిలయ్, ఒత్త ఏక్ సిజాసనుమ్ అస్సె, చి సింగాసనుమ్తె ఎక్కిలో వెస అస్సె! ³ జో ఒత్త వెసిలొసా కీసి డీసిలన్ మెలె, వజ్రుమ్చి రితి చొకు, చి రితి ఎరన ఉజిడి లగిలన్, చి సిజాసనుమ్చి సుట్టునంత పచ్చన రంగుచి దూన్చి ఉజిడి లగితె తిలి.

⁴ జా సింగాసనుమ్చి సుట్టునంత అన్నె విస్సెక్ చెత్తర్ సిజాసనల్ తిల, చి జేవ్ సిజాసనల్ ఎక్కికతె విస్సెక్ చెత్తర్జిన్ చొక్కిల పాలల్ గలన్ల, బోడి బజర్చ కిరీటల్ గలన్ల, విస్సెక్ చెత్తర్జిన్ వెల్లెల మాన్సుల్ వెస అస్సి. ⁵ జా సిజాసనుమ్ తెంతో బిజిలి మొల్కితయ్, చి అవాడ్లుచి ఉర్ముల్చి అవాడ్ జెతయ్. సింగాసనుమ్చి పుర్రెతో వత్తివొచ సత్తు దివ్వొ లగితతి. జేవ్ దివ్వొ దేముడుచి † సత్తు ఆత్మల్.

⁶ పడ్డె సిజాసనుమ్చి పుర్రెతో గాజుచి రితి టేంటచి సముద్రుమ్ తిలి. పడ్డె సింగాసనుమ్చి సుట్టునంత, జేవ్చ చెత్తర్ పక్కలె, చెత్తర్ జివుల్ తిల. ఏక్ పక్క ఏక్ జివు. జోవయింతె బెర్తు అంకివొ, ముకొమ్ పక్క పడ్డె పక్క కి తిల. ⁷ తొలితోచొ జివు కీసాచొ మెలె, సింవుమ్చొ

* 4:1 4:1 1:10 దెక † 4:5 4:5 ఎత్కి అదికారుమ్ తిలొ దేముడుచి సుద్ది తిలి ఆత్మక ఈంజ టాలి జతయ్. 1:4చి ఎట్టొచి చి కొడొ దెక.

రితో. అన్నెక్ జీవు వస్సొ పిల్లచొ రితో, అన్నెక్ జీవుక మాన్సుచి మొకొమ్ చి, అన్నెక్ జీవు ఉడ్డితో గిడ్డుచొ రితో డిసిలన్. ⁸ జేవ్ చెత్తర్ జీవుల్ ఎత్కిక, ఏక్ ఏక్ జీవుక సొవు రెప్పల్ తిల, అన్నె, ఉప్పిరి కి, జోవయించి రెప్పల్ తెడి కి బెర్తు అంకివొ తిల, చి రాతి మెద్దెనె కిచ్చొ గనుమ్ గాయుక ముల్తి నాయ్ మెలె,

“ఎత్కిచి ఉప్పిరి అదికారుమ్ తిలో దేముడు, అగ్గె తిలోసొ, అప్పె తతోసొ, కెయఱ తెయఱ తంక తిలోసొ, ఎత్కి సుద్ది తిలోసొ, ఎత్కి సుద్ది తిలోసొ, ఎత్కి సుద్ది తిలోసొ!” మెన గాయితె తత్తతి. ⁹ పడ్డొ, సింగాసనుమ్తె వెసిలో కెయఱ తెయఱ జితొసొక జేవ్ చెత్తర్ జీవుల్ కెయఱ గవురుమ్, మరియాద దెతతి, కెయఱ జో కెర్లి దయక జోచి సర్ద సంగితె తతి పొది, ¹⁰ విస్సెక్ చెత్తర్జిన్ జేవ్ వెల్లెల మాన్సుల్ సింగాసనుమ్తె వెసిలోసొచి చట్టె సెర్ను నేడ, జేవ్ కెయఱ తెయఱ జితొసొక జొకర్తతి. సిజాసనుమ్చి పురైతో జోవయించ కిరిటల్ తియ దా గనుమ్ గాయితతి.

¹¹ “తుయి అమ్చొ ప్రబు, అమ్చొ దేముడు విలువతిలోసొ గవురుమ్, మరియాద, అదికారుమ్ తుక కలుగు జంక. కిచ్చొక మెలె, ఎత్కిక కి తూయి జెర్మయ్లది, చి ఇసి జర్గు జంక తుచి ఇస్టుమ్ జా, జేవ్క జెర్మయ్లది.” మెన గాయితె తత్తతి.

5

సుట్టుప కెర్లి పుస్తకుమ్ మెండపిల్ల నదు కెర్లిసి

¹ పడ్డొ కిచ్చొ దెకిలయ్ మెలె, సిజాసనుమ్తె వెన తిలోసొచొ ఉజిల్ అత్తి సుట్టుప కెర్లి పుస్తకుమ్ దెకిలయ్. జా పుస్తకుమ్చి తెడి, ఉప్పిరి కి రెగిడ్లిన్ తిలి. చి కో ఇస్టుమ్ అయ్లి రితి జా సుట్టుప కెర్లి పుస్తకుమ్ నే ఉగుడుక మెన, సత్తు ముద్దల్ తెన్ ముద్ద గెల తిల. ² తెదొడి కిచ్చొ దెకిలయ్ మెలె, డిట్టుమ్చొ దూత ఎక్కిలో గట్టిజ అవాడ్ కెరన కిచ్చొ మెన సాడుప కెర్లన్ మెలె, “ఈంజ సుట్టుప కెర్లి పుస్తకుమ్చ ముద్ద కడ ఉగుడుక తగువ జలోసొ కో?” మెన కేక్ గల్లో. ³ గని సుట్టుప కెర్లి జా

పుస్తకుమ్ ఉగుడుక జలెకు, ఒత్త తిలిసి దెకుక జలెకు, బూలోకుమ్తె కి పరలోకుమ్తె కి, బూలోకుమ్క ఎట్టో లోకుమ్తె కి తగుప జలొసా కో కి డీసె నాయ్ చి రిసా, ⁴ ఆవ్ ఏడ గెలయ్; జా సుట్టుప కెర్లి పుస్తకుమ్ ఉగుడుక కి ఒత్త తిలిసి దెకుక కో తగుప జలొసా డీసె నాయ్ చి రిసా. ⁵ తెదొడి, ఒత్తచ వెల్లెల మాన్సుల్తె ఎక్కిలో అంక, “ఏడు నాయ్. ఈందె, యూదా పూర్గుమ్చొచి సెకుమ్తె జెర్మిలో వెల్లో సింవుమ్ జలొ రితొసా, దావీదుచి సెకుమ్తెచి చేరుతె బార్ జలొసా, జిన అస్సె, చి సుట్టుప కెర్లి జా పుస్తకుమ్ ఉగుడుక, చి జేవ్ నత్తు ముద్దల్ కడుక జో తగుప జా తిలొసా” మెన సంగిలన్.

⁶ తెదొడి, జా సింగాసనుమ్క చి జేవ్ *చెత్తర్ జివుల్క చి జేవ్ విస్సెక్ చెత్తర్జిన్ వెల్లెల మాన్సుల్చి నెడ్మె ఏక్ †మెండపిల్ల టీవోజ తిలిన్ దెకిలయ్. కిసా తిలొ మెలె, అర్పితుమ్క కండయ్ జలి రితి జా తిలన్, చి జోక నత్తు కొమ్ముల్ చి నత్తు అంకివొ తిల. ఈంజేవ్ కిచ్చొ జవుల మెలె, దేముడు ఒండి బూలోకుమ్తె తెద్రయ్ల జోచ ‡నత్తు ఆత్మల్. ⁷ జా మెండపిల్ల, జలె, పురె జా, జా సింగాసనుమ్తె వెస తిలొసాచి ఉజిల్ అత్తి తెంతొ సుట్టుప జలి జా పుస్తకుమ్ నజిలన్. ⁸ సుట్టుప జలి జా పుస్తకుమ్ నజితికయ్, జేవ్ చెత్తర్ జివుల్, జేవ్ విస్సెక్ చెత్తర్జిన్ వెల్లెల మాన్సుల్, జా మెండపిల్లచి మొక్కె సెర్ను సేడ్ల. జేవ్ ఎత్కిజిన్తె ఎత్కి సుదల్ కిచ్చొ దెర తిలొ మెలె, ఎక్కిక్ వీనెల్, చి బజర్చ గిన్నలు. జేవ్ గిన్నల్తె కిచ్చొ తిలి మెలె, బెర్తు దూపుమ్ తిలి. జా దూపుమ్చి అర్దుమ్ కిచ్చొ మెలె, ప్రబుచ సొంత జల మాన్సుల్చ ప్రార్దనల్. ⁹ తెదొడి జేవ్ ఏక్ నొవి గనుమ్ గాయిల.

“ఈంజ సుట్టుప జలి జా పుస్తకుమ్ నజ, జేవ్చి ముద్ద కడుక తూయి

తగుప జలొసా!

కిచ్చొక మెలె, తూయి అర్పితుమ్ జా మొర,

దేముడుచ జా గెతు మెన

తుచి నూయి జలి లోయి తెన్ మాన్సుల్క అన్నె గెనన్దె.

* 5:6 5:6 4:6-8 దెక. † 5:6 5:6 యోహాను 1:29, 36. ‡ 5:6 5:6 1:4చి ఎట్టొచచి కొడొ దెక.

జేవ్ మాన్సుల్క ఎత్తి, సెకుమ్ తెంతో, ఎత్తి బాసల్ తెంతో,
ఎత్తి పైజల్ తెంతో, ఎత్తి రాజిమ్ తెంతో గెనన, జోవయింక

10 ‘అమ్చో దేముడుచి రాజిమ్తెచ రాసల్ జేవ్ జా
జోవయింక పూజర్లు జతు’ మెన, జర్గు కెర అస్సిసి,
చి బూలోకుమ్చి ఉప్పిరి జేవ్ ఏలుప కెరుల.”

మెన గనుమ్ గాయిల.

11 పడ్తో అన్నె దెకిలయ్, చి సింగాసనుమ్చి, జేవ్ జీవుల్చి,
వెల్లో మాన్సుల్చి సుట్టునంత కిచ్చొ సూన్లయ్ మెలె, ఒగ్గర్ ఒగ్గర్
దూతల్చ, వెయిలుచి ఉప్పిరి వెయిలు, కోట్లుచి ఉప్పిరి కోట్లుచ
దూతల్చ అవాడ్లు సూన్లయ్. 12 గట్టిజ అవాడ్ కెరన కిచ్చొ మెన కేక్
గెల్తె తిల మెలె,

“అర్పితుమ్ జలో ఈంజో మెండపిల్ల జతోసా జలె,

అదికారుమ్, సామ్సారుమ్, గ్యానుమ్, సెక్తి,

మరియాద, గవురుమ్, చి మాన్సుల్ జోచి గవురుమ్ గాయితిసి

జోకయ్ కలుగు జంక జొయ్యి తగుప జలోసా!”

మెన కేకుల్ గెల్తె తిల. 13 పడ్తో పరలోకుమ్తెచ, బూలోకుమ్తెచ, చి

బూలోకుమ్క ఎట్టో లోకుమ్తెచ, చి సముద్రుమ్తెచ, జేవ్ చెత్తర్తెచ

ఎత్తి జీవు ఎత్తి వస్తువ కేక్ గలిసి కిచ్చొ మెన సూన్లయ్ మెలె,

“సింగాసనుమ్తె వెసిలోసాచి, చి మెండపిల్లచి గవురుమ్ ఎత్తి

కెయెక తెయెక గాయుతు!

మరియాద గవురుమ్, అదికారుమ్ ఎత్తి జోక కలుగు జవున్,

జోక కెయెక తెయెక తవున్!”

మెన కేక్ గెల్తె తిలిసి సూన్లయ్. 14 తెదొడి, “కీఆమేన్!” మెన జేవ్

చెత్తర్ జీవుల్ సంగిల, చి వెల్లెల మాన్సుల్ సెర్ను సేడ సింగాసనుమ్తె

వెసిలోసాక చి మెండపిల్లక జోకర్ల.

6

సుట్టుప కెర్లి పుస్తకుమ్చ సత్తు ముద్దల్

§ 5:14 5:14 ఎబ్రి బాస తెన్ ‘ఆమేన్’ మెనుల.

1 తెదొడి కిచ్చొ దెకిలయ్ మెలె, మెండపిల్ల జేవ్ సత్తు ముద్రల్తె తొలితొ చి కడ్లన్, చి జేవ్ *చెత్తర్ జివుల్తె ఎక్కిలో, ఉర్ముల్చి రితి అవాడ్ కెరన “ఇన్నె జే!” మెలన్. 2 ఆవ్ దెకిలె, ఆదె! చొక్కిలో గోడొ డీసిలి, చి జా గోడొతె వెగిలోసాక దూన్ తిలి, చి జోక ఏక్ కిరీటుమ్ †దిల, చి బార్ జా, యుద్దుమ్ కెర జిన, ఒండి జినుక మెన గెలో.

3 జలె, మెండపిల్ల దొన్నిచి ముద్ర కడ్డికయ్, కిచ్చొ సూన్లయ్ మెలె, జేవ్ చెత్తర్ జివుల్తె అన్నెక్ జివు “ఇన్నె జే!” మెన కేక్ గలన్, చి 4 అన్నెక్ గోడొ; ఒగ్గర్ ఎరనచొ; బార్ జలన్. జా గోడొతె వెగిలోసాక కిచ్చొ సెలవ్ తిలి మెలె, ఒండి బూలోకుమ్తెచి సేంతుమ్ పిట్టవుక; మాన్సుల్ ఎక్కిలోక ఎక్కిలో మార్తి రితి; చి వెల్లి కండా జోక ‡దిల.

5 జలె మెండపిల్ల తిన్నిచి ముద్ర కడ్డికయ్, తిన్నిచొ జివు “ఇన్నె జే!” మెన కేక్ గలిసి సూన్లయ్. ఆవ్ దెకిలె, ఆదె! నీడొ గోడొ, చి జాతె వెగిలోసాచి అత్తి తక్కిడి అస్సె. 6 అన్నె, జేవ్ చెత్తర్ జివుల్చి నెడమె తెంతొ ఏక్ అవాడ్ కిచ్చొ సంగిలిసి సూన్లయ్ మెలె, “ఏక్ దీసిచి కూలిచి ఎదిలి డబ్బుల్క ఎక్కి, పాత్రెక్ గోదుమ్, చి ఏక్ దీసిచి కూలిచి ఎదిలి డబ్బుల్క తిని పొర్ని కీబార్లి దాన్ దొర్కు జయెదె. గని తేలుక చి ద్రాచ రస్సుమ్క గార్ కెరుక నాయ్!” మెన జా అవాడ్ కేక్ గలన్.

7 మెండపిల్ల చెత్తర్చి ముద్ర కడ్డికయ్, “ఇన్నె జే!” మెన చెత్తర్చొ జివు కేక్ గలిలిసి సూన్లయ్. 8 అన్నె దెకిలయ్, చి ఆదె! కిచ్చొ రంగుగె సంగుక నే బెదిలిసి రితొ ఏక్ గోడొ. జాతె వెసిలోసాచి నావ్, ‘మొర్ను’, చి మొర్లన్క రకితి లోకుమ్ జోచి పట్టి గెతయ్. అన్నె,

* 6:1 6:1 4:6-8 దెక. † 6:2 6:2 జా కిరీటుమ్ ఎత్తి అదికారుమ్ తిలో దేముడు సొంత జో గోడొతె వెగిలోసాక దిలన్ గే మెండపిల్ల జలొ యేసు దిలన్ గే, కచిగె అత్తి జోవయింక దావడ్ల గే, గని జా జగ్గు జంక ఎత్తి అదికారుమ్ తిలో దేముడు కచితుమ్ సెలవ్ దా తిలన్, నెంజలె జగ్గు జతి నాయ్. ఈంజేవ్ కమె ఎత్తి జొయ్యి జగ్గు కెర్తయ్, గెద. ‡ 6:4 6:4 కో

దిల గే నేనుమ్. § 6:6 6:6 ఈంజ దేసిమి కిసి ముక్కిమ్క చింబొ కవుల గే, జా దేసిమ్చ ముక్కిమ్క గోదుమ్క కెర్లి పొడియొ గే పొడియొ గే రంద దనచక అన్నిమ్ కెరుల. గని కారు తిలె, ఎత్తి కరీది జా గెలె, ఈంజ దేసిమి కిసి తందుడ్చి కంట డేరొ తొక్కి కరీది జయెదె, చి చింబొ నెంజలె కులర్ కవుల గే, దస్సి జా దేసిమి గారు తిలె, బార్లి దాన్క అన్నిమ్ రందుల; గెనుక సవుక ఒత్తచి రిసా.

‘మొర్ను’ మెలోసాక చి మొర్లన రకితి లోకుమ్ కిచ్చొ సెలవ్ తిలి మెలె, యుద్దుమ్ వాట్, కకుర్తి వాట్, జబ్బుల్ వాట్ చి డొంగెచ జంతువుల్ గెతి వాట్ మాన్సుల్ క మార్తి సెలవ్ తిలి. ఒండి లోకుమ్ క చెత్తర్ వాటల్ తిలె, జేవ్ చెత్తర్ వాటల్ తె ఏక్ వాటతె మాన్సుల్ క దస్సి మారుక సెలవ్ జా తిలి.

⁹ మెండపిల్ల పాచ్ చి ముద్ద కడ్డికయ్, పరలోకుమ్ తెచి బలి దెతి టాన్ చి తెడి కిచ్చొ దెకిలయ్ మెలె, విరోదుమ్ మాన్సుల్ మార్లనచ జివుల్ క దెకిలయ్. దేముడు చి సుబుమ్ కబుర్ జేవ్ సూనయ్ లి రిసా, చి యేసు చి రిసా జేవ్ సాచి సంగిలి రిసా, జేవ్ విరోదుమ్ మాన్సుల్ జోవయింక మార తిల. ¹⁰ జేవ్ దస్సి మొర్లనచ జివుల్ గట్టిజ అవాడ్ కెరన కిచ్చొ మెన కేక్ గల మెలె, “ఎత్కి చి ఉప్పిరి అదికారుమ్ తిలొ ప్రబువ, తుయి ఎత్కి సుద్ది తిలొసా, నిజుమ్ తిలొసా, బూలోకుమ్ తె జితన అమ్ క మార అమ్ చి లోయి సువెలి రిసా కెయ్ డ జోవయింక సిచ్చ కెర్తె గే?” మెన కేక్ గలిల. ¹¹ తెదొడి జోవయింతె ఎత్కి మాన్సుల్ క చొక్కిలొ పాలల్ *దా, కిచ్చొ మెల మెలె, “అన్నె ఇదిల్ రక. మాన్సుల్ తుమ్ కయ్ కిసి మార్ల గే, దస్సి, తుమ్ చ బావుడ్లు జత ప్రబుచ అన్నె సేవ కెర్తనక మారుల. జేవ్ దస్సి మొర్లన ఎత్కి జిన్ చి లెక్క బెర్తె ఎదక రక, చి తుమ్ క, జోవయింక మార్లనక సిచ్చ దెయెదె” మెన జబాబ్ దిలన్.

¹² మెండపిల్ల సొవ్వుచి ముద్ద కడ్డికయ్, ఆదె! వెల్లి బూకంపుమ్ జలి. పడ్డొ పొద్దు నీడిచి కంట నీడి జా గెలి, చి ఒండి జోను లోయి రంగు జా గెలి. ¹³ ఆగాసుమ్ చ సుక్కలు బూలోకుమ్ తె సేడ్ల. వెల్లి వాదు కెర్లె † అంజూరుమ్ రూక్ చ చల్లి పొదిచ కాయల్ కిసి జేడ గెచ్చుల గే, దస్సి జేవ్ సుక్కల్ జేడ గెల. ¹⁴ పడ్డొ, కేన్ జవున్ పుస్తకుమ్ ముద్దొ కెర్లె కిసి జయెదె గే, దస్సి, ఆగాసుమ్ ముద్దొ జా డీసె నాయ్, చి జోవయించ జోవయించ టాన్లు తెంతొ ఎత్కి డొంగ్రల్, ఎత్కి డిబ్బ ఒత్త తెంతొ గెలి.

* **6:11** 6:11 పాలల్ కో దిల గే, కో ‘రక’ మెల గే నేనుమ్, గని ఎత్కి అదికారుమ్ తిలొ దేముడు జర్గు కెరవ తయెదె మెన జానుమ్. † **6:13** 6:13 అంజూరుమ్ పండ్లు బొడ్డ పండ్లు చ రిత కాయల్ జవుల.

15 తెదొడి బూలోకుమ్చ రానలు, ముక్కిమ్చ వెల్లెల మాన్సుల్, జమాన్సుచ అదికారుల్, సొమ్మార్లు, బలుమ్ సెక్తిచ మాన్సుల్, ఎత్కి మాన్సు, గొతిమాన్సు జలెకి, గొతి నెంజిలన జలెకి, డొంగైచ పరొతె, రంగ్గి బొరల్తె లుంక తవుల. 16 జేవ్ డొంగల్, జేవ్ రంగ్గి పత్తల్క కిచ్చొ మెన కేకుల్ గలిల మెలె, “సింగాసనుమ్తె వెసిలోసా అమ్క నే దెకిత్ రితి, అమ్చి ఉప్పిరి సేడ. మెండప్పిల్చి కోపుమ్చి సిచ్చ అమ్క నే లయితి రితి అమ్క లుంకడ. 17 జోచి కోపుమ్చి సిచ్చచి వెల్లి దీసి జా అస్సె, చి జా సిచ్చచి సెక్తిక అమ్ టీవ్క నెత్తుమ్” మెన కేక్ గల సంగిల.

7

దేముడుచ సేవ కెర్తనక తోడు తతి ముద్ర

1 ఇన్నెచి పడ్తో కిచ్చొ దెకిలయ్ మెలె, బూలోకుమ్చ చెత్తర్ పక్కలె చెత్తర్ దూతల్ టీవోజ తా, చెత్తర్ దిక్కుల్చి వాదు దెర, కేన్ వాదు బుయ్యె కి సముద్రుమ్తె కి, కేన్ రూక్తె కి నే వీర్తి రితి అడ్డు కెర్తతి. 2 తెదొడి, పొద్దు బార్ జతి పక్క తెంతొ అన్నెక్ దూత, ఉప్పిర్ జెంక, జీవ్ తతో జీవ్ దెతో దేముడుచి ముద్ర గల్తి బిల దెర తా వెగ గెతిసి దెకిలయ్. గట్టిజ అవాడ్ కెరన, బూలోకుమ్క సముద్రుమ్క అల్లర్ కెరుక మెన సెలవ్ తిల జేవ్ చెత్తర్ దిక్కుల్చి వాదు దెర్త చెత్తర్ దూతల్క, 3 “అమ్చొ దేముడుచ సేవ కెర్తన ఎత్తిజిన్చ నిర్దెలె జోచి ముద్ర గల్తె ఎదక, బుయ్యెక, సముద్రుమ్క, రుకాలె కిచ్చొ అల్లర్ కెర నాయ్!” మెన కేక్ గల్లో.

4 పడ్తో, జీవ్ తిలో జీవ్ దెతో దేముడుచి ముద్ర జోవయించ నిర్దెలె గలంతన కెత్తిజిన్ జవుల గే, సూన్లయ్. కెత్తిజిన్ మెలె, పుంజెక్ దొన్ని విసా చెత్తర్ వెయిల్జిన్ జోచి ముద్ర గలంతన జవుల. కేనె కేనెచ మెలె,

అమచ * ఇస్రాయేలులుచ ఎత్కి సెకుమ్లుతె బెదిలస. ⁵ యూదాచి సెకుమ్తె బార వెయిల్ జిన్క, రూబేనుచి సెకుమ్తె బార వెయిల్ జిన్క, గాదుచి సెకుమ్తె బార వెయిల్ జిన్క, ⁶ ఆసేరు సెకుమ్తె బార వెయిల్ జిన్క, నప్తాలిచి సెకుమ్తె బార వెయిల్ జిన్క, మనస్సేచి సెకుమ్తె బార వెయిల్ జిన్క, ⁷ సిమ్యోనుచి సెకుమ్తె బార వెయిల్ జిన్క, లేవీచి సెకుమ్తె బార వెయిల్ జిన్క, ఇస్సాకారు సెకుమ్తె బార వెయిల్ జిన్క, ⁸ జెబులూనుచి సెకుమ్తె బార వెయిల్ జిన్క, యోసేపుచి సెకుమ్తె బార వెయిల్ జిన్క, చి బెన్యామీను చి సెకుమ్తె బార వెయిల్ జిన్క జో జోచి ముద్ద గల తయెది.

ప్రబుచయ్ జల మాన్సుల్ జోచి గవురుమ్ సంగిలిసి

⁹ ఇన్నెచి పడ్డొ అన్నె దెకితె తిలె, ఆదె! కేన్ మాన్సు లెక్క కెరుక నెతిరి జనాబ్ ఒత్త తిల. ఎత్కి రాజిమ్ తెంతో, ఎత్కి సెకుమ్ తెంతో, ఎత్కి పైజల్ తెంతో, ఎత్కి బానల్ తెంతోచ జా తా, సింగాసనుమ్చి పురైతో, చి మెండపిల్లచి పురైతో టీవోజ తా, చొక్కిల పాలల్ గలన అస్సి, చి జోవయించ అత్తిలె కజురుమ్ రూక్చ మట్టల్ దెరన తా, ¹⁰ గట్టిజ అవాడ్ కెరన, “మాన్సుచి రచ్చన దేముడుతెయి చి మెండ పిల్లతెయి అస్సె!” మెన కేక్ గల్ల.

¹¹ అన్నె, సింగాసనుమ్చి సుట్టునంత, విస్సెక్ చెత్తర్ జిన్ వెల్లెల మాన్సుల్చి సుట్టునంత, †చెత్తర్ జివుల్చి సుట్టునంత దూతల్ ఎత్కి టీవోజ తా, జోచి మొక్కె సెర్ను సేడ కిచ్చొ మెన సంగ దేముడుక జొక్కర్ల మెలె,

¹² “అమేన్!‡

మాన్సుల్ జోచి గవురుమ్ గాయితిసి, గవురుమ్, గ్యానుమ్,

* **7:4** 7:4 బయ్బిల్తె ‘ఇస్రాయేలులు’ మెలె, మాములుమ్ యూదుల్చి రిసా ‘ఇస్రాయేలులు’ మెనుల, పడ్డొ యూదుల్ నెంజిలనతె కో యేసుక నంపజతతి గే, జోవయింక కి ‘అమచ ఇస్రాయేలులు’ మెన ఎత్కి అదికారుమ్ తిలో దేముడు దెకితయ్. జేక ఇన్నె ‘ఇస్రాయేలులు’ మెలె, ప్రబుక నంపజలన మొత్తుమ్క టాలి జతయ్. ‘పుంజెక్ దొన్ని విసా చెత్తర్ వెయిల్ జిన్’ మెలి నంబర్చి అర్దుమ్ కిచ్చొ మెలె, ‘పూర్తి జలిసి’, ‘మొత్తుమ్ నంపజలనచి లెక్క పూర్తి జలిసి’; టాలి జతయ్. † **7:11** 7:11 4:6-8. ‡ **7:12** 7:12 ఎట్టి బాన తెన్ ‘అమేన్’ మెనుల.

జోచి దయచి రిసా, మాన్సుల్ జోచి సర్ద సంగితిసి,
మరియాద దెకితిసి, సెక్తి అన్నె అదికారుమ్ ఎత్కి
అమ్మచొ దేముడుక కలుగు జవున్
కెయఁక తెయఁక నే పిట్ట జోక తవున్!
అమేన్!”
మెన కేక్ గల్ల.

ఒగ్గర్ బాదల్తె ప్రబుచయ్ జల మాన్సుల్ జిన్నిసి

13 తెదొడి వెల్లెల మాన్సుల్తె ఎక్కిలో అంక పుసిలన్. “ఈంజేవ్ చొక్కిల పాలల్ గలన తిలన కొన్న? కేనె తెంతో జా అస్తి?” 14 జాకయ్ కిచ్చొ మెలయ్ మెలె, “బాబు, తుయి జాన్సి” మెలయ్, చి జేవ్, “ఒగ్గర్ అల్లర్ జంక తిలి జా వెల్లి బాదతె తెంతో జీన అయ్లన. ఈంజేవ్, మెండపిల్లచి లోయితె జోవయించ పాలల్ కేడన చొకు కెరన అస్తి. 15 జాకయ్, జేవ్ దేముడుచి సింగాసనుమ్చి మొక్కె అస్తి, చి రాతి మెద్దెనె జోచి దేవులుమ్తె జోచి సేవ కెరె తత్తతి. అన్నె, సింగాసనుమ్తె వెసిలోసా జోవయింక జోతె రక రక, జేవ్ కిచ్చొ అల్లర్ నే జతి రితి జోచి నీడతె డంకెదె, 16 జోవయింక అప్పె తెంతో కెయఁక కి చూ కెరె నాయ్. తాన్ కెరె నాయ్. ఒప్పుడక సుకా గెతి నాయ్, కేనెచి ఒగ్గర్ తాత్ లయె నాయ్. 17 కిచ్చొక మెలె, సింగాసనుమ్చి నెడిమి తెంతో మెండపిల్ల జోవయింక గొవుడు జా రకెదె, చి జీవ్ దెత పానివొ దెకవ పియడెదె. అన్నె, జోవయించ అంకివొతె ఆసునొ పూర్తి పుంచ గెలెదె.” మెన జో వెల్లొ మాన్సు సంగిలన్.

8

సుట్టుప కెర్లి పుస్తకుమ్చి ఆకర్చి ముద్ద మెండపిల్ల కడ్డిసి

1 మెండపిల్ల సత్తుచి ముద్ర కడ్డికయ్, రమారమి అర గంట ఎద పరలోకుమ్తె కిచ్చి అవాడ్ నాయ్. 2 పడ్డో, దేముడుచి మొక్కె టీవోజ తిల సత్తు దూతల్క దెకిలయ్. జోవయింక ఎక్కెక్ నప్పిర్మూరివో *దిల.

3 తెదొడి అన్నెక్టో దూత జా కెర, బజర్చి గిన్న దెరన బలి దెతి టాన్చి పురై టీవో జలన్. చి 'ప్రబుచయ్ జల మాన్సుల్చ ప్రార్దనల్ తెన్ బెదున్' మెన, సింగాసనుమ్చి పురైతోచి బలి దెతి టాన్చి జేవ్చి దుమ్మొ ఉడ్డితి రిసా జో దూత డయిక మెన, జోక్ ఒగ్గర్ దూపుమ్ †దిల. 4 చి దేముడుచి మొక్కె పాచితి రితి, జోవయించయ్ జల మాన్సుల్చ ప్రార్దనల్ తెన్ జా దూపుమ్చి దుమ్మొ బెద, జో దూతచి అత్తి తెంతో ఉడ్డ దేముడుచి మొక్కె గెలి.

5 తెదొడి జో దూత జా దూపుమ్ డయితి గిన్న దెరన, బలి దెతి టాన్చి ఉప్పిర్చి ఆగి ఇంగుడ్లు సగుమ్ ఒత్త బెరవ కెర, బూలోకుమ్చి ఉప్పిరి గల దిలన్, చి ఉర్ముల్ కెర్లి, అవాడ్లుచి అవాడ్ అయ్లి, బిజిలి మొల్కలి, చి బూకంపుమ్ జలి.

సత్తు నప్పిర్మూరివోతె ఏక్ చెత్తర్ వర్స తెన్ పుజిలిసి

6 తెదొడి సత్తు నప్పిర్మూరివో దెర్ల సత్తుజిన్ దూతల్ జేవ్ నప్పిర్మూరివో పుజుక తెయార్ జల. 7 తొలితోచో దూత జోచి నప్పిర్మూరి పుజిలన్, చి కిచ్చి తెదొడి బార్ జలి మెలె, లోయి తెన్ కలొయ్ జలి కరవత్తల్ చి ఆగి సేడ, బుయ్యె నూయి జలి, చి ఒండి బూలోకుమ్తెచి తిన్ని వాటల్తె ఏక్ వాట పూర్తి ఉడ్డ గెలి, చి రూక్చ తిన్ని వాటల్తె ఏక్ వాట పూర్తి ఉడ్డ గెల, చి చివ్వర్ ఎత్కి ఉడ్డ గెలి.

8 తెదొడి దొన్నిచో దూత జోచి నప్పిర్మూరి పుజిలన్, చి వెల్లి డొంగ్రు జతి రితిసి, ఆగిక ఉడ్డ కెర, సముద్రుమ్తె గలి జలి. 9 అన్నె, ఒండి సముద్రుమ్చి తిన్ని వాటల్తె ఏక్ వాట లోయి జా: గెలి.

* **8:2** 8:2 ఎత్కి అదికారుమ్ తిలొ దేముడు దిలన్ గే, మెండపిల్ల జలొ యేను దిలన్ గే, కచెగి అత్తి జోవయింక దొవడ్ల గే, గని జేవ్ నప్పిర్లు జోవయింక తంక కచితమ్ ఎత్కి అదికారుమ్ తిలొ దేముడుచి నెలవ్ జా తయెదె. † **8:3** 8:3 కో దిల గే నేనుమ్.

సముద్రమతెచి జీవుల్చ తిన్ని వాటల్చ ఏక్ వాట మొర గెల, చి ఓడల్ మొత్తుమ్చ తిన్ని వాటల్తె ఏక్ వాట నాసెనుమ్ జాఁ గెల.

10 తెదొడి తిన్నిచొ దూత జోచి నప్పిర్మూరి పుజిలన్, చి పరలోకుమ్ తెంతొ వెల్లో సుక్కొ సేడ, వత్తిచి దీవు లగిలి రితి జా, ఒండి బూలోకుమ్చ గడ్డొచ తిన్ని వాటల్తె ఏక్ వాట గడ్డొతె చి ఊటల్తె సేడ్లన్. 11 జో సుక్కొచి నావ్ ‘‡కోడు వాసెన’, చి ఒండి బూలోకుమ్చ పానివొక తిన్ని వాటల్తె ఏక్ వాట కోడ్ జా గెల. జా కోడు తిలొ పాని పిలి రిసా, ఒగ్గర్జిన్ మాన్సుల్ మొర గెల.

12 తెదొడి చెత్తర్చొ దూత జోచి నప్పిర్మూరి పుజిలన్, చి పొద్దుక తిన్ని వాటల్తె ఏక్ వాటక, జోనుచ తిన్ని వాటల్తె ఏక్ వాటక, చి సుక్కల్చ తిన్ని వాటల్తె ఏక్ వాటక దెబ్బ లయిలి. జోవయించి ఉజిడి అందర్ జా గెలి. ఒండి మెద్దెన్చ తిన్ని వాటల్తె ఏక్ వాటక పొద్దుచి ఉజిడి లగె నాయ్, చి ఒండి రాతిచ తిన్ని వాటల్తె ఏక్ వాటక జోనుచి సుక్కల్చి ఉజిడి లగె నాయ్.

13 తెదొడి ఆవ్ అన్నె దెకిలయ్, చి కిచ్చొ సూన్లయ్ మెలె, పొద్దు ఆగాసుమ్చి మదెనె ఏక్ ఏక్ గిద్దు ఉడ్డితె తా గట్టిజ ఒర్న దా కిచ్చొ మెన ఒర్నితె తిలి మెలె, “అయ్యో! అయ్యో! అయ్యో! అన్నెక్ తిన్ని దూతల్ వర్న తెన్ జోవయించ నప్పిర్మూరివొ అప్పె పుజుక తిలిన్క బూలోకుమ్తె జితన ఎత్కిజిన్క కెద్ది కష్టుమ్ కెద్ది నష్టుమ్!” మెన సంగ గిద్దు ఉడ్డితె తిలన్.

9

పాఁచొ దూత జోచి నప్పిర్మూరి పుజిలిసి

1 తెదొడి పాఁచొ దూత జోచి నప్పిర్మూరి పుజిలన్, చి కిచ్చొ దెకిలయ్ మెలె, పరలోకుమ్ తెంతొ బూలోకుమ్ ఎద ఏక్ సుక్కొ సేడ్లన్,

‡ 8:11 8:11 జా సుక్కొక మాచివత్తి మెన నావ్. జాచి అర్దుమ్ విస్సుమ్ అన్నె కోడు కి అన్నె. మాన్సుల్ కో కయ్లె మొర గెచ్చుల.

చి జో సుక్కో జతొసాక ఏక్ తాలుమ్ *దిల. మట్టు నెంజిలి దిగిలి గొయితే సేడ్డి వాట్ ఉగిడ్డి తాలుమ్. ² మట్టు నెంజిలి జా గొయితే సేడ్డి వాట్ ఉగిడ్డన్, తెదొడి వెల్లి జా గొయి తెంతొ వెల్లో ఆగి గొయ్చి రితిచి ఆగిచి దుమ్మొ బార్ జలన్, చి జా గొయి తెంతొ బార్ జతి దుమ్మొక పొద్దు కి ఆగాసుమ్ కి గాందు డంకిలి రితి జా అందర్ జల. ³ పడ్డొ, జా దుమ్మొ తెంతొ చిట్కల్ బూలోకుమ్తె బార్ జా బెర్ల, చి విస్సుమ్ కుర్దుచి ఎదిలి సెక్తి జోవయింక †దిల. ⁴ జోవయింక కిచ్చొ ఆడ్ల దిలి మెలె, బుయ్యెచి చివ్వర్ గే కిచ్చొ మొక్కల్ గే, కేన్ రూకుక గే పాడ్ కెరుక జయె నాయ్. గని, కేన్ మాన్సుల్క దేముడుచి ముద్ద జోచి నిర్దె తయె నాయ్ గే, జోకయ్ సిచ్చ కెరుక. ⁵ పాచ్ జొన్నొ ఎద జోవయింక సిచ్చచ నొప్పుల్ కెరుక మెన జేవ్ చిట్కల్క సెలవ్ తిలి. గని కక్క మారుక సెలవ్ నాయ్. జేవ్ నొప్పి దెతిసి కీసిచి మెలె, మాన్సుక విస్సుమ్ కుర్దు చప్పిలెత కీసి నొప్పి కెరెదె గే, తెద్ది నొప్పి జల. ⁶ జా పొదులె కీసి తయెదె మెలె, 'మొర్ను జెవున్' మెన మాన్సుల్ కోర్వ జవుల, గని మొరుక నెతిరి. మొరుక ఆసయి జవుల, గని మొర్ను జోవయింక కొకడ ఉట్ట నిగెదె.

⁷ డీసుక జలె, జేవ్ చిట్కల్ కీస తిల మెలె, యుద్దుమ్క తెయార్ జల గోడల్చ రిత తిల. జోవయించ బోడిలె బజర్చ కిరీటల్ రిత తిల. జోవయించ మొకొమ్లు మాన్సుల్చ మొకొమ్లు రిత తిల. ⁸ జోవయించ రోమల్ తెర్బోదల్చి సెండిచి రితి, జోవయించ దంతొ సింపుమ్లుచి దంతొ రిత తిల. ⁹ ఇనుము డొల్లు రిత డీస్త పొరల్ జోవయించి చామ్తె తవుల, చి ఉడ్డిలె జోవయించ రెప్పల్ కదుల్ జతి అవాడ్ కీసి మెలె, గోడలు జమాన్సుచి రదుమ్ కడన యుద్దుమ్తె

* **9:1** 9:1 జా తాలల్ దేముడు సొంత జో సుక్కో జతొసాక దిలన్ గే మెండపిల్ల జలో యేసు దిలన్ గే కచిగె అత్తి జోవయింక దావడ్ల గే, గని జా జగ్గు జంక ఎత్తి అదికారుమ్ తిలో దేముడు కచితుమ్ సెలవ్ దా తిలన్, నెంజిలె జగ్గు జతి నాయ్. † **9:3** 9:3 జా తాలల్ దేముడు సొంత జో సుక్కో జతొసాక దిలన్ గే మెండపిల్ల జలో యేసు దిలన్ గే కచిగె అత్తి జోవయింక దావడ్ల గే, గని జా జగ్గు జంక ఎత్తి అదికారుమ్ తిలో దేముడు కచితుమ్ సెలవ్ దా తిలన్, నెంజిలె జగ్గు జతి నాయ్.

నిగ గెతి రితి అవాడ్ జతె తవుల. ¹⁰ జోవయించ తోకల్ కీస మెలె, విస్సుమ్ కుర్దుచి తోకల్చి రితి బూసుల. జోవయించ తోకల్తె పాచ్ జొన్నొ ఎద మాన్సుల్క నొప్పి దెతి సెక్తి తయెదె. ¹¹ జోవయించి ఉప్పిర్చొ రానొ కొన్సొ జయెదె మెలె, మట్టు నెంజిలి గొయి రకితో దూత. ఎబ్రి బాస తెన్ జో దూతచి నావ్ ‘అబద్దొను’, చి జా నావ్క అర్దుమ్ ‘నాసెనుమ్ కెర్తొసా’. గ్రీకు బాస తెన్ జా నావ్ ‘అపొల్లుయొను’ మెనుల. ¹² జా సిచ్చుచి గండిమ్ తొలితో చి. ఒత్త తెంతొ దస సిచ్చల్ అన్నె దొన్ని జర్గు జంక జయెదె.

సొవ్వుచొ దూత జోవయించి నప్పిర్మూరి పుజిలిసి

¹³ తెదొడి సొవ్వుచొ దూత జోచి నప్పిర్మూరి పుజిలన్, చి దేముడుచి మొక్కెచి బలి దెతి బజార్ టాన్చ చెత్తర్ కొమ్ముల్ తెంతొ ఏక్ అవాడ్ అయ్లెసి సూన్లయ్. ¹⁴ జా అవాడ్ సొవ్వుచి నప్పిర్మూరి దెరితో ఈంజొ దూతక, “యాప్రటీసు మెలి వెల్లి గడ్డె బంద తిల చెత్తర్ దూతల్క విడ్డల్ కెరు” మెన జా అవాడ్ సంగిలన్. ¹⁵ జాకయ్ జేవ్ చెత్తర్ దూతల్క బందిలిసి ఈంజొ దూత డీసిలన్. జేవ్ జయ్యి గడియ, జయ్యి దీసి, జయ్యి జొన్ని, జయ్యి వెర్ని విడ్డల్ జా ఒండి లోకుమ్చ ప్రజల్క తిన్ని వాటల్తె ఏక్ వాట జిన్క మార్తి రిసా రకితి రితి తెయార్ జా తిల. ¹⁶ జేవ్ దూతల్చి తెడి జా సిచ్చ జర్గు కెర్త గోడల్తె వెగిల సయన్యుములు కెత్తిజిన్ జవుల మెలె, ఏస్సెక్ కోట్లు జిన, జా లెక్క ఆవ్ సూన్లయ్.

¹⁷ జలె, జా డీసిల్ సివ్వుతె జేవ్ సయన్యుమ్ వెగిల గోడలు అంక కీస డీసిల మెలె, జోవయింతె వెగిలసక గుండె ఆగి రంగు, నీలిమ్ రంగు చి ఎడ్డి రంగు బెదిల. ఎక్కెక్ డాలు జత రిత ఇనుము సొక్కల్ గలన తిల, చి జేవ్ గోడల్చ బోడివొ కీస తిల మెలె, సింవుమ్లుచ బోడివొ రిత డీసిల, చి జోవయించి చోడి తెంతొ ఆగి, దుమ్మె, చి ఎడ్డి రితి దుమ్మె బార్ జతె తిల. ¹⁸ జోవయించి చోడి తెంతొ బార్ జతి ఆగి, దుమ్మె, ఎడ్డి దుమ్మె బార్ జతె తిలిన్క ఒండి బూలోకుమ్చ మాన్సుల్చ తిన్ని వాటల్తె ఏక్ వాటజిన్ మొర్ల. ¹⁹ కిచ్చొక మెలె,

జేవ్ గోడలు అల్లర్ కెర్తి సెక్తి కిచ్చితె మెలె, జోవయించి చోడితె చి జోవయించ తోకల్తె తిల. జోవయించ తోకల్ కీస మెలె, అయివొచ రిత జా బోడివొ తెన్ తవుల, చి జోవయించ తోకల్కయ్ మాన్సుల్క గాయిమ్ కెరుల.

²⁰ జలె, జా డీసిలిన్తె అన్నె కిచ్చొ జలి మెలె, ఈంజేవ్ సిచ్చల్ నే మార్ల సేంసిల మాన్సుల్ కీసి జల మెలె, జేవ్ కెర్త కమొక విసారుమ్ జతి నాయ్, ములితి నాయ్, చి బూతల్క, చి బజర్క, వెండిక, కంచుక, పత్తుర్క, దారుక తెయార్ కెర్ల బొమ్మల్క జొకరుక ములితి నాయ్. దన్న బొమ్మల్ దెకుక గే నూసుక గే ఇండుక గే నెతిరై కి.

²¹ అన్నె, జేవ్ మాన్సుల్ కెర్ల హత్యలు, మెంగుర్ కమ్మె, లంజెకమ్మె, చోర్ కమ్మెక, విసారుమ్ జతి నాయ్, ములితి నాయ్.

10

ఒగ్గర్ సత్తుచొ అన్నెక్ దూత

¹ పడ్డొ, ఒగ్గర్ సత్తుచొ అన్నెక్ దూత పరలోకుమ్ తెంతొ ఉత్త జెంక దెకిలయ్. జోమబ్బు గలన్లి రితి జా, మబ్బుచి తెడి తా, జోచి బోడిచి ఉప్పిరి పచ్చన వయ్డూరుమ్ రంగుచి దూని లగిల్ రితి జా, జోచి మొకొమ్ పొద్దుచి రితి ఉజిడి తా, జోచ చట్టొ ఆగి రిత తంబల్ రిత తా. ² ఏక్ ఇదిలిన్ పుస్తకుమ్ జోచి అత్తి తిలి. అగ్గె సుట్టుప జా తిలి, గని అప్పె ఉగ్గి జా అస్సె. జలె, జోచొ ఉజిల్ చాటు సముద్రుమ్తె తియ, డెబ్రి చాటు బుయ్యె తియ సుద, ³ సింపుమ్చి అవాడ్ రితి గట్టిజ అవాడ్ కెరన, ఒర్నిలన్. ఒర్నితికయ్, సత్తు ఉర్ముల్ కెర జబాబ్ దిల. ⁴ సత్తు ఉర్ముల్ కెర్తికయ్, ఆవ్ జేవ్ సంగిలిసి రెగిడ్తయ్, గని పరలోకుమ్ తెంతొ అయ్లి ఏక్ అవాడ్ సూన్లయ్. అంక కిచ్చొ సంగిలన్ మెలె, “జేవ్ సత్తు ఉర్ముల్ సంగితిసి గుట్టు తతి రితి కెరు, రెగుడ్ నాయ్” మెన ఆడ్త దిలన్.

⁵ తెదొడి సముద్రుమ్తె బుయ్యె టీవొజ, ఆవ్ దెకిలో దూత జోచొ ఉజిల్ ఆతు పరలోకుమ్ పక్క ఉక్కుల. ⁶ “కెయెడ తెయెడ నే పిట్టె జితొ, పరలోకుమ్ చి ఒత్త తిలిసి ఎత్తి, బూలోకుమ్చి ఒత్త

తిలిసి ఎత్కి, అన్నె నముద్రుమ్చి ఒత్త తిలిసి ఎత్కి జెర్మున్ కెర్లొసా సాచి” మెన ఒట్టు గలన, కిచ్చొ సాడుప కెర్లన్ మెలె, “సమయుమ్ జా అయ్లి. అన్నె వాయిద కెరుక నెంజె. ⁷ గని, సత్తు దూతల్తె ఆకర్చొ దూత జోచి నప్పిర్మూరి పుజుక తిల దినాల్క, దేముడు జోచ సేవ కెర్తస జల, జోచ కబుర్లు సంగిల పూర్గుల్క సంగిలి రితి, జోచి గుట్టు తిలిసి నెరవెర్పుప జంక అస్సె” మెన జో దూత ఒట్టు గలన సాడుప కెర్లన్.

⁸ ఆవ్ అగ్గె నూన్లి పరలోకుమ్ తెంతో చి అవాడ్ అంక అన్నె సంగిలిసి కిచ్చొ నూన్లయ్ మెలె, “అల్లె, తుయి గో! చి నముద్రుమ్తె బుయ్యె టీవోజ దూతచి అత్తి తిలి పుస్తకుమ్ నజు” మెలన్. ⁹ జో దూతతె ఆవ్ గెచ్చు, “అంక జా ఇదిలిన్ పుస్తకుమ్ దె” మెన సంగిలయ్, చి జో అంక, “నజన *కా, ఈంజ తుచి పెట్టి తుక కోడు జయెదె, గని తుచి చోడితె ఒండల్ తేల్చి రితి తియనయ్ తయెదె.” మెలన్. ¹⁰ జాకయ్ జా ఇదిలిన్ పుస్తకుమ్ జో దూతచి అత్తి తెంతో నజన కయ్లయ్. అంచి చోడితె ఒండల్ తేల్చి రితి తియన తిలి, గని, జా కతికయ్, అంచి పెట్టి కోడు జలి. ¹¹ తెదొడి అంక ఆడ్ర దిలిసి కిచ్చొ మెలె, “ఒగ్గర్ ప్రెజల్చి రిసా, ఒగ్గర్ రాజిమ్లుచి రిసా, ఒగ్గర్ బాసల్చి రిసా, ఒగ్గర్ రానల్చి రిసా ఆవ్ తుక అన్నె దెకయ్తిసి రెడ్డ మాన్సుల్క జానవుక” మెన అంక ఆడ్ర అయ్లి.

11

దొగుల సాచుల్

¹ తెదొడి కట్టడ్డి ఏక్ డండొ అంక *దిల, చి అంక కిచ్చొ ఆడ్ర అయ్లి

* **10:9** 10:9 యెహెజ్కేలు 3:1-3. * **11:1** 11:1 ఎత్కి అదికారుమ్ తిలొ దేముడు దిలన్ గే మెండపిల్ల జలొ యేసు దిలన్ గే అన్నె కచిగె అత్తి జోవయింక దావడ్ల గే, గని ఎత్కి అదికారుమ్ తిలొ దేముడుచి నెంజెలె, జోవయింక దొర్కు జతి నాయ్. 3 నంబర్ కోడుక దెకిలె, ఎత్కి అదికారుమ్ తిలొ దేముడు, నెంజెలె మెండపిల్ల జలొ యేసు లట్టబ్తయ్ మెన ఉచరుక జయెదె. గని గ్రీకు బాస తెన్ ఈంజ ‘డిసయ్లిసి’ తొలితొ రెగిడ్ల సగుమ్ పుస్తకల్తె ఆడ్ర దిలొసాక ‘దూత’ మెన. నంబర్ కోడుతె అస్సె. సగుమ్తె దస్సి సంగి నాయ్.

మెలె, “ఉట్టు, దేముడుచి గుడిచి బలి దెతి టాన్చి ఒత్త బక్తి కెర్తనక కట్టడ దెకు. ² గని దేముడుచి గుడి ఒత్తల్తోచి బయ్లెచి డడ్డుక నే కట్టడతె ములు. కిచ్చొక మెలె, దేముడుక నేన్ల మాన్సులచి అత్తి జా టాన్ అప్పెచి మట్టుక తంక సెలవ్ అస్సె. †దొన్ని విస్సా దొన్ని జొన్సొ పూర్తి ఈంజ సుద్ది జలి పట్టుమ్ జేవ్ సుద గెల అల్లర్ కెరుల. ³ అస్సె, ‡బార పుంజొ తిన్ని విస్సా పొదులు అంచ దొగుల సాచులు కిబస్తబట్టల్ గలన అంచ కబుర్లు సాడుప కెరుక మెన సెక్తి దెయిందె” మెన అంక ఆడ్త అయ్లె.

⁴ ఈంజేవ్ దొగుల సాచుల్ కొన్స జవుల మెలె, బూలోకుమ్ విలువ కెర్తొ ప్రబుచి మొక్కె టీవోజ తిల, దొన్ని ఒలీవ రూక్లు చి దొన్ని దీవుకంబల్, మెన *టాలి జయెదె. ⁵ అస్సె, కో ఇన్నెయింక కిచ్చొ అల్లర్ కెరుల గే, ఇన్నెయించి చొండి తెంతో ఆగి బార్ జా, ఇన్నెయింక విరోదుమ్ జలనక లయ గెలెదె. కో ఈంజేవ్ దొగులక అల్లర్ కెరుల గే, జేవ్ ఇసి మొరుకయ్. ⁶ ఈంజేవ్ దొగుల సాచుల్క అన్నె కిచ్చొ సెక్తి మెలె, దేముడుచ కబుర్లు ఈంజేవ్ సంగితె ఎద పాని †నే పెట్టి రితి అడ్డు కెరుక. పడ్డొ అస్సె, ‡లోయి జతి రితి పానివొక మార్పుప కెరుక, చి కెత్తి సుట్టు ఇన్నెయింక ఇస్టుమ్ అయ్లె, ఎత్కి రగుమ్, అల్లర్క బూలోకుమ్చక సిచ్చల్ కెరుక సెక్తి అస్సె.

⁷ పడ్డొ, ఇన్నెయించి సాచి సంగ కేడయ్లె పడ్డొ, మట్టు నెంజిలి జా వెల్లి గొయి తెంతో వెగ జెతో జంతు ఇన్నెయించి ఉప్పిరి యుద్దుమ్ కెర జిన కెర, ఇన్నెయింక మారెదె. ⁸ ప్రబుక సిలువతె టీవో కెర మార్లి వెల్లి పట్టుమ్తె ఇన్నెయించ పీనుమ్లు సేడ తవుల. జా పట్టుమ్క టాలిక

† 11:2 11:2 దొన్ని కి రమారమి తిన్ని నర వెర్పుల్ జయెదె. ‡ 11:3 11:3 దొన్ని కి రమారమి తిన్ని నర వెర్పుల్ జయెదె. § 11:3 11:3 కిచ్చొ గుర్తు దెకవుక మెన యాదుల్ తెన్ బస్తబట్టల్ గలవ బులుల మెలె, జోవయించి పెట్టిచి దుకుమ్ దెకవుక. * 11:4 11:4 జెకర్యా 4 అద్యయిమ్తె ఇసి టాలి అస్సె. † 11:6 11:6 పలీయా పూర్గుమ్చొ దస్సి కెర తిలన్. ‡ 11:6 11:6 మోసె పూర్గుమ్చొ దస్సి కెర తిలన్. నిర్గమకాండుమ్ 7:14-18.

‘సాదోమ్’ చి ‘ఐగుప్తు’ మెన సంగుక జయెదె. ⁹ తిన్ని నర పొదుల్ పూర్తి ఎత్తి, ప్రైజల్ తెంతో, ఎత్తి సెకుమ్ తెంతో, ఎత్తి బాస తెంతో, ఎత్తి రాజిమ్ తెంతోచ మాన్సుల్ ఇన్నెయించ పీనుమ్లుక దెక దెక, ఇన్నెయింక మెన్నె రోవుక సెలవ్ నే దెతి. ¹⁰ ఈంజేవ్ దొగుల సాచుల్ సంగ తిల కబుర్లు, ఈంజేవ్ కెర్ల కమె బూలోకుమ్తె జేవ్ జితనక అల్లర్ కెర్ల రిసా; లాజ్ కెరయ్లి రిసా, బూలోకుమ్తె జితన ఈంజేవ్ మొర్లిన్చి రిసా వెర్రి సర్ద జా, సర్ద కెరన, జోవయించి వెర్రి సర్దచి గుర్తుక ఎక్కిలోక ఎక్కిలో బవుమానల్ దెతె తవుల.

¹¹ జలె, జేవ్ తిన్ని నర పొదుల్ గెలె, దేముడు పుజిలి ఆత్మ ఈంజేవ్ సాచుల్చి పెట్టి పెన జియడ్లన్, చి ఉట్ట సోగ టీవో జల, చి ఇన్నెయింక దెకిలస పూర్తి బియ్ గెల. ¹² తెదొడి, ఈంజేవ్ జివ్ జల సాచుల్ పరలోకుమ్ తెంతో చి ఏక్ అవాడ్ సూన్ల. కిచ్చొ మెన జా అవాడ్ సంగిలన్ మెలె, “ఇత్తల్ వెగ జా!” మెలన్, చి ఇన్నెయింక విరోదుమ్ జలసచి మొక్కె మబ్బు తెన్ పరలోకుమ్తె వెగ గెల. ¹³ జయ్యి గడియయ్ వెల్లి బూకంపుమ్ జలి. జా పట్టుమ్చ దెస్సు వాటల్తె ఏక్ వాట నాసెనుమ్ జా గెలి. జా బూకంపుమ్తె సత్తు వెయిల్జిన్ మాన్సుల్ మొర గెల. సెంసిల మాన్సుల్ బియ్ కెర, పరలోకుమ్తె తిలో దేముడుక గవురుమ్ దిల.

¹⁴ సిచ్చల్చ గండిమ్లు, కస్టుమ్లు ఇన్నెతెన్ దొన్ని జా గెలి. మొత్తుమ్ తిన్ని సిచ్చల్ జతి రితి అన్నెక్ దస్సి సిచ్చ కచితుమ్ జర్గు జంక అస్సె.

సత్తుజిన్ దూతల్తె ఆకర్చో జోచి నప్పిర్మూరి పుజిలిసి

¹⁵ సత్తుచో దూత జోచి నప్పిర్మూరి పుజిలన్, చి కిచ్చొ జలి మెలె, పరలోకుమ్తె గట్టిజ అవాడ్చ అవాడ్లు కిచ్చొ మెల మెలె, “బూలోకుమ్చి రాజిమ్ అమ్చో ప్రబుచి చి జోచో క్రిస్తు పుత్తున్చి

§ 11:8 11:8 సాదోమ్ పట్టుమ్చ మాన్సుల్చి ఐగుప్తు దేసిమ్చ మాన్సుల్ ఎత్తి, అదికారుమ్ తిలో దేముడుక చి జోవయించ మాన్సుల్క పూర్గుమ్ విరోదుమ్ కెర తిల. దస్సి, యెరూసలేమ్ పట్టుమ్చ మాన్సుల్ యేసుక విరోదుమ్ కెర మార్ల, చి ఈంజేవ్ సాచుల్చ పీనుమ్లు ఒత్తయ్ సేడ్ల.

రాజిమ్ జా మార్పుప జా అస్సె. కెయడ తెయడ జో ఏలుప కెరెదె”
మెన సంగిల. ¹⁶ తెదొడి దేముడుచి పురైతో జోచ సిజాసనల్తె వెసిత
విస్సెక్ చెత్తర్జిన్ వెల్లెల మాన్సుల్ దేముడుచి మొక్కి సెర్ను సేడ, జోక
కిచ్చొ మెన బక్తి కెర్ల మెలె,

¹⁷ “ఎత్కి సెక్తి అదికారుమ్ తిలో ఎత్కిక ఏలుప కెర్తొ దేముడు ప్రబువ,
తుయి అప్పె తతోసా, అగ్గె తెంతో తిలోసా,
తుయి తుచి సెక్తి అదికారుమ్ దెరన, ఏలుప కెరుక దెర అస్సిసి మెన,
తుక అమ్చి సర్ద సంగితనుమ్.

¹⁸ తుక నేన్ల మాన్సుల్ మొత్తుమ్ తుచి ఉప్పిరి కోపుమ్ దెకయ్ల,
గని తుచి కోపుమ్ తుయి దెకవ జోవయింక సిచ్చ కెర్లది.
మొర్లనక పరిచ్చ కెర తుచ సేవ కెర్తన జల తుచ కబుర్లు సంగితనక
చి తుచ సొంత జల అన్నె మాన్సుల్క, తుక బిత ఎత్కిజిన్క,
జేవ్ బాల వెల్లో జలె కి, జోవయింక బవుమానుమ్ దెంక,
పడ్డొ బూలోకుమ్చక నాసెనుమ్ కెర్తనక నాసెనుమ్ కెరుక మెన,
సమయుమ్ జా అయ్లి.”
మెన జో దేముడుచి మొక్కి ఒప్పున్ల.

¹⁹ తెదొడి పరలోకుమ్చి దేముడుచి గుడిచి కెడ్డి ఉగ్గి జలి, చి జోచి
జా దేముడుచి గుడిచి తెడిక తెడిచి గదితె జోచి నే పిట్టి ప్రమానుమ్చి
గుర్తుచి *పెటె డీసిలి. అన్నె, బిజిలి మొల్కిలి, అవాడ్లు అయ్లి,
ఉర్మూల్ కెర్లి, చి బూకంపుమ్ కెర్లి, చి వెల్లెల కరపత్తల్ పెట్ల.

12

తేర్బోదచి వెల్లి అయిచి టాలి

* **11:19** 11:19 తెదొడె ఎద, ఎత్కి అదికారుమ్ తిలో దేముడుచి గుడితె జా పెటె తిలి
తెడిక తెడిచి గదితె ఎక్కి ఎత్కిక వెల్లో పూజరి, గని అన్నె కోయి నాయ్ గెచ్చుక జయెదె, అన్నె
వెర్నెక్ ఎక్కి నుట్టు జో ఒత్త పెనుక జయెదె. ఇన్నె సంగిల్ రితి జా పెటె డీసిలె, కిచ్చొ అర్దుమ్
తయెదె మెలె, జా డీసిలి తెంతో ఎత్కిజిన్ ఎత్కి అదికారుమ్ తిలో దేముడుచి గపురుమ్, జో
కిసా అస్సె గే, పూర్తి దెకుక జయెదె.

1 తెదొడి ఆచారిమచి వెల్లి ఏక్ గుర్తు ఆగాసుమతె డీసిలన్. కిచ్చొ మెలె, పాలుమ్ మెలి రితి పొద్దు గలన్లి రితి జలి తేర్బోద. జాచి చట్ట జోను, జాచి బోడి *బార సుక్కల్ తిలి కిరీటుమ్. 2 జా అంగి జా తిలి, చి జాచి కంట్లు పావ అయ్లి నొప్పుల్క, లడెన్ జంక మెన, ఒర్నితె తిలి. 3 తెదొడి, ఆగాసుమతె అన్నెక్ వెల్లి గుర్తు డీసిలి. ఆదె! వెల్లో అయి రితో ఆగి రితో ఎరన జంతు. జోక సత్తు బోడియొ చి దెన్ను కొమ్ముల్, చి జోచ సత్తు బోడివోతె †సత్తు కిరీటల్ తిల. 4 జోచి తోక తెన్ ఆగాసుమచ సుక్కల్ మొత్తుమ్చ తిన్ని వాటల్తె ఏక్ వాటక కడ, బూలోకుమచి ఉప్పిరి సేడవ దిలన్. తెదొడి, జా తేర్బోద లడెన్ జతికయ్, జా లడెన్ జతో బోదక గీడ గెలుక మెన ఉచర, జాచి పురై జో వెల్లో అయి టీచోజ తిలన్. 5 జలె, జా పూత్తుక లడెన్ జలి. కీసా పూత్తు మెలె, గవురుమ్చి ఇనుముడండొ రితిసి దెరన దేముడుక నేన్ల మాన్సుల్ ఎత్తిజినక ఏలువ కెరుక దిలొసా. గని జో అయితె దెర్ను నే సిడ్డె జో బోద దేముడుతె జోచి సింగాసనుమతె ఉక్కిల్ జలొ. 6 బయిలు దేసిమి జా తేర్బోద ఉట్ట నిగిలి. ఒత్త 'జాక' మెన దేముడు ఏక్ టాన్ తెయార్ కెర తిలన్. ఏక్ ‡వెయి దొన్ని పుంజొ అరవయ్ పొదుల్ ఒత్త జా కంక జింక అన్సి.

సయ్తాన్చి ఉప్పిరి యుద్దుమ్ కెర జిన్నిసి

* 12:1 12:1 యూదుల్తె బార సెకుమ్లు తిల, గెద. యూదుల్క 'ఇస్రాయేలులు' మెనుల కి, వడ్డొ యేసుక నంపజలనక 'అమ్చ సత్తిమ్చ ఇస్రాయేలులు' మెన ఎత్తి అదికారుమ్ తిలొ దేముడు దెకితయ్, జేవ్ యూదుల్ జలెకి నే జలెకి. జేకజేవ్ బార సుక్కల్ తిలి కిరీటుమ్క 'ప్రబుచయ్ జలన మొత్తుమ్' మెన అర్దుమ్ కెరనుక జయెదె. యూదుల్ తెంతొ క్రీస్తు రచ్చించువ కెర్తొసా జెర్మిలొ. సయ్తాన్ జోవయింక అల్లర్ కెర్లొ, గని జీనె నాయ్. జా తేర్బోదక ఏక్ రగుమ్ ఉచర్లె, 'యేసుచి అయ్యసి మరియ' మెన ఉచరుక జయెదె. గని అన్నెక్ రగుమ్ ఉచర్లె, నంపజలన మొత్తుమ్చి ఆత్మ సంగుమ్ మెనుక జయెదె. జా ఆత్మ సంగుమ్చ బోదల్ జల క్రీస్తుచ బాపుడ్లు జల నంపజలనక కి సయ్తాన్ అల్లర్ కెర్తయ్, 12:17, గని ఆకర్క జీనె నాయ్. 12:12 దెక. † 12:3 12:3 సత్తు బోడివొ, దెన్ను కొమ్ముల్, చి సత్తు కిరీటల్చి అర్దుమ్ కిచ్చొ మెలె, అప్పెచి మట్టుక జో బూలోకుమతె ఏలువ కెరుక పూర్తి అదికారుమ్ తిలిసి. వడ్డొక ఓడువ జయెదె, గెద. సత్తు సంబర్క 'పూర్తి' మెలిన్చి అర్దుమ్, గెద. ‡ 12:6 12:6 మెలె, తిన్ని సర వెర్పుల్.

7 తెదొడి పరలోకుమతె యుద్దుమ్ జలి. ఒత్త మికాయేలు మెలో వెల్లో దూత ఎక్కిలో, జోచి తెడిచ దూతల్ తెన్, జో వెల్లో అయి రితోసాచి ఉప్పిరి యుద్దుమ్ కెర్ల. జో అయిచి జాచి తెడిచ దూతల్ కి యుద్దుమ్ కెర్ల. 8 గని ఓడుప జల, చి ఒత్త తెంతో పరలోకుమతె జోక అన్నె టాన్ నాయ్. 9 జో వెల్లో అయి, జో పూర్గుమ్చో అయి; జోక ‘సయ్తాన్’ మెనుల, ఒండి లోకుమ్చక మోసిమ్ కెర్లొసా, బూలోకుమతె జేడ సేడ గెలో, చి జో తెన్, జోచ దూతల్ ఎట్టో జేడ సేడ గెల.

సయ్తాన్ ఓడుప జలిసి

10 తెదొడి పరలోకుమతెచి గట్టిజ ఏక్ వెల్లి అవాడ్ సూన్లయ్. కిచ్చొ మెలి మెలె, “అమ్చో దేముడు దెతి రచ్చన, జోచి సెక్తి, జోచి రాజిమ్, పడ్తో జోచొ క్రిస్తుచి అదికారుమ్, అప్పె నెరవెర్చుప జా పాచ జా అస్సె. కిచ్చొక మెలె, అమ్చ బావుడ్లుక నిందల్ సంగితె తిలొసా ఎట్టో జేడ సేడ అస్సె. అగ్గె అమ్చ బావుడ్లుక రోజుక రాతి మెద్దెనె దేముడుచి మొక్కె జో నిందల్ సంగితె తిలొ. 11 గని జేవ్ అప్పె మెండపిల్లచి సూయి జలి కీలొయిచి సెక్తిక, పడ్తో జేవ్ సాచి సంగిలిన్చి నిదానుమ్క, జేవ్ దొన్నిచి రిసా, జో సయ్తాన్చి ఉప్పిరి జేవ్ జిన అస్తి. ‘జేవ్ సాచి సంగిలిన్చి నిదానుమ్’ మెలె, జోవయిచి సొంత జీవుక విలువ నే దెకన్తె, జా మెండపిల్లచి నావ్క విలువ దెక, జోచి రిసాచి సాచి జేవ్ సంగిలి రిసా మాన్సుల్ మొర్ల. 12 జలె, సయ్తానుక జిన అస్తి. జాకయ్, ఓ పరలోకుమ్, ఒత్త జితన ఎత్కిజిని, సర్దనంతోసుమ్ జా! గని, ఓ బూలోకుమ్, ఓ సముద్దుమ్, అయ్యు! తుమ్క ఒగ్గర్ కస్టుమ్ నస్టుమ్! కిచ్చొక మెలె, సయ్తాన్ ఒగ్గర్ కోపుమ్ తెన్ తుమ్తె ఉత్త జా అస్సె. జోచి ఒగ్గర్ కోపుమ్ కిచ్చొక మెలె, జోక అప్పె ఒగ్గర్ సమయుమ్ సేంసె నాయ్ మెన జో జాన అస్సి!” మెన పరలోకుమ్చి జా అవాడ్ సంగిలి.

§ 12:11 12:11 మెలె, జో అప్రితుమ్ జలిన్చి సెక్తిక.

13 ‘అంక ఒగ్గర్ సమయుమ్ నాయ్’ మెన జో వెల్లో అయి దెక కెర, జో మున్నుబోదక లడెన్ జలి జా తేర్బోదక చజ అల్లర్ కెరుక మెన గెలన్. 14 గని జా తేర్బోదక దేముడు వెల్లి గిడ్డురానొచ దొన్ని రెప్పల్ దిలన్. జా అయితె జా దెర్ను నే సేడ్తె బయిలు దేసిమి జా ఉడ్డ గెచ్చుక మెన, జా దొన్ని రెప్పల్ దిలన్. జా కేనె ఉడ్డ గెచ్చుక మెలె, *తిన్ని వెర్పుల్ నర కతె జితె చెంగిల్ తంక తిలి టాన్తె జా ఉడ్డ గెచ్చుక.

15 జలె, ‘బూరుమ్ జాక గుడ్డ దెర గెన్ను’ మెన, జా తేర్బోదచి పట్టి జో అయి జోచి చోండి తెంతో గాడు రితి పాని సువ దిలన్. 16 గని జా తేర్బోదక బుయి తోడు తా జాచి చోండి పాడ, జోచి చోండి తెంతో వెల్లో జో అయి సువ దిలి గాడుక బుయి గిడ్డ గెలి.

17 తెదొడి జో వెల్లో అయి జా తేర్బోదచి ఉప్పిరి ఒగ్గర్ కోపుమ్ జా, జాచ అన్నె బోదలచి ఉప్పిరి యుద్దుమ్ కెరుక మెన ఉట్ట గెలన్. దేముడుచ కొడొ నిదానుమ్ ఇండ యేసుచి రిసా సాచి జతసయ్చి ఉప్పిరి యుద్దుమ్ కెరుక మెన గెలన్.

సముద్రుమ్ తెంతో సయ్తాన్చి సేవ కెర్తొ వెర్రి జంతు బార్ జలిసి

18 తెదొడి సముద్రుమ్చి ఒడ్డుచి ఇస్కతె జో వెల్లో అయి టీవో జలన్.

13

1 తెదొడి కిచ్చొ దెకిలయ్ మెలె, సముద్రుమ్ తెంతో ఏక్ వెర్రి జంతు బార్ జతె తిలసిసి దెకిలయ్. జోక దెన్ను కొమ్ముల్ చి సత్తు బోడివో. జోచ ఎక్కెక్ కొమ్ముల్తె ఎక్కెక్ కిరీటల్, చి జోచి ఎత్తి బోడివోతె దేముడుక దూసువ కెర్తి ఏక్ నావోల్ తిల. 2 ఆవ్ దెకిలె జో జంతు కీసా డీసిలో మెలె, డుర్కొ వాగు రగుకమ్, చి జోచ చట్టో వెలుగుచ చట్టో రిత, జోచి మూతి సింపుమ్చి మూతిచి రితి తిల. జో జంతుకయ్ జో వెల్లో అయి జోచి సెక్తి, జోచి సిజాసనుమ్, ఒగ్గర్ అదికారుమ్ దిలన్. 3 జో జంతుచి సత్తు బోడివోతె ఏక్ బోడి మొర్తి రితి గాయిమ్ జా తిలి

* 12:14 12:14 “ఏక్ కాలుమ్, దొన్ని కాలుమ్లు చి ఏక్ అర కాలుమ్” మెన రెడ్ల అస్సె. తిన్ని నర వెర్పుల్చి అర్దుమ్ జా కొడుక తయెదె. 11:2 దెక.

రితి తిలి. గని మొర్తి జా గాయమ్ అన్నె చెంగిల్ జా తిలి, చి ఆచారిమ్ జా ఒండి బూలోకుమ్చ మాన్సుల్ జో జంతుచి పట్టి గెతె తిల. ⁴ జో వెల్లో అయి జోచి అదికారుమ్ జో జంతుక దిలి రిసా, మాన్సుల్ జో అయిక గవురుమ్ కెర జోకర్తె తిల. “జో జంతుచో రితో కోయి నాయ్. జో జంతుతె యుద్దుమ్ కెర జోచి ఉప్పిరి కో జీనుక నెత్తిర్” మెన జంతుక గవురుమ్ కెర జోకర్తె తిల.

⁵ జో జంతుక కిసి చోండి తిలి మెలె, గవురుమ్ సంగన్త కొడె, దేముడుక దూసుప కెర్త కొడె సంగితి చోండి తిలి. *దొన్ని విసా దొన్ని జొన్నొ జో ఏలుప కెర్తి రితి జోక సెలవ్ తిలన్. ⁶ దేముడుక, చి జోచి నావ్, చి జోచి టాన్క దూసుప కెర కెర చోండి పుట్టయ్తె తిలన్. దేముడుచి టాన్ మెలె, జోచి పరలోకుమ్తె జితన. ⁷ పడ్డె అన్నె, జోక కిచ్చొ సెలవ్ తిలి మెలె, యేసు ప్రబుచయ్ జల మాన్సుల్చి ఉప్పిరి యుద్దుమ్ కెర జీనుక మెన సెలవ్ తిలి. జా పొది ఎత్తి సెకుమ్చి ఉప్పిరి, ఎత్తి ప్రెజల్చి ఉప్పిరి, ఎత్తి బాసల్చి ఉప్పిరి, ఎత్తి రాజిమ్చి ఉప్పిరి, జా జంతుక అదికారుమ్ తంక సెలవ్ తిలి. ⁸ జా పొది ఒండి బూలోకుమ్తె జితన ఎత్తిజన్ జోక బక్తి కెరుల. లోకుమ్ నే జెర్మయ్తె అగ్గె తెంతో తిలొ విరోదుమ్ సుదల్ మార్ల మెండపిల్లచి పుస్తకుమ్తె, కచ నవ్వొ తతి నాయ్ గే, జెవ్విజో జంతుక బక్తి కెరుల.

⁹ కంగ్గొ తిలొసా నూన్తు. కిచ్చొ మెలె,
¹⁰ “కక్క దెర గెచ్చుక మెన తిలె, జేవ్క దెర గెచ్చుక జయెదె.
 కో జలె కండాతె మొరపుక మెన తిలె, జేవ్ కండా తెన్ మొరపుక జయెదె.”
 మెన రెగిడ్లి కోడు. ఈంజ కోడుతె కిచ్చొ జాగర్త బెదితయ్ మెలె, ప్రబుచయ్ జల మాన్సుల్ నిదానుమ్ తా బాదల్ ఓర్పుప జా నముకుమ్ తెన్ తంకయ్.

బుయి తెంతో వెర్రి జంతు బార్ జలిసి

* 13:5 13:5 మెలె, తిన్ని సర వెర్వుల్. 11:2, 3. 12:6, 14 దెక.

11 తెదోడి అన్నెక్ వెర్రి జంతు బుయి తెంతో బార్ జలిసి దెకిలయ్. మెండపిల్లచి రితి జోక దొన్ని కొమ్ముల్ తిల, గని వెల్లి అయిచి రితి జో లట్టట్ట. 12 జో తొలితొచో జంతుచి నావ్ తెన్ జోచి కామ్ ఈంజోయ్ జర్గు కెర్తయ్, చి మొర్తి గాయిమ్ చెంగిల్ జా తిలో జో తొలితొచో జంతుక ఒండి లోకుమ్, ఒండి లోకుమ్చ మాన్సుల్ జోకర్తె రితి, ఈంజోయి జంతు జేవ్క సికడ్తయ్. 13 ఆచారిమ్చ వెల్లెల వెల్లెల కమొ ఈంజో జర్గు కెర్తయ్. కిచ్చొ మెలె, 'మాన్సుల్ దెకుత్' మెన జోచి మొక్కె ఆగాసుమ్ పక్క తెంతో బుయిచి ఉప్పిరి ఆగి నూయి జతి రితి కెర్తయ్. 14 అన్నె, జో తొలితొచో జంతుచి మొక్కె ఈంజో జర్గు కెరుక సెలవ్ తిల ఆచారిమ్చ వెల్లెల కమొచి సెక్తిక బూలోకుమ్తె జితనక ఈంజో మోసిమ్ కెర్తయ్. దస్సి, కిచ్చొ ఏక్ మోసిమ్ కెర్తయ్ మెలె, కడ్డుమ్క మొర్తి సెక్తిచి గాయిమ్ జలెకి జీవ్ తిలో జో అన్నెక్ జంతుచి రిసా ఏక్ బొమ్మ జేవ్ తెయార్ కెర జొకరుక మెన, ఈంజో జంతు బూలోకుమ్తె జితనక సికడ్తయ్. 15 జో తొలితొచో జంతుచి బొమ్మ లట్టబ్బి రితి జీవ్ దెంక కి ఈంజో జంతుక సెలవ్ తిలి, చి జో జంతుచి బొమ్మక నే జొకర్తనక మొరవుక కి ఈంజో, జంతుక సెలవ్ తిలి.

16 పడ్తో అన్నె కిచ్చొ ఏక్ అల్లర్ ఈంజో అన్నెక్ జంతు, బుయి తెంతో బార్ జలో జంతు, కెర్తయ్ మెలె, ఎత్కిజిని, బాల, వెల్లో, సామ్సారి, బీద సుదో, గొతి నెంజిలో మాన్సు. గొతి జలో మాన్సు, ఉజిల్ అత్తి నెంజిలె నిర్దె ఏక్ గుర్తు కెరవంతి రితి ఈంజో పెలయ్తయ్. 17 అన్నె, జా గుర్తు నే కెరవంతె కో కిచ్చొ గెనుక గే వికుక గే సెలవ్ తయె నాయ్. జా గుర్తుతె కిచ్చొ తయెదె మెలె, జంతుచి నావ్, నెంజిలె జోచి నావ్చి గుర్తుచి అంకె. 18 ఇన్నెచి అర్దుమ్ కెరనుక జలె, ముక్కిమ్చి గ్యానుమ్ అవ్సురుమ్. కక్క దస్సి గ్యానుమ్ అస్సె మెలె, జో జంతుచి అంకె లెక్క.

† 13:12 13:12 సముద్రుమ్ తెంతో బార్ జలోసా.

కెర్తు. ‡జేవ్వి అంకె ఏక్ మాన్సుచి నావ్ తెన్ బెదితి అంకె. జా అంకె కిచ్చొ మెలె, సొవ్వు పుంజొ తిన్ని విసా సొవ్వు (666).

14

మెండపిల్ల తెన్ జోచయ్ జల మాన్సుల్ టీవెలిసి

¹ తెదొడి అన్నె దెకిలయ్, ఈందె! *సీయోను డొంగై జో †మెండపిల్ల టీవె తా, జో తెన్ అన్నె కొన్న టీవొజ తిల మెలె, ‡పుంజెక్ దొన్ని విసా చెత్తర్ వెయిల్జిన్ జోవయించి నావ్, దేముడుచి నావ్ జోవయించ నిర్దెలె రెడ్డవన్ల మాన్సుల్ తిల. ² అన్నె, ఒగ్గర్ పానివొ నూయి జతి అవాడ్ రితిచి, ఉర్ముల్ కెర్రి వెల్లి అవాడ్ రితిచి, పరలోకుమ్ తెంతో చి, ఏక్ అవాడ్ నూన్లయ్. ఆవ్ నూన్లి అవాడ్ అన్నె కీసి తిలి మెలె, వీనెల్తె బజయ్తి అవాడ్చి రితి తిలి. ³ జెలె, జేవ్ ఎతివాట్జిన్ మాన్సుల్ సింగాసనుమ్చి మొక్కె, సిజాసనుమ్చి సుట్టునంత టీవొజ తా కిచెత్తర్ జివుల్చి మొక్కె, చి *విస్సెక్ చెత్తర్జిన్ వెల్లెల మాన్సుల్చి మొక్కె, నొవి గనుమ్ గాయితె తిల. ఈంజ బూలోకుమ్చి రాజిమ్ తెంతో గెనన్ల, ఈంజేవ్ పుంజెక్ దొన్ని విసా చెత్తర్ వెయిల్జిన్

‡ **13:18** 13:18 గ్రీకు బాస చి ఎల్లి బాస రెగిడ్డ రితితె ఎత్తి అచ్చుమ్క ఏక్ విలువ తయెదె. జేడ, ఏక్ మాన్సుచి నావ్చ అలవాట్లు చి లెక్క బెదవుక జయెదె. 'సీరో క్లెనర్' మెలొ రోమ్ దేసిమ్చొ అగ్గె వెల్లి రానో జలోసా ఎక్కిలోచి నావ్క సొవ్వు పుంజొ అరవయ్ సొవ్వు నంబర్చి లెక్క బెదవుక జయెదె, చి యోహాను ఈంజ పుస్తకుమ్ రెగిడ్డ దినాల్క ఇదిల్ అగ్గె, జో సీరో క్లెనర్ నంవజలనక అల్లర్ కెర్తె తిలొ. గని పడ్డొ అయ్ల నంవజలనక అల్లర్ కెర్ల, మాన్సుల్చ నవ్వొక కి జయి లెక్క తయెదె. జేడ, కచి రిసా సంగితయ్ గే నేనుమ్. * **14:1** 14:1

'సీయోను డొంగై' చి 'యెరూసలేమ్ పట్టుమ్' మెలె, ఎత్తి అదికారుమ్ తిలొ దేముడు జతి టాన్క, మెలె పరలోకుమ్క, టాలిచ నవ్వొ జవుల. † **14:1** 14:1 మెలె యేసుప్రబు.

‡ **14:1** 14:1 ఈంజ నంబర్చి అర్దుమ్ కిచ్చొ మెలె, 'పూర్తి జలిసి', 'ఒగ్గర్ జలిసి', చి ఇన్నె, 'యేసుక నంవజలన మొత్తుమ్చి లెక్క పూర్తి జలిసి'. ఈంజ నంబర్ జయి టాలిచి నంబర్. ఎక్కి జయి నంబర్చి ఎత్తయి జవుల మేనుమ్ నాయ్, గని 'జోవయింక నంవజలన ఒగ్గర్ ఒగ్గర్జిన్ జవుల' మెలి అర్దుమ్ ఇన్నెతెన్ కెరనుమ్చె. పూర్ణమ్ తెంతో యూదుల్తె బార నెకుమ్లు తిల, చి యేసుక బారజిన్ సిస్సుల్ తిల. పడ్డొ జోవయించ బారజిన్ సిస్సుల్ జోవయించ బారజిన్ బారికుల్ జల. 144,000 మెలె, బార బార వెయిలు. మెలె 12వెయిలు x 12వెయిలు x 1000 = 144,000. § **14:3** 14:3 4:6-8. * **14:3** 14:3 4:4.

మాన్యుల్క పిట్టవ, జా గనుమ్ అన్నె కో సికుక నెత్తిర్. ⁴ ఈంజేవ్ మాన్యుల్ కీన మాన్యుల్ మెలె, సుద్ది తా, తేర్బోదల్ తెన్ నే బెదిల సుదల్, లంజె నే జలన. ఈంజేవ్ దేముడుక, మెండపిల్లక ముల్తి నాయ్, వేర 'దేముడ్లు' మెలనచి పట్టి గెతి నాయ్. ఈంజేవ్, జలె, మెండపిల్ల కేనె గెలె కి, జోచి పట్టి గెతతి. ఒండి లోకుమ్చ మాన్యుల్ తెంతో దేముడుచి మెండపిల్లక దిలి తొలి వండ్లు జతి రితి ఇన్నెయింక మెండపిల్ల అన్నె [†]గెననయ్ అస్సె. ⁵ జోచి పున్నిమ్ ఇన్నెయింకయ్ జొయ్యి దా అస్సెచి రిసా, ఇన్నెచి చోడితె కిచ్చొ అబద్దుమ్ తయె నాయ్.

సుబుమ్ కబుర్ సూనయ్తో దూత ఉడ్డితె తిలిసి

⁶ తెదొడి, అన్నెక్ దూతక దెకిలయ్. పొద్దు ఆగాసుమ్చి మదెనె జో ఉడ్డితె తిలొ. కిచ్చొక మెలె, బూలోకుమ్తె జితన్క, ఎత్తి రాజిమ్చక, ఎత్తి సెకుమ్చక, ఎత్తి బానచక, కెయక తెయక తతి పాడ్ నే జతి సుబుమ్ కబుర్ ఎత్తి ప్రెజల్క సూనవుక మెన, జా సుబుమ్ కబుర్ దెరన గెతె తిలొ. ⁷ అన్నె, జో గట్టిజ అవాడ్ కెరన కిచ్చొ మెన కేక గలన్లొ మెలె, "దేముడుక బియఁ కెర జోక గవురుమ్ కెర! కిచ్చొక మెలె, జో ఎత్తి మాన్యుల్క పరిచ్చు కెర సిచ్చు కెరుక, బవుమానుమ్ దెతి గడియ పావ జా అస్సె. అన్నె పరలోకుమ్, బూలోకుమ్, సముద్రుమ్, పానిచ ఊంటలు జెర్మయ్లో జోకయ్ నంపజా బక్తి కెర!" మెన సాడుప కెర్లన్.

⁸ అన్నెక్ దూత, జలె, ఇన్నెతెన్ దొన్నిచొ, జో అగ్గెచొ చి పట్టి ఉడ్డ గెచ్చు, కిచ్చొ మెలన్ మెలె, [‡]"వెల్లి బబులోను పట్టుమ్ సేడ అస్సె. ఎత్తి ప్రెజల్క జాచి లంజె ఆన, రగుమ్చి ద్రాచ రస్సుమ్ పియడ్డిసి జా." మెన సాడుప కెర్లన్.

⁹ పడ్డొ అన్నెక్ దూత, ఇన్నెతెన్ తిన్నిచొ; జేవ్ దొన్ని దూతల్చి పట్టి ఉడ్డితె తా కిచ్చొ మెన సంగిలన్ మెలె, "కో జో జంతుక చి జోచి

[†] **14:4** 14:4 నెంజెల్ 'నెతోవ అస్సె'. ³ నంబర్తె కి అన్నె గెనన్లనక గెనన్లనక నెతోవిలన మెనుక జయెదె. [‡] **14:8** 14:8 టాలిక రోమ్ పట్టుమ్క 'బబులోను' మెంతతి, ఈంజ 'డినయ్లన్' చి పుస్తకుమ్తె.

బొమ్మక బక్తి కెరుల గే, జోచి గుర్తు కచి నిరై గే అత్తి గే, గలవనుల గే,
 10 జోవయించి తప్పుక దేముడుచి కోపుమచి సిచ్చచి ద్రాచ రస్సుమ్
 కచితుమ్ కిచ్చి పాని గట్ట నే బెదయతె, జోచి ఒగ్గర్ కోపుమచి
 గిన్నతె పివులచి పరలోకుమ్చి సుద్దిచ జోచ దూతల్చి మొక్కె, చి
 మెండపిల్లచి మొక్కె, ఎరన జతి ఎడ్డి జతి ఆగి లగితి వెల్లి ఆగి
 గొయ్తెచ బాదల్ సేడుల. 11 జేవ్చి జా సిచ్చచి దుమ్మొ కెయక
 తెయక బార్ జతె తా వెగ గెతయ్. జో జంతుక చి జోచి బొమ్మక
 జొకర్తనక చి జోచి గుర్తు గలవన్లనక, రాతి మెద్దెనె కిచ్చి నే వుండితె
 తవుల.” మెన దూత సాడుప కెర్లన్. 12 ఈంజ కోడుతె కిచ్చి జాగర్త
 బెదితయ్ మెలె, యేసు ప్రబుచయ్ జల మాన్సుల్, మెలె దేముడుచి
 కోడు రితి ఇండితన, యేసుచి ఉప్పిర్చి నముకుమ్తె ఇండితన, జేవ్
 బాదల్ ఓర్పుప జా నిదానుమ్తె తంకయ్.

ప్రబుచి తెడిచి విస్తాంతిచి రిసా పరలోకుమ్ తెంతో అవాడ్

13 తెదొడి పరలోకుమ్ తెంతో చి ఏక్ అవాడ్ సంగిలిసి కిచ్చి
 నూన్లయ్ మెలె, “ఏక్ కోడు రెగుడు. అప్పె తెంతో యేసుప్రబుచి తెడి
 తా కో మొరుల గే, జోవయింకయ్ చెంగిలి. మెలె, దేముడుచి సుద్ది
 తిలి ఆత్మ కిచ్చి మెన్తయ్ మెలె, కిచ్చొక జోవయింక చెంగిలి మెలె,
 జేవ్ ఇండిలి బుద్ది జోవయింతెన్ బెదయ్ జెతయ్, చి జోవయించ
 కమొ కెర కేడయ్లినక అప్పె సెలవ్ తెన్ తవుల.” మెన సంగితయ్
 మెన పరలోకుమ్ తెంతో చి జా అవాడ్ సంగిలన్.

బూలోకుమ్చి పంటొ

14 అన్నె ఆవ్ దెకితికయ్, ఆదె! కిచ్చి మెలె, చొక్కిలి మబ్బు, చి జా
 మబ్బుతె కో వెన అస్సె మెలె, మాన్సు జా జెర్మున్ అయ్లి రగమ్చొ
 ఎక్కిలో వెన అస్సె. జోచి బోడితె బజర్చి కిరీటుమ్, జోచి అత్తి వాండి
 కెర్లి కొడ్వెలి అస్సె.

15 తెదొడి అన్నెక్ దూత దేముడుచి గుడి తెంతో బార్ జా, గట్టిజ
 అవాడ్ కెరన, జా మబ్బుతె వెసిలోసాక కిచ్చి మెన కేక్ గలన్లొ మెలె,
 “బూలోకుమ్చి పంటొ పూర్తి పిక అస్సెచి రిసా, లాయితి సమయుమ్

జా అయ్యేది. జాకయ్, తుచి కొడ్వేలి దెరన లాయి!” మెన కేక్ గలో.
 16 తెదొడి మబ్బుతె వెసిలోసా బూలోకుమ్చి పంటో పూర్తి జోచి కొడ్వేలి
 తెన్ కీసప్ప కెర కేడయలన్.

బూలోకుమ్చి పంటో దూత లాయిలిసి

17 తెదొడి అన్నెక్ దూత పరలోకుమ్చి దేముడుచి గుడి తెంతో బార్
 జలన్. జో వాండి కెర్లి కొడ్వేలి దెరన అన్నె. 18 తెదొడి, అన్నె, ఒత్తచి
 బలి దెతి టాన్ తెంతో అన్నెక్లో దూత బార్ జలన్. ఈంజో దూతక
 ఆగిచి ఉప్పిరి అదికారుమ్ తిలి. వాండిచి కొడ్వేలి దెర్లో దూతక కేక్
 గల కిచ్చొ మెన గట్టిజ అవాడ్ కెరన ఆగిచి ఉప్పిరి అదికారుమ్ తిలి
 దూత సంగిలన్ మెలె, “తుచి కొడ్వేలి దెరన, ద్రాచ గెలల్చ, గొచ్చల్చ
 పండ్లుచి పంటో లాయి! జా పండ్లు పిక అస్తి!” మెన సంగిలన్.
 19 జాకయ్, జో దూత బూలోకుమ్తె జోచి కొడ్వేలి తెన్ బూలోకుమ్
 ఎత్కిచి ద్రాచ పంటో లాయిలన్, చి దేముడుచి కోపుమ్చి సిచ్చ జతి
 జోచి గన్నతె గల దిలన్. 20 పట్టుమ్చి కోట ఒత్తల్తెచి జా రన్నుమ్
 గెచ్చయ్తి గన్నతె పండ్లు సుదిల, చి జా సుదిలిన్చి గన్న తెంతో
 లోయి సూయి జా గెలి. కెద్దిచి మెలె, ఏక్ గోడొక చప్లయితి కలెమ్చి
 ఎదిలి డొంకుతె జా లోయి బెర కెద్ది దూరిక పావిలి మెలె, దొన్ పుంజో
 మయిలుచి ఎదిలి దూరి పావిలి.

15

ఆకర్క దెత సత్తు సిచ్చల్

1 పడ్తో, పరలోకుమ్తె అన్నెక్ వెల్లి గుర్తు దెకిలయ్. జా వెల్లిచి,
 ఆచారిమ్చి గుర్తు కిచ్చొ మెలె, దేముడుచ సత్తు సిచ్చల్ అత్తి దెర తిల
 సత్తు దూతల్క దెకిలయ్. ఈంజ ఆకర్కచ సిచ్చల్ జవుల. కిచ్చొక మెలె,
 ఇన్నెయింతెన్ దేముడుచి కోపుమ్చి సిచ్చల్ కుటుల.

§ 14:16 14:16 మత్తయి 13:24-30 దెక. చెంగిల్చి తియ తయెదె, వెర్చిచి డయ గెలెదె.
 మత్తయి 13:36-43 దెక. జోవయిచి పున్నిమ్ జలనక పరలోకుమ్తె తియ తయెదె,
 పాపుమ్ తెన్ తా గెలనక వెల్లి ఆగి గొయ్తె గెలెదె.

² తెదొడి కిచ్చొ దెకిలయ్ మెలె, సీన రితి టేంటచి గాడు తెన్ ఆగి బెదిల్ రితి తిలిసి. అన్నె, జా సీన రితి టేంట తిలి గాడు సొడి, దేముడు దిల వీనెలు దెరన, జో జంతుక జీన, జోచి బొమ్మచి ఉప్పిరి చి జోచి నావ్చి ఉప్పిరి జిన్ల మాన్సుల్ టీవొజ తిలిన్ దెకిలయ్. ³ జేవ్ దేముడుచొ సేవ కెర్తొసా జలో మోసేచి గనుమ్ చి మెండపిల్లచి గనుమ్ గాయితె తిల,

“ఎత్కి సెక్తి అదికారుమ్ తిలో దేముడు ప్రబు,
తుచ కమొ వెల్లెల, అన్నె ఆచారిమ్చ!
ఎత్కి ఉగఉగల్క ఏలుప కెర్తొ వెల్లొ రానొ,
తుచ కమొ సరి జతిక, సత్తిమ్చ!

⁴ ఓ ప్రబువ, తుచి నావ్ కో కి బియఁ కెర, గవురుమ్ కెరుక!
తుయి ఎక్కిలొయి పరలోకుమ్చి సుద్ది తిలోసా,
ఎత్కి రాజిమ్లుచ జా కెర, తుక బక్తి కెరుక జా అస్తె;
తుచ తిర్పుల్క, తుచ సిచ్చల్క ‘సత్తిమ్చ’ నాయిమ్చ మెన
రుజ్జు అయ్లి రిసా”
మెన, గనుమ్ గాయల.

⁵ ఇన్నెచి పడ్డొ అన్నె ఆవ్ దెకితికయ్, పరలోకుమ్తె దేముడుచి గుడి జలి *టంబుగుడ్డతెచి ఆగ్గుల్ తిలి తెడిక తెడిచి గది ఉగ్గి జలి.

⁶ జా దేవులుమ్చి తెడిక తెడిచి గది తెంతొ †సత్తు సిచ్చల్ దెర్త సత్తు దూతల్ బార్ జల. కిచ్చొ గలన బార్ జల మెలె, ‡ఉజిడ్చ పూర్తి సుబ్రుమ్చ బట్టల్చ పాలల్, చి జోవయించ గుండెల్తె ఎక్కెక్ బజార్ రగుమ్ పట్కల్ బందన తిల.

* **15:5** 15:5 పూర్గుమ్, యూదుల్ బయలు దేసిమి దొన్ని విసా వెర్పుల్ బుత్తె తిలి పొది, ‘ఎత్కి అదికారుమ్ తిలో దేముడుచి గుడి’ మెన జోవయింక జో తెయార్ కెరయ్లి టంబుగుడ్డ తిలి. జేవ్చి తెడిక తెడిచి గదితె జో ఆగ్గుల్ రెగిడ్ల పత్తల్ తిలి పెటె తిలి. పడ్డొ చెంగిల్ గేర్ బంద ‘దేముడుచి గుడి’ మెన ఒత్తచి తెడిక తెడిచి గదితె జా ఆగ్గుల్ తిలి పెటె తిల.

† **15:6** 15:6 15:1. ‡ **15:6** 15:6 ఎత్కి అదికారుమ్ తిలో దేముడుచి గుడితె పూజర్లు దన పాలల్ గలన దన పట్కల్ బందన తవుల.

7 తెదొడి, కీచెత్తర్ జీవుల్తె ఏక్ జీవ్, జేవ్ సత్తు దూతల్క ఎక్కెక్ సత్తు బజర్చ గిన్నల్ దిలన్. జేవ్ గిన్నల్తె కిచ్చొ బెర తిలి మెలె, కెయక తెయక జితో దేముడుచి కోపుమ్చి సిచ్చు. 8 జా దేముడుచి గుడిచి తెడిక తెడిచి గదితె దేముడుచి ఉజిడి తెంతో చి జోచి సెక్కి తెంతో చి దుమ్ము బెర తిలి, చి జేవ్ సత్తు దూతల్ దెర్ల సత్తు సిచ్చల్ కుట్టితె ఎదక, కోయి జా దేముడుచి గుడిచి తెడిక తెడిచి గదితె పెసుక నెతిర్తి.

16

సత్తు సిచ్చల్ సత్తు దూతల్ బూలోకుమ్తె సువ దిలిసి

1 అన్నె కిచ్చొ సూన్లయ్ మెలె, ఏక్ వెల్లి అవాడ్ పరలోకుమ్తెచి జా దేముడుచి గుడి తెంతో సత్తు దూతల్క, “తుమ్ గెచ్చు, దేముడుచ సత్తు గిన్నల్చి కోపుమ్చి సిచ్చు బూలోకుమ్తె సువ గెల.” మెన సంగిలన్.

2 జాకయ్, తొలితొచొ దూత గెచ్చు, బుయిచి ఉప్పిరి జోచి గిన్నచి సిచ్చు సువ దిలన్. జో జంతుచి గుర్తు కెరవన జోచి బొమ్మక జొకర్ల ఎత్తి మాన్సుచి అగి ఒగ్గర్ అల్లర్చ గవ్వో జల.

3 దొన్నిచొ దూత జోచి గిన్నచి సిచ్చ సముద్రుమ్తె సువ దిలన్, చి మొర్లొ మాన్సుచి లోయిచి రితి జలి, చి సముద్రుమ్తెచి ఎత్తి జీవుల్ మొర్ల.

4 తిన్నిచొ దూత జోచి గిన్నచి సిచ్చ గడ్డెచి ఉప్పిరి, ఊటల్చి ఉప్పిరి సువ దిలన్, చి లోయి జా గెల. 5 పితి పాని లోయి జతి సిచ్చచొ జో దూత కిచ్చొ సంగిలిసి సూన్లయ్ మెలె, “తుయి అగ్గె తిలోసా, అప్పె తతోసా, పరలోకుమ్చి సుద్ది తిలోసా, తుచ తీర్పులు సిచ్చలు ఎత్తి సరిగా అస్తి.

6 కిచ్చొక మెలె, తుచయ్ జల మాన్సుల్చి లోయి, చి తుచ కబుర్లు సంగిల మాన్సుల్చి లోయి విరోదుమ్ జల మాన్సుల్ సువితికయ్,

జేవ్ తుచ మాన్సుల్చి లోయి సువిలనయ్ పింక మెన

జోవయింకయ్ లోయి దా అస్సిసి.

జోవయింక జెతి బట్వాడ్, జా!

జోవయించి పాపుమ్ జెవ్వి కతతి!”

మెన జో దూత సంగిలన్. ⁷ తెదొడి బలి దెతి టాన్ కిచ్చొ మెన కేక్ గల్లీన్ సూన్లయ్ మెలె,

“నిజుమి, ఎత్కి సెక్తి అదికారుమ్ తిలో దేముడు ప్రబు,

తుచ తీర్పులు సిచ్చలు సరిగచ, సత్తిమ్చ!”

మెన సంగితి సూన్లయ్.

⁸ తెదొడి, చెత్తర్చొ దూత పొద్దుచి ఉప్పిరి జోచి గిన్నచి సిచ్చ సువ దిలన్, చి జాచి ఆగిక మాన్సుల్కడయిక మెన, పొద్దుక సెలవ్ అయ్లి.

⁹ జేవ్చి ఒగ్గర్ వేడిక మాన్సుల్ డడ్డిల, చి దేముడుచి నావ్ దూసుప కెర్ల. కిచ్చొక మెలె, ఈంజేవ్ సిచ్చల్చి ఉప్పిరి జోక అదికారుమ్ అస్సి, చి ఈంజేవ్ సిచ్చల్ జో దిలన్చి రిసా. అన్నె, జేవ్ కెర్ల పాపల్క విసారుమ్ జతి నాయ్, ముల్తి నాయ్, చి జోక గవురుమ్ దెతి నాయ్.

¹⁰ పాచ్చొ దూత జోచి గిన్నచి సిచ్చ, జో వెర్రి జంతుచి సిజాసనుమ్చి ఉప్పిరి సువిలన్, చి జంతుచి రాజిమ్ అందర్ జా గెలి. మాన్సుల్, జలె, జేవ్క అయ్లి సైమల్చి రిసా, జోవయించ జిబుల్ చప్లన్తె తిల. ¹¹ జోవయించి నొప్పి జోవయించ గావ్వొచి రిసా పరలోకుమ్ తిలో దేముడుక సాపెనల్ సంగిల, గని జేవ్ కెర్ల కమొక విసారుమ్ జతి నాయ్, ములిత్ నాయ్.

సొవ్వొచొ దూత సువ దిలి సిచ్చ

¹² సొవ్వొచొ దూత జోచి గిన్నచి సిచ్చ * యూఫ్రటీసు మెలి వెల్లి గాడుచి ఉప్పిరి సువ దిలన్, చి తూర్పు పక్క తెంతో జెత రానల్ జెతికయ్ వాటు తెయార్ జతి రిసా జాచి పాని అట్ట గెలి. ¹³ పడ్డొ

* **16:12** 16:12 యూదుల్చి దేసిమ్క జా గాడు తూర్పు పక్కయ్ తయెదె. ఇదిల్ దూరి తయెదె.

†వెల్లో జో అయిచి చోడి తెంతో, ‡వెర్రె జో జంతుచి చోడి తెంతో అన్నెసి దేముడుచ కబుర్లు సంగిలోసా అవ్ మెన అబద్దుమ్మక సంగితోసాచి చోడి తెంతో మండుకుల్చ రిత తిన్ని బూతల్ బార్ జలిసి దెకిలయ్. 14 జేవ్, నయ్తాన్చి సేవ కెర్త బూతల్ జవుల, చి వెల్లెల వెల్లెల కమొ కెర కెర, ఒండి లోకుమ్చ రానల్తె గెతతి. కిచ్చొక మెలె, ఎత్కి సెక్తి అదికారుమ్ తిలో దేముడు జోచి సెక్తి అదికారుమ్ దెకయ్తి వెల్లి సిచ్చ కెర్తి దీసిచి యుద్దుమ్మక తెయార్ జతి రిసా, జేవ్ రానల్క ఎక్కితె కుడవుక. 15 జలె, ఎబ్రి బాస తెన్ *‘హర్మెగిడ్దోసు’ మెలి టాన్తె జేవ్ రానల్క జేవ్ బూతల్ కుడయ్ల.

16 యేసుప్రబు సంగిలిసి ఏక్ కిచ్చొ మెలె, “ఈందె, మాన్సుల్ నే ఉచర్లె పొది కీసి చోరు జెయెదె గే, దస్సి అవ్ జెయిందె. అయ్లె, కో తెలివి తా, డుమ్డోయ్ నే జతె లాజ్ నే బెట్టిత్ రితి జోవయింద పాలల్ సుద్ది తతి రితి దెకనుల గే, జోవయింకయ్ చెంగిలి” మెన ప్రబు సంగితయ్.

17 సత్తుచొ దూత జోచి గిన్నచి సిచ్చ ఆగాసుమ్చి వాదుచి ఉప్పిరి సువ దిలన్, చి పరలోకుమ్చి దేముడుచి గుడి తెంతో, సిజాసనుమ్ తెంతో, గట్టిజ అవాడ్ తెన్ కిచ్చొ సంగిలన్ మెలె, “జర్గు జలి!” మెలన్, 18 చి బిజిలి మొల్కిలి, అవాడ్ అయ్లి, ఉర్ముల్ కెర్లి, చి ఒగ్గర్ వెల్లి బూకంపుమ్ అయ్లి. కెర్లి వెల్లిచి మెలె, మాన్సుల్ బూలోకుమ్తె తొలితో తిలిసి తెంతో కెయ్య నే జర్గు జలి ఎదిలి బూకంపుమ్ అయ్లి. 19 జా బూకంపుమ్ జతికయ్, వెల్లి పట్నుమ్ తిన్ని వాటల్ జా గెలి, చి దేముడుక నేన్ల మాన్సుల్చ రాజిమ్లచ పట్నల్ పాడ్ జల. చి

† 16:13 16:13 నయ్తాన్ జయెదె. 12:3, 9. ‡ 16:13 16:13 13:1 దెక.

§ 16:13 16:13 బుయి తెంతోచొ జంతు; 13:14, 19:20. * 16:15 16:15 ‘హర్మెగిడ్దోసు’ ఏక్ వేల యూదుల్చి దేసిమ్క ఉత్తర పక్కచి ‘హర్మెగిడ్దోసు’ మెలి టాన్ జయెదె. జేవ్ రానలు సుకా గెలి యూప్రటీసు గాడ్ వాట్ జెవుల, గెద. జా యూప్రటీసు వెల్లి గాడు యూదుల్చి దేసిమ్క తూర్పు పక్క జయెదె.

జోచి ఎదివాట్ కోపుమ్చి సిచ్చచి గిన్నయ్ తిలిసి జా †వెల్లి బబులోసు పట్టుమ్చ మాన్సుల్ పూర్తి పియ గెల్తి రితి, దేముడు నే పప్పితె జర్గు కెర్లన్. ²⁰ పడ్డో ఎత్తి డిబ్బ ఉట్ట నిగిల్ రితి జా డిస్తి నాయ్, చి కేన్ డొంగుర్లు డిస్తి నాయ్. ²¹ అన్నె, వెల్లో వెల్లెల కరపత్తల్ ఆగాసుమ్ తెంతో మాన్సుల్చి ఉప్పిరి సేడ్ల. ఏక్ ఏక్ కరపత్తుర్ దొన్ని విసా దెసు కేజిల్ చి ఎదిలి జాడు తవుల, చి జా సిచ్చ కెద్ది అల్లర్ కెర్లి మెలె, ఒగ్గర్ ఒగ్గర్ అల్లర్చి రిసా, జా సిచ్చచ దెబ్బల్క మాన్సుల్ దేముడుక సాపెనల్ కెర్ల.

17

వెల్లి లంజెచి తేర్బోద మెన వెల్లి బబులోసు

¹ తెదొడి, సత్తు గిన్నల్ దెర తిల సత్తు దూతల్తె ఏక్ దూత అంచితె జా కెర కిచ్చొ సంగిలన్ మెలె, “తుయి ఇన్నె వెగ జే! ఒగ్గర్ పానివొచి ఉప్పిరి వెన తిలి వెల్లి లంజె జలి తేర్బోద సిచ్చ జతిసి దెకయిందె. ² జాచి తెన్ బూలోకుమ్చ రానల్ లంజె జా అస్తి, చి జాచి లంజెచి ద్రాచ రస్సుమ్ పియ పియ, బూలోకుమ్తె జితన మచ్చయి అస్తి” మెన సంగిలన్.

³ తెదొడి జో దూత అంక ఏక్ బయిలె కడ నిలన్, చి దేముడుచి సుద్ది తిలి ఆత్మసెక్కిక కిచ్చొ దెకిలయ్ మెలె, ఒగ్గర్ ఎరన తిలి జంతుతె ఏక్ తేర్బోద వెన తిలి. జా జంతు కిసా తిలొ మెలె, జాచి ఆగ్ ఎత్తిచి ఉప్పిరి దేముడుక దూసుప కెర్త నవ్వొ, కొదొయ్ని గలన తిలన్. జాక సత్తు బోడివొ, దెన్ను కొమ్మల్ తిల. ⁴ జా తేర్బోద *ఊద రంగు చి ఎరన రంగుచ పాలల్ గలన తా, బజరి, రత్నాలు, ముత్యల్, తియన తిలి. జాచి అత్తి కిచ్చొ తిలి మెలె, జాచి లంజెచ వెట్కారలు కీడ్లు బెర తిలి బజర్చి గిన్న దెర తిలి. ⁵ పడ్డో జాచి నిర్దె గుట్టుచి ఏక్ నావ్ రెడ్ల

† **16:19** 16:19 ఈంజ ‘డిసయ్లిన్’ చి పుస్తకుమ్తె కేన్ సుట్టు ‘బబులోసు పట్టుమ్’ మెలె, రోమ్ పట్టుమ్క టాలి జతయ్, బెర్తె. గని పడ్డో తిల అన్నె దస అల్లర్చ పట్నల్ రాజిమ్లుచి రిసా కి ఉచరుక జయెదె. **17:4** 17:4 ఊద రంగు మెలె, ఎరన చి నీలిమ్ రంగు బెదయ్లె ఊద రంగు జయెదె.

తిలి. [†]‘వెల్లి బబులోను పట్టుమ్, లంజె జల తేర్బోదల్క అయ్యసి, బూలోకుమ్చ వెట్కారల్క అయ్యసి’ మెలి నావ్ రెగ్గ తిలి. ⁶ అన్నె, జా తేర్బోద కిసి తిలిసి దెకిలయ్ మెలె, దేముడుచ జల మాన్సుల్చి లోయిక, చి యేసుచి నావ్చి రిసా విరోదుమ్ సుదల్ మార్ల మాన్సుల్చి లోయిక, జా తేర్బోద మచ్చ తిలి. జా తేర్బోదక దెక, బలే ఆచారిమ్ జలయ్. ⁷ గని దూత అంక, “కిచ్చొక ఆచారిమ్ జతసి? జా తేర్బోదచి రిసా, చి సత్తు బోడివో దెస్సు కొమ్ముల్ తిలి, జా వెసిలో జంతుచి రిసాచి గుట్టుచి అర్దుమ్ తుక సంగిందె. ⁸ జలె, తుయి దెకిలో ‡జంతు అగ్గె తిలన్, గని అప్పె నాయ్, చి కీమట్టు నెంజిలి జా వెల్లి గొయి తెంతో జో వెగ జా, నాసినుమ్ జా గెచ్చుక అస్సె. జలె, ‘పరలోకుమ్తె జా జితు’ మెన లోకుమ్ నే జెర్మయ్లి అగ్గె తెంతో మెండపిల్ల జలో యేసు ఏక్ *పుస్తకుమ్తె జోక నంపజతనచ నావ్వి రెగ్గ అస్సె. జలె, బూలోకుమ్తె జితనతె కచ నవ్వో జా పుస్తకుమ్తె తయె నాయ్ గే, జో జంతుక దెకుకయ్ ఆచారిమ్ జవుల. జో తిలో, అప్పె నాయ్, గని పడ్డొక అన్నె బార్ జయెదె.

⁹ “ఈంజ ఎత్కి అర్దుమ్ కెరనుక జలె, బుద్ది గ్యానుమ్ అవ్సురుమ్. జంతుచ సత్తు బోడివో కిచ్చొ జవుల మెలె, జా తేర్బోద వెన తిల †సత్తు మెట్టల్. ¹⁰ అన్నె, సత్తు రానల్ జేవ్ జవుల. జేవ్ రానల్తె పాచ్జిన్ కేడ అస్తి, ఎక్కిలో అప్పె అస్సె, చి అన్నెక్లో జెంక నేతయ్, అన్నె, జో అయ్లె, ఎక్కి గడియకయ్ తయెదె. ¹¹ అగ్గె తిలో

† 17:5 17:5 ‘వెల్లి బబులోను’ మెలె, రోమ్ పట్టుమ్క టాలి జతయ్. జా పట్టుమ్ జా రాజిమ్చ రానల్ నంపజలనక జేవ్ పొదులె ఒగ్గర్ అల్లర్ కెర్తె తిల. ఒత్త తెంతో ఒగ్గర్ రాజిమ్లుచ కి దన అల్లర్ కెర అస్సి. ‡ 17:8 17:8 ఏక్ వేల రోమ్ దేసిమ్చ నీరో కైసర్ రానొక; మెలె వెల్లి రానొక; ‘జంతు’ మెన సంగితయ్ మెన సగుమజిన్ ఉచర్తతి. జో నీరో నంపజలనక ఒగ్గర్ అల్లర్ కెర తా అత్య కెరన్లన్, గని జోవయించి బుద్ది తిలో దోమితియన్ మెలోసా సగుమ్ వెర్సుల్ గెలి పడ్డొ కైసర్ రానొ జలన్, చి జో కి నీరోచి రితి నంపజలనక ఒగ్గర్ అల్లర్ కెర్లన్. జో కి ‘ఆవ్ ఎత్కి అదికారుమ్ తిలో దేముడు’ మెన సంగితె తిలన్. అన్నె దన అల్లర్ కెర్లన్ పడ్డొ తిల. § 17:8 17:8 11:7 దెక. * 17:8 17:8 3:5, 13:8 దెక.

† 17:9 17:9 రోమ్ పట్టుమ్ సత్తు మెట్టల్చి ఉప్పిరి తిలి.

అప్పె నెంజిలో జో జంతు, జలె, జో అట్టుచొ రానొ జయెదె, గని జేవ్ అన్నె సత్తుజిన్తె బెదితోసా జయెదె, చి జో నాసెనుమ్ జా గెచ్చుక అస్సె.

¹² “పడ్డె తుయి దెకిల దెస్సు కొమ్ముల్ కిచ్చొ జవుల మెలె, ఏలుప కెర్తి అదికారుమ్ నేతయ్ గని అదికారుమ్ దొర్కు జా దెస్సుజిన్ రానల్ జవుల. జేవ్చి సమయుమ్ జా అయ్లె, జో జంతు తెన్ ఎక్కి గడియకయ్ రానల్ జా ఏలుప కెర్తి సెక్తి జేవ్క దొర్కు జయెదె.

¹³ ఈంజేవ్ ఎక్కి ఉద్దెసుమ్ తా, జో జంతుచి అత్తి జోవయించి సెక్తి జోవయించి అదికారుమ్ సార్పు కెర దా, జోవయించి కామ్ జర్గు కెర దెవుల. ¹⁴ ఈంజేవ్ జో మెండపిల్లచి ఉప్పిర్ యుద్దుమ్ కెరుల, చి ‡మెండపిల్ల జోవయించి ఉప్పిరి జీనెదె. కిచ్చొక మెలె, ప్రబుల్క ప్రబు, రానల్క రానొ జో, చి జో తెన్ తిలసక కిచ్చొ మెనుక జయెదె మెలె, జో నిసాన బుకార్లన, జోక నిదానుమ్ తిలస మెన జో దూత అంక అర్దుమ్ సంగిలన్.

¹⁵ “తెదొడి అన్నె, జా తేర్బోద వెన తిలి టాన్ తుయి దెకిల పానివొ కిచ్చొ జవుల మెలె, ప్రెజల్, జనాబ్, రాజిమలు అన్నె బాసల్ కొడొ జతనక. ¹⁶ పడ్డె, తుయి దెకిల దెస్సు కొమ్ముల్ జల రానల్, జలె, జంతు తెన్ బెద, లంజె జా తిలి తేర్బోదక జేవ్ ఒగ్గర్ విరోదుమ్ జవుల. జేవ్ జాక కీపాడ్ కెర, డుమ్డి కెర, జాచి ఆగ్చి సిద్ద కా కెర, జాక ఆగితె డయ గెలుల. ¹⁷ కిచ్చొక మెలె, దేముడు సంగిల కొడొచి కామ్ పూర్తి నెరవెర్పువ జతె ఎదక, జేవ్ ఎక్కి మెన్ను తా జోవయించి ఇస్టుమ్ జర్గు కెరుక మెన, జో జంతుచి అత్తి జోవయించి రానల్చి సెక్తి అదికారుమ్ జేవ్ సార్పు కెర దా, జోచి కామ్ జర్గు కెరుక మెన, దేముడుయి జర్గు కెర అస్సె. ¹⁸ అన్నె, తుయి దెకిలి తేర్బోద కొన్ని మెలె, బూలోకుమ్చ రానల్చి ఉప్పిరి అదికారుమ్ తిలి *వెల్లి పట్టుమ్ జయెదె,” మెన దూత అంక సంగిలన్.

‡ 17:14 17:14 యేసుప్రబు, గెద. § 17:16 17:16 పడ్డె రోమ్ పట్టుమ్చి రాజిమ్

దన అల్లర్ జలి. * 17:18 17:18 జేవ్ పాదులె రోమ్ పట్టుమ్క దస్సి సెక్తి తిలి. పడ్డె అన్నె నగుమ్ దేసిమలు దన అల్లర్ కెర అస్సి.

18

బబులోను చి తీర్పు

¹ ఇన్నెచి పడ్డొ కిచ్చొ దెకిలయ్ మెలె, అన్నెక్ దూత పరలోకుమ్ తెంతొ ఉత్త్ర అయ్లెసి దెకిలయ్. జోక ఒగ్గర్ అదికారుమ్ తిలి. జోచి ఒగ్గర్ ఉజిడిక ఒండి బూలోకుమ్ ఉజిడ్ జా గెలి. ² పడ్డొ గట్టిజ అవాడ్ కెరన కిచ్చొ మెన ఒర్న దిలొ మెలె,
“వెల్లి బబులోను సేడ గెచ్చు అస్సె, సేడ గెచ్చు అస్సె.

జా బూతల్ జితి టాన్ జా అస్సె;
ఎత్కి వెట్కారుమ్చి బూతుమ్ రకితి టాన్,
ఎత్కి గర్చి పిట్ట రకితి టాన్ జా అస్సె.

³ కిచ్చొక మెలె, జేవ్చి లంజె ఆసచి రస్సుమ్ పియ రాజిమ్లు ఎత్కిచ మాన్సుల్ మచ్చు గెచ్చు అస్సి, చి జేవ్ తెన్ ఈంజ లోకుమ్చ రానలు లంజె జా అస్సి, చి జేవ్చి పాపుమ్చ ఆసల్చి సొమ్మారుమ్క ఈంజ లోకుమ్చ సావుకర్లు సొమ్మారుమ్ జా అస్సె.”
మెన జో దూత సంగిలన్.

⁴ తెదొడి, పరలోకుమ్ తెంతొ చి అన్నెక్ అవాడ్ కిచ్చొ సంగిలిసి సూన్లయ్ మెలె,

“జాచ పాపల్తె తూమ్ నే బెదితి రిసా,
జాచ సిచ్చల్చ దెబ్బల్ తుమ్క నే జెతి రిసా
అంచ ప్రెజల్, జాచి తెంతొ తుమ్ బార్ జా.

⁵ జా కెర్ల పాపల్ కెత్తి మెలె,
ఆగాసుమ్ ఎద పావెత్ రితి కొట్టు జతతి,
చి జా కెర్ల జాచ పాపల్
దేముడు నే పవ్వితె ఏదన్ల కెర్తయ్.

⁶ జా దిలి ఎదిలి జాక దా,
జా కెర్ల కమొచి కంట అన్నె జాక దొన్ని వాటల్ కెర,
జా కయ్లి గిన్నచి విస్సుమ్చి జా పితి రితి
అన్నె దొన్ని వాటల్ కలొవ దాస.

7 జాక జయ్యి కీసి గవురుమ్ ఉచరన పోకిరి కెరన్లి కొల్లి

జయ్యి నొప్పి జా ఏడ్డి రితి, సిచ్చ దాన.

‘ఆవ్ రాని జా వెన అస్సి,

రండెల్ మాన్సు నెంజి,

ఆవ్ కెయఁక ఏడుకుడు జంక నాయ్’

మెన జాచి పెట్టి ఉచరంతయ్.

8 జాక, ఎక్కి దీసి, జాక సిచ్చల్చ దెబ్బల్ లయుల.

కిచ్చొ సిచ్చల్ మెలె, మొర్పు, దుకుమ్, చి కరు జతిసి, చి ఆగితె డడ్డ
గెచ్చెదె.

కిచ్చొక మెలె, జాక తీర్పు కెర సిచ్చ దెతో ప్రబు జలో దేముడు సత్తుచొ”
మెన జా అవాడ్ సంగిలన్.

వెల్లి బబులోసుక నంపజల మాన్సుల్

9 దస్సి, వెల్లి బబులోసు తెన్ లంజె జా పోకిరి జల బూలోకుమ్చ
రానల్ జా డడ్డితి సిచ్చచి దుమ్మొ దెక, జాచి రిసా ఏడుకుడు జవుల.

10 జా సిచ్చ జత బాదల్క బియఁ కెర, దూరి టీవొజ తా కిచ్చొ మెన
ఏడుల మెలె,

“అయ్యో! అయ్యో! తుయి వెల్లి పట్టుమ్, తుయి వెల్లి బబులోసు
పట్టుమ్!

ఎక్కి గడియయ్ తుచి సిచ్చ జర్గు జలి!”

మెన ఏడుల.

11 అన్యె, బూలోకుమ్చ సావుకర్లు జాచి రిసా ఏడుకుడు జవుల.

జా గెలె, జాచి సామన్ అన్యె కోయి గెంతి నాయ్ చి రిసా ఏడుకుడు
జవుల. 12 కీస సామన్లు మెలె, బజార్ సామన్, వెండి సామన్,

రత్నాలు, ముత్యల్, చెంగిలి బట్ట, బట్టతె దెరయ్తి ఊద రంగు,
సిల్కు బట్ట, ఎరన బట్ట, ఎత్కి రగల్ వాసెనచి దారు, ఏనుగు కోరల్క
తెయార్ కెర్ల వస్తుల్, ఒగ్గర్ విలువచి దారుక తెయార్ కెర్ల వస్తుల్,
కంచు సామన్, ఇనుము సామన్, సూటి రగల్ పత్రల్క కెర్ల సామన్,

13 *దాల్చిమ్ చెక్కల్, బోడి గానంతి చెంగిల్ వాసిన తేలు, దూపుమ్, †అత్తర్ తేలు, గందుమ్, ద్రాచ రన్నుమ్, ‡మాములుమ్ తేలు, మెత్తన పీట్టు, గోదుము, సొమ్ముల్, మెండల్, గోడలు, రదుమ్లు, గొతిమాన్నుల్; మెలె మాన్నుల్చ జివుల్. 14 ఇన్నెతెన్ కిచ్చొ ఏక్ కోడు బెదితయ్ మెలె,

“తుయి పెట్టి ఆన జలి వంటొ తుక ముల దా అస్సె, అన్నె తుక కెయక అన్నె నే దొర్కు జతి రితి, తుచి సుక్కుమ్ తుచి బడాయ్ జలిన్ పూర్తి గెలి.”

15 జా లంజెచి పట్టుమ్తె జోవయించి సామన్ దొర్కు కెరన ఇన పుస్తకల్ వికిల సావుకర్లు కి దూరి టీవోజ, జాచి సిచ్చచ బాదల్క బియ: కెర, ఇని మెన ఎదార్దుమ్ ఏడుకుడు జవుల.

16 “అయ్యో! అయ్యో! చెంగిల చెంగిల బట్టల్, ఊద రంగుచ, ఎరన రంగుచ పాలల్ గలన, బజరి, రత్నాలు, ముత్యల్ తియన్లి వెల్లి పట్టుమ్ కెద్ది నస్టుమ్ జా అస్సె!

17 ఎక్కి గడియయ్ జాచి సొమ్మారుమ్ పూర్తి పాడ్ జా అస్సె!” మెన ఏడుకుడు జవుల.

పడ్డో, ఓడల్ ఇండయత ఎజొమాన్లు, సముద్రుమ్తె గెతన, ఓడల్తె కూలి కామ్ కెర్తన, చి సముద్రుమ్ జీన బియ్యారి కెర్త ఎత్కిజిన్ దూరి టీవోజ, 18 జా లంజెచి పట్టుమ్ డడ్డితిన్చి దుమ్మొ దెక, కిచ్చొ మెన ఒర్చిల మెలె,

“ఈంజ పట్టుమ్చి ఎదిలి కేన్ పట్టుమ్ అస్సె?”

మెన దుక్కుమ్ కేక్ గల. 19 జోవయించ బోడిలె దూడి వించన ఏడుకుడు జా కిచ్చొ మెన అన్నె కేక్ గల మెలె,

“అయ్యో! అయ్యో! సముద్రుమ్తె గెత ఓడల్ తిలన ఎత్కిజిన్

జేవచి సొమ్మారుమ్క సొమ్మారుమ్ జలి వెల్లి పట్టుమ్

* 18:13 18:13 తియన వస్తవల్తె రోసుల్తె గలుక జయెదె. † 18:13 18:13 ఏక్ రగుమ్ చెంగిల్ వాసిన తేలు. ‡ 18:13 18:13 జా దస్సి ఒలివ పండ్లుచి తేలు వాడిక కెరుల.

కెద్ది నష్టుమ్ జా అస్సె!
ఎక్కి గడియయ్ పూర్తి నాసెనుమ్ జా గెచ్చు అస్సె!

20 ఓ పరలోకుమ్, దేముడుచ ఓ మాన్సుల్,
జోచ బారికుల్ జలన, జోచ కబుర్లు సంగిలన,
జాచి రిసా సర్ద జా!
కిచ్చొక మెలె,
జా తుమ్క అల్లర్ కెర్లి రిసా,
దేముడు జాక తీర్పు కెర,
సిచ్చు కెర అస్సె.”
మెన కేక్ గల్ల.

21 తెదొడి, సత్తుచొ ఏక్ దూత ఎక్కిలో తిర్వేలిచి ఎదిలి జాడుచి ఏక్
పత్తురు ఉక్కుల, సముద్రుమ్తె గల కిచ్చొ మెన సంగిలన్ మెలె,
“ఓ బబులోను వెల్లి పట్టుమ్,
తుయి ఇసి డీస గలి జా అన్నె కెయ్యళ కి డీసె నాయ్.

22 అన్నె వీన బజాయ్తి అవాడ్, ఎత్తి బజెన బజాయ్తిసి,
మూరి పుజితిసి, నప్పిర్మూరి పుజితిసి,
అప్పె తెంతో కెయళ కి తుచితె కో సూన్తి నాయ్.
అన్నె, కిచ్చొ రగుమ్ కామ్ కెర్తన కి
తుచితె కెయళ అన్నె తతి నాయ్.
అన్నె, తిర్వేలి బులితి అవాడ్
తుచితె కెయళ అన్నె కోయి సూన్తి నాయ్.

23 అన్నె, తుచితె కేన్ దీవుచి ఉజిడి
అన్నె కెయళ లగె నాయ్.

అన్నె, పెండ్లి ఉబెడొ పెండ్లి ఉబేడ్చి అవాడ్లు
తుచితె అన్నె కెయళ కో సూన్తి నాయ్.
కిచ్చొక మెలె, తుచ సావుకర్లు ఒండి లోకుమ్క వెల్లొ జా తిల,
చి తుచి మెంగుర్ కామ్క ఎత్తి రాజిమ్లుచ మాన్సుల్ మోసిమ్ జా
గెల.

24 అన్నె, జేవ్తెయి దేముడుచ కబుర్లు సంగితనచి,

జోవయించయ్ జల మాన్సుల్ ఎత్తిజిన్చి,
అన్నె బూలోకుమ్తె మాన్సు మార్లస ఎత్తిజిన్చి
లోయి జా పట్టుమ్తె డీసిలిచి సిచ్చ జలి”
మెన సత్తుచొ జో దూత సంగ సముద్రుమ్తె వెల్లో పత్తురు గలిలన్.

19

జా లంజెచి పట్టుమ్క ప్రబు సిచ్చ కెర్లిసి

¹ ఇన్నెచి పడ్డొ, పరలోకుమ్తెచ ఒగ్గర్జిన్ జనాబ్ జట్టు తెన్ కేక్
గలిన్చ అవాడ్లు సూన్లయ్. కిచ్చొ మెన కేక్ గల మెతె,
“*దేముడుక జెయ్యి!

రచ్చన, గవురుమ్, సెక్తి, అమ్చొ దేముడుతెయి అస్సె!

² “జోచ తీర్పులు సిచ్చలు సత్తిమ్చ, సరిగచ.

జేవ్చ లంజె కమొక ఒండి లోకుమ్క నాసెనుమ్ కెర్లి జా వెల్లి లంజెక
జో తీర్పు కెర సిచ్చతె గల అస్సె,
చి జోచ సేవ కెర్తసచి లోయి జా సువ దిలి రిసాచి సిచ్చ
జో నెరవెర్పుప కెర అస్సె.”

మెన కేక్ గల, ³ అన్నెక్ సుట్టు ఇసి మెన కేక్ గల,
“దేముడుక జెయ్యి!

జా లంజె జలి వెల్లి పట్టుమ్ డడ్డ గెలి దుమ్మొ

నే కుట్టితె కెయ్తె తెయ్తె వెగ గెతయ్!”

మెన కేక్ గలిల.

⁴ తెదొడి †విస్సెక్ చెత్తర్జిన్ వెల్లెల మాన్సుల్, చి ‡సింగాసనుమ్చి
సుట్టునంత టీవోజ తా చెత్తర్ జిపుల్ సెర్పు సేడ, సింగాసనుమ్తె వెన
తిలో దేముడుక,
“అమేన్! దేముడుక జోబర!”

* **19:1** 19:1 జోవయించి బాస తెన్ ‘హల్లెలూయా!’ మెన కేక్ గలుల, ‘ఎత్తి అదికారుమ్
తిలో దేముడుక జెయ్యి!’ మెలి అర్దుమ్ తెన్ † **19:4** 19:4 4:4 దెక. ‡ **19:4** 19:4
4:6-8 దెక.

మెన నంగ బక్తి కెల్ల. ⁵ అన్నె, కిచ్చొ మెన నంగ సిజాననుమ్ తెంతొ ఏక్ అవాడ్ అయ్లీ మెలె,
 “తుమ్ జోచ సేవ కెర్తన, తుమ్ జోక బితన, బాల వెల్లో ఎత్కిజిని,
 అమ్చొ దేముడుచి గవురుమ్ గాయ!”
 మెన అవాడ్ అయ్లీ.

మెండపిల్లచి పెండ్లి

⁶ తెదొడి ఒగ్గర్ పానివొ నూయి జతి అవాడ్ అయ్లీ రితి, ఒగ్గర్ ఉర్పుల్ కెర్లిన్చి అవాడ్ అయ్లీ రితి, ఒగ్గర్ జిన్ జనాబ్చ అవాడ్లు రితి నూన్లయ్. కిచ్చొ మెన కేక్ గల్ల మెలె,

“ఎత్కి సెక్తి అదికారుమ్ తిలో దేముడుక జోబర!

ప్రబు జలో అమ్చొ దేముడు ఏలువ కెర్తయ్!

⁷ మెండపిల్లచి పెండ్లి జతి సమయుమ్ జా అయ్లీ, చి

కేపెండ్లి ఉబేడ్ తెయార్ కెరన అస్సెచి రిసా

ఆవ్ నర్దసంతోసుమ్ జా, జోక గవురుమ్ కెరుమ!

⁸ పెండ్లి ఉబేడ్ చొక్కిల్చి పూర్తి సుద్దిచి చెంగిలి బట్ట గలనుక మెన జాక దిల!”

మెన కేక్ గల్ల. జా చెంగిల్ బట్టక కిచ్చొ అర్దుమ్ మెలె, * ఎత్కి అదికారుమ్ తిలో దేముడుచ జల మాన్సుల్చ పున్నిమ్చ కమె జవుల.

⁹ అన్నె జో దూత అంక కిచ్చొ సంగిలన్ మెలె, “ఇసి రెగుడు, ‘మెండపిల్లచి పెండ్లి విందుతె బుకార్లనక చెంగిలి’ మెన రెగుడు” మెలన్, చి అంక అన్నె, “ఈంజ కొడొ దేముడుచి సత్తిమ్చ కొడొయ్” మెలన్. ¹⁰ తెదొడి, బక్తి కెరుక మెన, జో దూతచి చట్టె సెర్పు సేడ్లయ్, గని అంక జో, “దస్సి కెరుక నాయ్. తుచి రితి, యేసుక నంప కెర్ల తుచ

§ 19:7 19:7 ‘మెండపిల్లక గెతి బూలి’ మెలె కిచ్చొ అర్దుమ్ తయెదె మెలె, యేసుక్రీస్తుక నంపజలన మొత్తుమ్, నంపజలన మొత్తుమ్చి సంగుమ్, ఎపెను కచి ఉత్తుమ్ 5:31-32, యిర్మీయా 2:1-3, యెసయా 49:18, 69:10. పడ్డొ జేవ్ నంపజలన గెచ్చ జింక తిలి నొవి యెరూసలేమ్, మెలె వరలోకుమ్చి పట్టుమ్క కి ‘మెండపిల్లచి బూలి’ మెనుల. 21:9, 10.

* 19:8 19:8 నెంజిలె ‘ప్రబుచయ్ జల మాన్సుల్’ మెనుక జయెదె.

బావుడ్లుచి రితి జయిందె. మెలె, దేముడుక సేవ కెర్తొసా జయిందె. అంక పోని, గని దేముడుకయ్ జొకరు.” మెలన్. కిచ్చొక మెలె, యేసు సంగిలి జో దెకయ్లి సాచి, దేముడు సంగిలొ కబుర్లు ఎక్కి ఆత్మ తెంతొచ.

చొక్కిలొ గోడొతె వెగ జెతొసా

11 తెదొడి కిచ్చొ దెకిలయ్ మెలె, పరలోకుమ్ ఉగ్గి జా తిలిన్ దెకిలయ్, చి ఆదె! చొక్కిలొ గోడొ! జోతె వెసిలొసాచి నావ్ కిచ్చొ మెలె, ‘నిదానుమ్చొ, సత్తిమ్చొ’. చి సత్తిమ్చ తీర్పుల్ కెర, ‘దేముడుచి సత్తిమ్ జీనున్’ మెన, యుద్దుమ్ కెర్తయ్. 12 జోచ అంకివొ కిస మెలె, ఆగి లగిల్ రితి, చి జోచి బోడితె ఒగ్గర్ కిరీటల్ అస్తి. జోచి అగి రెగిడ్లి నావ్ ఏక్ అస్సె. గని కిచ్చొ నావ్ గే ఎక్కి జోకయ్ ఎర్కె, గని అన్నె కక్కయ్ నాయ్. 13 లోయితె బుడ్డ తిలొ పాలుమ్ జో గలన అస్సె, చి జోక తిలి నావ్ కిచ్చొ మెలె, ‘దేముడుచి †కోడు’ మెలి నావ్ తిలన్. 14 అన్నె, పరలోకుమ్చ సయ్న్యుములు కి, సుద్ది తిలి చొక్కిలి చెంగిలి బట్టచ పాలల్ గలన, చొక్కిల గోడల్తె జేవ్ కి వెగ, జోచి పట్టి గెతతి. 15 ఎత్తి అదికారుమ్ తిలొ దేముడుక ‡నేన్ల మాన్సుల్క మార్తి వాండి తిలి కండా జోచి చోడి తెంతొ బార్ జతయ్. గొవుడుచి ఇనుముడండొ తెన్ జోవయింక ఏలుప కెరెదె. ఎత్తి సెక్తి అదికారుమ్ తిలొ దేముడుచి సిచ్చచి కోపుమ్చి గిన్నతె జో సుడ, జేవ్ మాన్సుల్క కెర్తి సిచ్చ జో జర్గు కెరెదె. 16 జోచి పాలుమ్తె చి జోచి జంగయ్ చి ఉప్పిరి ఏక్ నావ్ అస్సె. ‘రానల్క రానొ, ప్రబుల్క ప్రబు’ మెలి నావ్.

ఆకర్చి యుద్దుమ్

17 తెదొడి కిచ్చొ దెకిలయ్ మెలె, పొద్దుచి ఉజిడతె టీవోజ తా ఏక్ దూత గట్టిజ అవాడ కెరన, పొద్దు ఆగాసుమ్చి మదెనె టీవోజ, పక్కయ్ ఉడ్డతె ఎత్తి పిట్టల్క కిచ్చొ మెన కేక్ గలొ మెలె, “తుమ్ జా! చి దేముడు దొర్కు కెర్తి వెల్లి విందుక తెయార్ జా తా. 18 రానల్చి

† 19:13 19:13 యోహాను 1:1.

‡ 19:15 19:15 నెంజెలి ‘నెసిల మాన్సుల్క’ మెనుక జయెదె.

సిద్ధ, వెయి జమాన్లుక వెల్లోచి సిద్ధ, ఒగ్గర్ సెక్తిబలుమ్ మాన్సుల్చి సిద్ధ, గోడల్చి సిద్ధ, జోవయింతె వెగితనచి సిద్ధ, ఎత్కి రగల్ మాన్సుల్చి సిద్ధ; జేవ్ గొతి నెంజిలస జలెకి, గొతిమాన్సుల్ జలెకి; బాల వెల్లోచి సిద్ధ కస్తె” మెన, దూత పిట్టల్క సంగిలన్.

19 తెదొడి కిచ్చొ దెకిలయ్ మెలె, జో పాపుమ్చొ జంతు, చి ఒండి లోకుమ్చ రానలు, జోచ సయన్యుముల్ తెన్ ఎక్కితె బెర్ల. కిచ్చొక మెలె, జో గోడొతె వెసిలోసాచి ఉప్పిరిచి జోచ సయన్యుముల్చి ఉప్పిరి యుద్దుమ్ కెరుక మెన బెర్ల.

20 తెదొడి సీజంతు దెర్ను సేడ్లొ, చి జో తెన్, జోచి నావ్ తెన్ వెల్లో మాయకమొ కెర్లొ అన్నెక్ *జంతు కి దెర్ను సేడ్లొ. జో అబద్దుమ్క దేముడుచ కబుర్లు సంగితొసా ఆవ్ మెన అగ్గె సంగ తిలన్. అన్నె, జో జంతుచి గుర్తు కెరవన, జోచి బొమ్మక బక్తి కెర తిలనక మోసిమ్ కెర తిలొ. జో కి దెర్ను సేడ్లొ. జలె, జేవ్ దొగులక జీవ్ తత్తె, ఎడ్డి రంగు లగితి వెల్లో అగి గొయ్చి గడ్డె గల దిల. 21 తెదొడి, గోడొతె వెసిలోసా జోచి కండా తెన్ రాసల్కచి జేవ్ సయన్యుములు ఎత్కిక మారయ్ గెలన్. జోచి చొండి తెంతొ బార్ జతి కండా తెన్ అన్నె, ఎత్కి పిట్టల్ జేవ్ మొర్లన్ ఎత్కిజిన్చి సిద్ధ కా గెల కెర, పేట్ బెర్తె కయ్ల.

20

సయ్తాన్ మట్టు నెంజిలి గొయితె వెయి వెర్పుల్ తతి సిచ్చ జతిసి

1 అన్నె కిచ్చొ దెకిలయ్ మెలె, పరలోకుమ్ తెంతొ దూత ఎక్కిలో ఉత్త జెతె తిలిసి దెకిలయ్. జోచి అత్తి మట్టు నెంజిలి జా *వెల్లి గొయిచి తాలుమ్ కడి, చి జాడు తిలి ఏక్ ఇనుము గొల్పు తిల. 2 తెదొడి వెల్లోచొ జో అయిక, జలె పూర్గుమ్ తెంతొచొ అయిక, మెలె, సయ్తాన్ జలొ సయ్తానుక దూత దెర కెర, వెయి వెర్పుల్ జో దస్సి తతి రితి జోక బంద గెల కెర, 3 మట్టు నెంజిలి జా గొయితె గల దా, వెయి వెర్పుల్

§ 19:20 19:20 సముద్దుమ్ తెంతొ బార్ జలొసా 13:1. * 19:20 19:20 బుయి తెంతొ బార్ జలొసా 13:11. * 20:1 20:1 9:1 దెక.

గెతె ఎదక దేముడుక నేన్ల మాన్సుల్క జో అయి అన్నె నే మోసిమ్ కెర్తి రిసా, జోచి ఉప్పిరి డంక దిలన్. జా వెయి వెర్పుల్ గెలె, జోక గడియ విడ్డల్ కెరుక.

క్రీస్తు తెన్ వెయి వెర్పులు ఏలుప కెరుక

⁴ తెదొడి కిచ్చొ దెకిలయ్ మెలె, సిజాసనల్, చి జోవయించి ఉప్పిరి కో వెన తిల మెలె, బూలోకుమ్చ దేసిమ్లు ఎత్కిక ఏలుప కెర్తి రిసా దేముడు సెలవ్ దిలన. కొన్స మెలె, యేనుచి రిసా జేవ్ సాచి సంగ తిలి రిసా, చి దేముడుచి కోడు జేవ్ దెరన్లి రిసా, బోడి గండల్ జలన, చి అన్నె కొన్స మెలె, జో పాపుమ్చొ జంతుక చి జోచి బొమ్మక బక్తి నే కెర్లన, జోచ నిర్దెలె అత్తిలె జోచి గుర్తు నే కెరవన్లన. జేవ్ జలె, జివ్ జా ఉట్టిల, చి వెయి వెర్పులు క్రీస్తు తెన్ ఏలుప కెర్ల. ⁵ ఈంజయ్ జివ్ జా ఉట్టిన్క 'తొలితొ చి' మెనుక జయెదె. తొలితొచి ఈంజ జివ్ జా ఉట్టిన్తె బెదితనక చెంగిలి. ఎత్కి అదికారుమ్ దేముడుచ జేవ్ జవుల! కిచ్చొక మెలె, జోవయించి ఉప్పిరి †పడ్డొకచి మొర్నుక కిచ్చొ అదికారుమ్ తయె నాయ్. ⁶ తొలితొ చి జివ్ జా ఉట్టిసి జతన దేముడుక చి క్రీస్తుక పూజర్లు రిత జవుల, చి వెయి వెర్పుల్ పూర్తి జో తెన్ ఏలుప కెరుల.

సయ్తాన్ అన్నె విడ్డల్ జా యుద్దుమ్ కెర్తిసి

⁷ జేవ్ వెయి వెర్పుల్ కేడ్లె, జో జేలి జలిసి తెంతొ సయ్తాన్ విడ్డల్ జా, ⁸ 'గోగు' 'మాగోగు' మెన బూలోకుమ్చ చెత్తర్ పక్కలెచ దేముడుక నేన్ల మాన్సుల్ యుద్దుమ్క తెయార్ జతి రితి, జో సయ్తాన్ జోవయింక మోసిమ్ కెరెదె. జేవ్ మాన్సుల్చి లెక్క కెడ్లి మెలె, సముద్రుమ్తెచి ఇన్సుగిడ్డల్ కెత్తి జా లెక్క కెరుక నెంజె గే, తెదివాట్ జిన్ జవుల. ⁹ తెదొడి జేవ్ బూలోకుమ్చి రుందిలి టాన్తె వెగ జా, దేముడుచ జల మాన్సుల్చి సుట్టునంత, చి జో ‡ప్రేమ తిలి

† 20:5 20:5 మెలె, వెల్లో ఆగి గోయచి సిచ్చతె గెతిసి. 20:14. ‡ 20:9 20:9 డొన్నె అర్థల్ ఉచరుక జయెదె. ఏక్ మెలె, మాములుమ్ యెరూసలేమ్ పట్టుమ్. అన్నెక్ మెలె, కేనె ప్రబుచయ్ మాన్సుల్ తవుల గే, ఒత్తయ్ మెన ఉచరుక జయెదె.

పట్టుమచి నుట్టునంత బెర అయ్యె. గని పరలోకుమ్ తెంతో దేముడు తెంతో ఆగి సూయి జా జోవయింక డయ గెలి. ¹⁰ జోవయింక మోసిమ్ కెల్లో నయతాన్ సిచ్చ జతె తంక ఎడ్డి ఆగి లగితి వెల్లి ఆగి గొయ్తె కీగలి జలో. జో పాపుమ్చొ జంతు, అన్నె అబద్దుమ్క 'దేముడుచ కబుర్లు సంగితోసా ఆవ్' మెనల్లొసా కి ఒత్తయ్ గలి జా అస్తి. జేవ్ రాతి మెద్దెనె కెయ్తె తెయ్తె నే పిట్టె, ఒత్త సిచ్చల్ బాదల్ జతె తవుల.

మొర్లనక ఆకర్చి తీర్పు జతిసి

¹¹ అన్నె కిచ్చొ దెకిలయ్ మెలె, వెల్లి చొక్కిలి సిజాసనుమ్, చి జాచి ఉప్పిర్ వెసిలోసాక దెకిలయ్. జోతె తెంతో బూలోకుమ్ ఆగాసుమ్ నిగ గెల, చి జేవ్క అన్నె కేన్ టాన్ నాయ్. ¹² తెదొడి కిచ్చొ దెకిలయ్ మెలె, బాల వెల్లి మొర్లన ఎత్కిజిన్ సింగాసనుమ్చి పురై టీవ తతికయ్, పుస్తకల్ * ఉగిడ్ల. పడ్డొ అన్నెక్ పుస్తకుమ్ ఉగిడ్ల; పరలోకుమ్తె జింక సెలవ్ తిలనచ నవ్వొ రెగిడ్లి పుస్తకుమ్. జలె, మొర్లన జేవ్ కెర్ల కమొచి రిసా జేవ్ పుస్తకల్తె రెగ్ల తిలి రితి తీర్పు జల.

¹³ తెదొడి, జేవ్తె మొర్లనక సముద్రుమ్ సార్ప కెర దిలి, అన్నె మొర్లు చి మొర్లన రకితి టాన్ ఒత్త తెంతో తిలనక సార్ప కెర దిల, చి సముద్రుమ్తె మొర్లన, చి మొర మొర్లన, రకితి టాన్తె తిలన ఎత్కిజిన్ జివ్ జా, సింగాసనుమ్చి పురై టీవ, జేవొజ, జేవ్క కమొచి రిసా తీర్పు జవుల. ¹⁴ తెదొడి మొర్లు చి మొర్లన రకితి టాన్ వెల్లి ఆగి గొయ్చి గడ్డె † గలి జల. వెల్లి ఆగి గొయ్తె గల్లిసి దొన్నిచి మొర్లు జయెదె. ¹⁵ అన్నె, పరలోకుమ్తె జింక సెలవ్ తిలనచ నవ్వొ రెగిడ్లి పుస్తకుమ్తె కచి నావ్ తయె నాయ్ గే, జెవ్వి వెల్లి ఆగి గొయ్తె ‡ గలి జల.

§ 20:10 20:10 ఎత్కి అదికారుమ్ తిలొ దేముడు ఒత్త గలయ్లొ, గెద. * 20:12 20:12 క్కో ఉగిడ్ల గే సంగె నాయ్. † 20:14 20:14 ఎత్కి అదికారుమ్ తిలొ దేముడు ఒత్త గలయ్లొ, గెద. ‡ 20:15 20:15 ఎత్కి అదికారుమ్ తిలొ దేముడు ఒత్త గలయ్లొ, గెద.

21

నొవి ఆగాసుమ్, నొవి బుయి

¹ తెదొడి ఆవ్ కిచ్చొ దెకిలయ్ మెలె, నొవి ఆగాసుమ్, నొవి బుయి. అగ్గెచి ఆగాసుమ్ అగ్గెచి బుయి కేడ తిలి, చి సముద్రుమ్ కి నాయ్. ² పడ్డె, పరలోకుమ్చి సుద్దిచి పట్టుమ్, నొవి యెరూసలేమ్ పరలోకుమ్ తెంతొ దేముడు తెంతొ, మున్నుక జెతికయ్ పెండ్లి ఉబేడ్ రితి తెయార్ జా తా, ఉత్త జెతిసి దెకిలయ్. ³ అన్నె, సింగాసనుమ్ తెంతొ చి గట్టిజ అవాడ్చి అవాడ్ కిచ్చొ సంగిలిసి సూన్లయ్ మెలె, “ఈందె, దేముడు జితి టాన్ మాన్సుల్తెయి అస్సె. జోవయింతెన్ జో జియెదె. జేవ్ జోచయ్ ప్రెజల్ జా తవుల, చి జో సొంతయ్ జేవ్ తెన్ తయెదె, జేవ్ దేముడు జా తయెదె. ⁴ జోవయించ అంకివొతె ఆనునొ కెయళ అన్నె నే జెతి రితి, జోవయించ ఆనునొ జొయ్యి పుంచ గెలెదె, చి అప్పె తెంతొ కిచ్చొ మొర్ను తయె నాయ్. ఏడుకుడు జితిసి, ఏడ్డిసి, నొప్పి కి తయె నాయ్. కిచ్చొక మెలె, పొర్నిచి ఎత్తి ఉట్ట గెలె.” మెన జా అవాడ్ సంగిలన్.

⁵ తెదొడి, సింగాసనుమ్తె వెసిలోసా, “ఈందె, ఎత్తి నొవి తెయార్ కెర్తసి” మెన, అన్నె, “ఈంజ ఎత్తి రెగుడు. ఈంజేవ్ కొడొ సత్తిమ్చ, నంపజతన” మెన జో సంగిలన్. ⁶ తెదొడి అంక, “పూర్తి జర్గు జలి, ‘అల్పా, ఓమెగ’ మెన ఆవ్ మొదొల్చొ, ఆకర్చొ. కక్క తాన్ కెర్లె, డబ్బుల్ నే దెతె, జీవ్ దెతో పాని అంచి ఊంట తెంతొ ఆరి దెయిందె. ⁷ కో జీనుల గే, అంచి రాజిమ్చి ఈంజ వాట జోక దెయిందె, చి ఆవ్ జోచొ దేముడు జయిందె, జో అంక పూత్తు జా తయెదె. ⁸ గని అంచి సాచి జంక బితన, సముకుమ్ నెంజిలన, నిదానుమ్ నెంజిలన, హత్య కెర్తన, లంజె జతన, మెంగ్ర మాన్సుల్, బొమ్మల్క జోకర్తన, అబద్దుమ్ జతన, అబద్దుమ్ కెర్తన, సయ్తాన్చి వెట్కారుమ్ జలన, జేవ్క సిచ్చు, గందకము తెన్ ఆగి లగితి వెల్లి ఆగి గొయ్తె గలుల. ఈంజ దొన్నిచి మొర్ను.”

మెండపిల్లక తేర్చి జితిసి నొవి యెరూసలేమ్

9 తెదొడి సత్తు ఆకర్చ సిచ్చల్ బెర్ల సత్తు గిన్నల్ అగ్గె దెర సువ తిల సత్తు *దూతల్తె ఎక్కిలో అంచితె జా కెర కిచ్చొ మెన అంక సంగిలన్ మెలె, “జో మెండపిల్లక తేర్ని జతి పెండ్లి ఉబేడక తుక దెకయిందె” మెలన్. 10 తెదొడి దేముడుచి యేసుచి ఆత్మసెక్తిక జో దూత అంక ఒగ్గర్ డొంక్ తిలి డొంగుతె కడ నిలన్, చి జో అంక దెకయ్తెకయ్, ప్రబుచి జా ఆత్మసెక్తిక కిచ్చొ దెకిలయ్ మెలె, జోచి †నుద్ది తిలి యెరూసలేమ్ పట్నుమ్ దెకిలయ్. 11 జా పట్నుమ్చి ఉజిడి కిసి తిలి మెలె, దేముడుచి ఉజిడ్ తెన్ తా, ఒగ్గర్ విలువచి రత్నుమ్చి రితి ఉజిడి లగిలి, వజ్రమ్చి రితి సీసచి రితి బేంటచి ఉజిడి లగిలి. 12 జా పట్నుమ్క వెల్లి కోట ఒగ్గర్ డొంక్ తిలి. జా కోటతె బార గుమ్మల్ తిల. జేవ్ బార గుమ్మల్తె ఎక్ ఎక్ దేముడుచొ దూత తిలి. జేవ్ బార గుమ్మల్తె ‡ఇస్రాయేలుచ బారజిన్ పుత్తర్సుల్చ సెకుమ్లుచ ఎక్కెక్ నవ్వొ, ఎక్కెక్ గుమ్మలె రెగ్గ తిల. 13 తూర్పు పక్క తిన్ని గుమ్ముమ్లు, ఉత్తర పక్క తిన్ని గుమ్ముమ్లు, దచ్చెన పక్క తిన్ని గుమ్ముమ్లు, చి పడమర పక్క తిన్ని గుమ్ముమ్లు తిల. 14 వడ్డొ పట్నుమ్చి కోటక బార పునాల్లు, చి జేవ్ పునాల్లుతె మెండపిల్లచి చి రిసొచ బారజిన్ బారికుల్చ నవ్వొ ఎక్కెక్ రెగ్గ తిల.

15 అంచి తెన్ లట్టబ్బొ జో దూతక, జా పట్నుమ్కచి జేవ్చ గుమ్ముమ్ల్కచి కోటక కీకటార్తి రిసొ, బజర్క తెయార్ కెర్లి కటార్తి డండొ తిలి. 16 పట్నుమ్క చెత్తర్ కోనల్, చి జేవ్చ పక్కల్చ కొల్తల్ సమానుమ్ అస్తి, జేవ్చ కోనల్చ కొల్తల్ సమానుమ్ అస్తి. తెదొడి జోచి డండొ తెన్ పట్నుమ్క కటార్లన్. *దొన్ని వెయిల్ దొన్ని పుంజొ కిలోమీటర్లు దూరి జేవ్చి కొల్త. చెత్తర్ పక్కల్కి సమానుమ్; కెద్ది దీగు జయెదె గే, తెద్ది రూందు, తెద్ది డొంకు కి జయెదె.

* 21:9 21:9 15, 16 అద్యయల్. † 21:10 21:10 19:8 దెక. ‡ 21:12 21:12 జోవయింక అన్నెక్ నావ్ యాకోబు. ‘ఇస్రాయేలు’ మెలె, జో యాకోబుక అన్నెక్ నావ్ జయెదె, చి టాలితె ‘యూదుల్’, నెంజిలె ‘నంపజలన మొత్తుమ్’ చి అర్దుమ్ కెరసుక జయెదె.

§ 21:15 21:15 మీంతి * 21:16 21:16 రమారమి 1,400 మైలు

17 జేవ్చి కోట కి కటార్లన్. †అరవయ్ చెత్తర్ మీటర్లు డోంకు, మాన్సు కటార్తి రితి, మెలె జో దూత కటార్లన్. 18 జా కోట వజ్రుమ్చి వస్త్రుతె తెయార్ కెర్లసి, చి పట్టుమ్ రితి బజరి తిలి, చి జేవ్చి ఉజ్జిడి కిసి మెలె, అద్దుమ్ రితి టేంట లగిలి. 19 జా పట్టుమ్చి కోటచ పునార్లుతె ఎత్తి రగల్ రత్నాలు లగిల. తొలితో చి వజ్రుమ్, చొక్కల్ లగిలి. అన్నెక్ రత్నుమ్ నీలిమ్ రగుమ్ లగిలి, అన్నెక్ రత్నుమ్ 'యమునా' మెంతిసి ఎరన లగిలి, అన్నెక్ రత్నుమ్ పచ్చన లగిలి. 20 అన్నెక్ రత్నుమ్ నారింజ రంగు లగిలి, అన్నెక్ రత్నుమ్ అన్నెక్ ఎరన రంగుమ్ లగిలి, అన్నెక్ రత్నుమ్ తామర్ పూల్చి ఎడ్డి రంగు లగిలి, అన్నెక్ రత్నుమ్ సముద్రుమ్చి పచ్చన రంగు లగిలి, అన్నెక్ రత్నుమ్ అన్నెక్ రంగుమ్ ఎడ్డి రంగు లగిలి, అన్నెక్ రత్నుమ్ చింఛ్ అక్టల్ నొవర్ పలోయ్లి రంగు లగిలి, అన్నెక్ రత్నుమ్ గులాప్ రంగు లగిలి, అన్నెక్ రత్నుమ్ ఉడ రంగు లగిలి. 21 పడ్డో బార గుమ్మల్చ టట్టల్ కిచ్చొ వస్త్రుతె తెయార్ జా తిల మెలె, బార ముత్యల్క. ఎత్తి టట్ట ఏక్ ముత్యల్క తెయార్ జలిసి, అన్నె, పట్టుమ్చి వీది రితి బజరి తా, అద్దుమ్చి ఎదిలి టేంట లగిలి.

22 అన్నె, జా పట్టుమ్తె కిచ్చొ దేముడుచి గుడి డీసె నాయ్. కిచ్చొక మెలె, ప్రబు జలో ఎత్తి సెక్తి అదికారుమ్ తిలో దేముడు అన్నె మెండపిల్ల సొంత జా పట్టుమ్క దేముడుచి గుడి జవుల. 23 అన్నె, జా పట్టుమ్క ఉజ్జిడి దెంక పొద్దు గే జోను గే నాయ్. కిచ్చొక మెలె, దేముడుచి ఉజ్జిడి జాక దొర్కు జలి ఉజ్జిడి, చి మెండపిల్ల జాక దీవు. 24 జాచి ఉజ్జిడ్క ప్రెజల్ ఇండుల, చి ఒత్త కిచ్చొయ్ అందర్ తయె నాయ్. 25 అన్నె, రాతి మెద్దెనె కెయళ కి జా పట్టుమ్చ గుమ్మల్ డంకితి నాయ్, అన్నె, ఈంజ నొవి బూలోకుమ్చ రానలు ఒత్త జోవయించి గవురుమ్, జోవయింక గవురుమ్ దెలిసి ఎత్తి ఒత్త

† 21:17 21:17 అరవయ్ చెత్తర్ మీటర్లు మెలె, డబ్బయ్ దొన్ని గజాలు జయెదె, మెలె పుంజెక్ దొన్ని విసా చెత్తర్. పుంజెక్ దొన్ని విసా చెత్తర్ మెలె, బార బారలు, మెలె 144 = 12 x 12. బార సెకుమ్లుచ యూదుల్ తిల, యేసుక బార బారికుల్ కి తిల. జేక ఈంజ నంబర్ ఏక్ టాలి జయెదె.

అనుల. ²⁶ ఎత్కి ప్రజల్క దొర్కు జలి గవురుమ్, ఎత్కి ప్రజల్క దొర్కు జలి సొమ్మారుమ్ ఒత్త అనుల. ²⁷ గని కిచ్చొ పాపుమ్చి ఒత్త పెసె నాయ్, చి మర్కటుమ్ గే, అబద్దుమ్ గే ఇండితన ఒత్త పెసితి నాయ్. కో ఒత్త పెసుల మెలె, ‘పరలోకుమ్తె బెదుతు’ మెన మెండపిల్లచి పుస్తకుమ్తె కచ నవ్వొ తవుల గే జెచ్చొ పెసుల.

22

జీవ్ దెతో పానిచి గాడు జీవ్ దెతి పలుమ్చొ రూకు

¹ అన్నె జో దూత అంక కిచ్చొ దెకయ్లన్ మెలె, పరలోకుమ్చి జీవ్ దెతో పానిచి గాడు. కిసి తిలి మెలె, అద్దుమ్చి ఎదిలి టేంట తా, దేముడుచి అన్నె మెండపిల్లచి సింగాసనుమ్ తెంతో బార్ జా, ² పట్టుమ్చి వీదిచి నెడిమి ఉట్ట గెతయ్. పడ్తో అన్నె కిచ్చొ మెలె, పరలోకుమ్చి జీవ్ దెతో రగుమ్ *రూకుల్ జా గాడుచ దొన్ని పక్కలె అస్తి. జేవ్ రుకాలె బార రగల్ పండ్లు, చి ఎత్కి జొన్ని పండ్లు పిక తత్తతి. జో రూక్చ అక్కల్ కిచ్చొక కామ్క జెతతి మెలె, ఒండి ప్రజల్చక చెంగిల్ కెర్తయ్. ³ ఒత్త తెంతో, కిచ్చొచి రిసా గార్చి సాపెనల్ తిలిసి తయె నాయ్. దస్సిచి కిచ్చొ కి తయె నాయ్, గని జా పట్టుమ్తె దేముడుచి జో మెండపిల్లచి సింగాసనుమ్ తయెదె, చి జోచ సేవ కెర్తన జోక బక్తి కెర్తె తవుల. ⁴ జోచి మొకొమ్ జేవ్ దెకుల, చి జోవయించి నిర్దె జోచి నావ్ తయెదె. ⁵ పడ్తో, ఒత్త తెంతో అందర్ తయె నాయ్, చి ఒత్త తిలనక దీవుచి జవున్ పొద్దుచి జవున్ ఉజిడి నాయ్. కిచ్చొక మెలె, ప్రబు జలొ దేముడుచి ఉజిడి తయెదె, చి జేవ్ కెయ్చ తెయ్చ ఎలుప కెరుల.

⁶ అన్నె, “ఈంజేవ్ కొడొ సత్తిమ్చ, నంపజతన. అన్నె, ప్రబు జలొ, జోచ కబుర్లు సంగితనచి ఆత్మతె సికడ్తో దేముడు జోచొ దూతక తెద్రవ అన్నె; జర్గు జంక తిలిసి జోచ సేవ కెర్తనక దెకవుక మెన,” అంక జో దూత సంగిలన్.

* 22:2 22:2 యెహెజ్కేలు 47:12.

యేసుప్రభు బే బేగి అన్నె జెయిందె

7 “ఈందె, ఆవ్ బే బేగి అన్నె జెయిందె” మెన యేసు సంగితయ్. ఈంజ పుస్తకుమ్తె తిలి కబుర్చ కొడొ కో దెరనుల గే, జోవయింక చెంగిలి.

8 ఆవ్ యోహాను ఈంజ ఎత్కి సూన్లోసా దెకిలోసా. అన్నె, ఈంజ ఎత్కి సూన దెకిల్ బేగి, అంక ఈంజ ఎత్కి దెకయ్లో దూతచి చట్టె సెర్ను సేడ జోక బక్తి కెర్లయ్, 9 గని జో అంక, “తుయి దస్సి కెరుక నాయ్! ఆవ్ తుచొ రితో, దేముడుచ కబుర్లు సంగిత తుచ బావొదివొ తెన్ కి, తుచి రితో సేవ కెర్తొసా జయిందె. దేముడుకయ్ జోకరు!” మెలన్.

10 తెదొడి జో అంక, “ఈంజ పుస్తకుమ్చి కబుర్చ కొడొ ముద్ద కెరు నాయ్, లుంకడు నాయ్; కిచ్చొక మెలె సమయుమ్ పాసి జా అన్నె. 11 పాపుమ్తె ఇండితన అప్పె కి పాపుమ్తె ఇండితె తత్తు, మర్కటుమ్చ అన్నె మర్కటుమ్ ఇండుతు, పున్నిమ్ జలన అన్నె పున్నిమ్తె ఇండితె తత్తు, సుద్దిచ అన్నె సుద్ది ఇండితె తత్తు.” మెన దూత సంగిలన్.

12 యేసుప్రభు సంగిలిసి అన్నె కిచ్చొ మెలె, “ఈందె, ఆవ్ బే బేగి జెయిందె. అయ్లె, ఎత్కి మాన్సు కెర్ల కమొ కొల్లి జోవయించి కూలి దెయిందె. 13 ‘అల్ఫా’ ‘ఓమెగ’ మెన, †తోలితోచొ, కర్వడ్చొ, మొదొల్చొ ఆకర్చొ ఆవ్వి” మెన యేసు సంగిలన్.

14 పరలోకుమ్చి జీవ్ దెతో చెట్టెచ పండ్లు కంక సెలవ్ దొర్కు కెరంతి రిసా, చి పరలోకుమ్చి గుమ్ముమ్ వాట్ పెసుక సెలవ్ దొర్కు కెరంతి రిసా, కో ‡జోవయించ పాలల్ కేడన తవుల గే, జోవయింకయ్ చెంగిలి. 15 గని గుమ్ముమ్ ఒత్తల్తోచి బయిలె కో అన్తి మెలె, సూనర్లు రిత మాన్సుల్, మెంగ్ర మాన్సుల్, లంజె జతన, అత్య కెర్తన, బొమ్మల్క జొకర్తన, చి అబద్దుమ్క ప్రేమ తా, అబద్దుమ్ కెర్తన ఒండి అన్తి.

† 22:13 22:13 నెంజిలె “తోలితో మొదొల్ తెంతో ఆకర్ ఎదచొ ఆవ్వి” మెన యేసు సంగిలన్. ‡ 22:14 22:14 నెంజిలె ‘ప్రభుచ కొడొ రితి ఇండితతి గ’.

16 యేసు, “ ‘అంక నంపజలనచ సంగుమ్లు సూన్తు’ మెన, ఈంజ సాచి తుక దెకయ్తి రిసా యేసు మెలో ఆవ్ అంచొ ధూతక తెద్రవ అస్సి. దావీదు పూర్గుమ్చొ జలో రానొచి సెకుమ్క ఆవ్ చేరు జలోసా, జోచి సెకుమ్తె జెర్మిలోసా, దేముడుచి రాజిమ్చి నొవి దీసిక దొర్కు జలి ఉజిడి దెతో సుక్కో ఆవ్” మెన సంగిలన్.

నంపజా మెన మాన్సుల్క బుకార్లిసి

17 “తుమ్ జా” మెన దేముడుచి సుద్ది తిలి ఆత్మ అన్నె యేసుచి కితేర్ని జతిసి సంగితతి. అన్నె, ఈంజ కోడు కో నూనుల గే, జేవ్ కి జా మెన అన్నె మాన్సుల్క బుకార్లు. అన్నె, కక్క తాన్ తిలె, జో జెవున్, చి కో ఇష్టుమ్ జవుల గే, డబ్బుల్ నే దెతె ఆరి పరలోకుమ్చి జీవ్ దెతో పాని నజ పితు.

18 ఈంజ పుస్తకుమ్చి కబుర్చ కొడొ సూన్త ఎత్కిజిన్క ఆవ్ కిచ్చొ జాగర్త సంగితసి మెలె, ఈంజేవ్ కొడొతె అన్నె కిచ్చొ వేరచి బెదయ్లె, ఈంజ పుస్తకుమ్తె సంగ దెకయ్ల సిచ్చల్ జో మాన్సు సేడ్తి రితి దేముడు సిచ్చ కెరెదె. 19 అన్నె, ఈంజ జోచి కబుర్చి పుస్తకుమ్చ కొడొతె కో కిచ్చొ కడ గెలె, ఈంజ పుస్తకుమ్తె రెడ్ల దెకయ్లి జో జీవ్ దెతి రూక్చి, చి జోచి పరలోకుమ్చి సుద్దిచి పట్టుమ్తెచి జోచి వాట, ఎత్కి అదికారుమ్ తిలో దేముడు కడ గెలెదె.

20 “కచితుమ్, ఆవ్ బే బేగి జెయిందె” మెన ఈంజ ఎత్కిక సాచి జతొసా సంగితయ్. * ఆమేన్, జే, ప్రబు యేసు!

21 జోచయ్ జల మాన్సుల్ ఎత్కిజిన్చి ఉప్పిరి ప్రబు జలో యేసుచి దయ తవున్. ఆమేన్.

§ 22:17 22:17 19:7-8, 21:2. యేసుచి తేర్ని మెలె, నంపజలన మొత్తుమ్ గెతి జోవయిచి సుద్ది పట్టుమ్, చి జా పట్టుమ్తె బెదితన, నంపజలనయ్ మొత్తుమ్. యెనయా 49:18, 61:10, యర్మీయా 2:1-3, ఎవెసు కచి ఉత్తమ్ 5:31-32. * 22:20 22:20 తెద్దిలి

Kupia New Testament

Kupia: Kupia New Testament (New Testament)

copyright © 2019 Wycliffe Bible Translators, Inc.

Language: (Kupia)

Contributor: SIL International (in Asia)

All rights reserved.

2020-11-18

PDF generated using Haiola and XeLaTeX on 21 Feb 2024 from source files
dated 29 Jan 2022

7ccb2690-4432-5e86-88c1-f8ee976f30f4